

Basef Ifimba Bu'wafi Jon Nanda'afi

Basef bandafi Joni

1:1-18 Jisas Kraiss agol wa'agol Basef nataga epen
1:19-51 Jon nagapisi'as embeli nawalipa basefa Jisas nagafi'i. Ea' Jisas nali' nogofala alipumi ananiami biamibiam.
2:1-12:50 Jisas nawalipasa basef Godi nanda' hiahaom banagami 7-pelaim si'i Ahamana God nanda'ami
13:1-19:42 Jisas nafe' Jerusalem nawalipasa basef bu'wafi owa' sanda' kotimana sandolona lawag usi'igai ti'wanaegai ma nagaga'
20:1-31 Jisas nosafel wapani nandawalapa alipisi ananisi
21:1-25 Jisas nafe' Galili nandawalapa alipumi ananiami 7-pelaim

Basef afataga epen anen Jisas

1 ¹Fowa' gani dambadamba anif Basef epen nape. Ea' Basef epen anamba nape naloma God. Ea' epen anamba agilinama Basef anen atona God.^a ²Fowa' dambadamba epen anamba agilinama Basef naloma God nape.^b ³Anen nanda' hiahaom hiami. Owa' anin mae atitin netaga ano'w ufiaw'a, owa'atin. Hiahaom magatagai hiami anen atona nanda'am mataga.^c ⁴Ambal namili lagapaunai lape epen anamba ea' ambal alol logogala'ma esis epesi.^d ⁵Mogogala'i amamba mogogala'ma akuti. Ea' akot ina taofana anen, owa' atin endilisi. Anen nogogala'ma esis amam nematawa hiasii, anen ea' nafi'i itap apa'e ma dei' nogota ata'e.^e

⁶Anona aman daiana nataga, agilinama Jon, God nasapa'ana nagafi'ii. ⁷Anen nafi'i ma nogowalapa basef. Dei' nawalapa basefa nogogala'i anamba ma epes hiasi sogame' basef ananifi sogahapifana.^f

⁸Jon nawalapa basef ifimba na'i anen ina nagwapin inimba nigigala'i,

a 1:1 Jo 17:5; 1 Jo 1:1-2; Re 19:13 **b** 1:2 1 Ko 8:6; Kl 1:16-17; Hi 1:2 **c** 1:3 Jo 5:26
d 1:4 Jo 3:19 **e** 1:5 Mt 3:1; Lu 1:13-17,76 **f** 1:7 Jo 1:20

owa'. Anen nali' nafi'ima nogawalapa basef alihifa nagwapin anamba endilisinai nogogala'i.^g

⁹Nagwapin anamba nogogala' endilisii, anen nogogala'ma esis amam nematawa hiasii, ea' nafi'itap apa'e ma dei' nogota ata'e.^h ¹⁰Fowa' gani anen nanda' itap apa'e pataga, dei' nafi'itap nape itap apa'e. Apa' esis amam nematawa sagape itap apa'ii ina sogawana, owa'. ¹¹Anen nafi'itap nataga kofagama itap lu'upa esis Juda, owa' esis mini'ap ananisi ina sogawana sa'i aho' sofa'ana sahapifana, owa'atin.ⁱ ¹²Apa' esis mamahisa sogawana si'i aho' sogahapifanai, noso'asa anin ametala sogataga awasi Godi.^j ¹³Esis ina sataga awasi Godi ma waf bu'wafi mamasas sogolasi, owa'atin. Esis ina sataga awasi Godi si'i ukup mamasas pa'i ma sogolas, owa'atin. God atona nanda'as sataga awasi ananisi.^k

¹⁴Basef fataga epen ea' nape la'afena afa', ea' wati glori mogogala'i banagami ananisi. Glori amamba mogogala'i banagami nogamanai atom, ahamana nasapa'ana nagafi'ii. Anen natopalopapa dowaf nowa' banagapa ma nigihimba'mapa waf endilisifi fape si'ifa anen.^l

¹⁵Jon nawalapa basefa anen na'amba na'i, "Anen aman anamba fowa' a'ipipana aga'i. Aman nigima ae' nogafi'ii, anen nape nagali'ma ae'i. Anen fowa'inai nagapan na'ambai, nape nali'ma ae'."^m

¹⁶Apa' hiapai mofa' hiahawes fasisi sagape si'isa anini. Waf afamba natopalopapa dowaf nogowa' banagapa nanda'as sandape na'amba atin nimaguf hiafi.ⁿ ¹⁷God naso'ana mu'uli ananini Mosesa nagawalipapa. Apa' Jisas Krai natopalopapa dowafa waf endilisifi.^o ¹⁸Owa' anona aman atotona nili' niti God kwasakwasalaia, owa'atin endilisi. Nogamana anamba Godi atotona nape felefele' endilisi naloma anen ahamana ea' nawalapa basef kofagefa ma apa' nihimba'mapa God.

Jon aman nagapisi'as embeli a' nawalapa basef

(Mt 3:1-12; Mk 1:7-8; Lu 3:15-17)

¹⁹Anom amam dembami Judaimi mapani Jerusalem masapa'i anom amam mafe' mahali' Jon. Anom pris maloma anom Livai mugumafi ipat Godii, amom mapani Jerusalem mafi' mahali' Jon ma'i, "Ina' aman mamahinama?"^p

²⁰Ea' Jon ina nambaho' basef, owa'. Anen nagwamam nawalapa basef na'lipam na'i, "Ae' ina Krai God nandandepe nasapa'e agafi'ii, owa'."^q

²¹Ea' mahali'ana ma'i, "Dei' ina anina profet fowa'inai agilinama Elaija?"

g 1:8 Jo 8:12; 1 Jo 2:8 h 1:9 Jo 1:3, 17:25 i 1:11 Ga 3:26 j 1:12 Jo 3:3-6; Je 1:18; 1 Pi 1:23 k 1:13 Ais 60:1-2; Ga 4:4; Fl 2:7; Hi 2:14; Lu 9:32; Jo 2:11 l 1:14 Jo 1:27,30; Mt 3:11 m 1:15 Kl 2:10 n 1:16 Eks 34:28; Ro 6:14, 10:4 o 1:17 Eks 33:20; Jo 6:46; 1 Ti 6:16; 1 Jo 4:12; Mt 11:27 p 1:19 Jo 3:28 q 1:20 Diu 18:15,18; Mt 11:14; Jo 6:14, 7:40

Owa' anen na'i, "Ae' owa'."

Ea' ma'i, "Dei' ina' aman anamba profet apa' mape mogohafanai?"

Owa' nagwamama basef na'i, "Owa'."

²²Ea' ma'ipana ma'i, "Dei' ina' ami? Ama afa' utanima ofe' uga'ipa dembami masapa'afa wagafi'ii. Ina' na'i ina' atina na'i basef maif, ina' ami?"^r

²³Ea' Jon nagwa basef si'i fowa' profet Aisaia naga'i na'i, "Ae' anagol malogol dowaf goga ga'i anep itap fataupigima gaga'ias na'amba ga'i, 'Pendomba ufia'w Dembinai!'^s

²⁴⁻²⁵Ea' amom Farisi dembami Judai masapa'am mafi'i mogahali' anini mahali'ana ma'i, "Ina' Krai God nandandepena nasapa'ena nagafi'ii a'a, ina' Elaija a'a, ina' anona profet dembinai? I'i ina' owa' Kraisa, a owa' Ilaijaia, anona profeta, dei' ina' napisi'asa main?"

Jon nagwamam na'ipam na'i, ²⁶"Ae' agapisi'as embel atembeli, apa' anona aman anamba nape la'afena ipa', ipa' ina pegawana.^t ²⁷Aman anamba nagi'ma ae' nagafi'ii. Ae' ina ambo'owe a'owa' egatagwaha mandalefa su ananiami, owa'atin. Anen dembinai a'owa', nikila' ae'."^u

²⁸Basef ifimba fataga anambel wambel Betani walemb Jordan fisamb, Jon nagapisi' esis amam nematawama.^v

Jisas nogamana Godi si'i anin mafin sipsip

²⁹Wafilu owa', Jon nati Jisas nafi'mai anen na'ipas na'amba na'i, "Ipa' piti aman anamba anen si'i mafin sipsip noganai Godi, anamba esis sanda' ofa anai. Anen si'i sipsip nogakwaha waf awafi esis amam nematawa hiasi sagape itapi sanda'afi.^w ³⁰Anen ma'una apamba ea' nafi'i. Anamba fowa' ae' a'ipipa aga'i, 'Anona aman nigima ae' nogafi'ii, anen nagali'ma ae'i. Anen a' nali' nape apa' ae' selai agi' ataga.'³¹ Ae' ina a' egawa anen epen mamahonama, ata' owa'atin. Ae' afi'i apisi'ipa embela egawalapa aman anamba dembinai ma apa' amam nematawa Israel."^x

³²Ea' Jon nawalapa basef alihif na'i, "Ae' ea' ati Ambal bu'unai Godi nakwaha heven nisila'i si'i amil alamba apa' maga'i ma'unai nisila'i ea' nafe' nape nomona anen.^y ³³Ae' ina egawa anen, owa'. Apa' God nasapa'e afi'i ma igapisi'as embel ea' na'ipi na'i, 'Ina' niti Ambal bu'unai Ae'anai nisila'o ma nogapaunai aman anamba, ea' ma'una ea' aman anamba. Anen atiasi nogaso'as Ambal Ae'anai bu'unai nogape opalef asasilifi nomoni.'^z

³⁴Ae' ea' atolona endilisi awalapa basef alihifa anen a'if a'i, Anamba anen Nogamana Godi endilisi."

^r 1:22 Ais 40:3 ^s 1:23 Mt 21:25; Jo 1:33 ^t 1:26 Jo 1:15; Ap 13:25 ^u 1:27 Mt 3:6; Jo 10:40 ^v 1:28 Ais 53:6-7; Jo 1:40; 1 Pi 1:18-19 ^w 1:29 Jo 1:15 ^x 1:31 Mt 3:16
^y 1:32 Lu 3:2-3 ^z 1:33 Mt 3:17, 17:5; Mt 27:54

Jisas nofala alipumi biamibiam

³⁵A'i owa' wafilu Jon a nafe' nalutu wapani na'amba ea' alipumi ananiami biam malomana mape.^a ³⁶Ea' nati Jisas nafo'lo, na'ipa alipumi ananiami nihimba'mama Jisas na'i, "Piti, anen si'i sipsip noganai Godi."

³⁷Ea' alipumi ananiami mame' na'ipas na'amba, maila Jisas. ³⁸Jisas nandambema owa' nati amom mailana na'ipam na'i, "Ipa' pa'i pifi'i pelaoma main?"

Owa' ma'ipana ma'i, "Rabai, ina' nagapoma ipat ati?" Agol agalemba "Rabai" apa' mombomagol mi'i, "Dembina'i Tisa."

³⁹Ea' anen na'ipam na'i, "Ipa' fi'i ma' ata' petologon."

Ea' mafe' ipat anen nagapautai. Nema' afamba atef wambomota awin nandambema napani gani wa'ol 4 klok, ea' malomana mapani.^b ⁴⁰Amom mame' basef ifimba Jisasi Jon naga'iefi mailana. Amom agufuma Andru Saimon Pita, amom atom sahomana owamana.^c ⁴¹Andru a' ata' usi'ina notanima nali' nafe' nowando'ma Saimon, ama ni'ipana niga'i, "Afa' wati Dembinai Mesaia ea'."

Apa' dei' mambema agol agalemba Mesaia ma'i Krais, God nandandepana nasapa'ana nagafi'ii.^d

⁴²Ea' Andru nao'wa Saimon nafi'mai Jisas natolona na'i, "Ina' Saimon nogama Joni. Anaf agol ine'igili a' nendefala Sifas."

Agol kofagogola agalemba "Pita" ga'i otam.^e

Jisas nofala Filipi Nataniel

⁴³Wafilu wapani Jisas na'i nefe' itap apamba lu'upa Galili. Ea' nowando'ma Filip natolona na'ipana na'i, "Ina' fi'i nigima basef ae'afi nila ae'."

⁴⁴Filip nafi'i wambel ambalemba atembel Pitai Andru magafi'ima, Betsaida.^f ⁴⁵Ea' Filip nafe' nolaoma Nataniel na'ipana na'i, "Aman anamba fowa' Moses nanda' basefa mu'uli God naga'ianai, ea' amom profet wapani manda' basef magal'ianai, aman anamba ma'una afa' ea' watolona. Anen aman Nasaretinai, Josep nogamana."^g

⁴⁶Ea' nahali' Filip na'i, "Dei' anis hiahawes fasisi sataga safi'i Nasaret?" Filip na'ipana na'i, "Ina' fi'i netelona."

⁴⁷Ea' Jisas nati Nataniel nafi'mai anen na'ipana na'i, "Niti aman anamba Israelinai endilisi, aman bu'unai. Anen owa' niga'i anif basef baso'asefia."^h

⁴⁸Ea' Nataniel na'ipana na'i, "Dei' ina' negawe na'imama?"

a 1:35 Jo 1:29 **b** 1:39 Mt 4:18-20 **c** 1:40 1 Sml 2:10; Sam 2:2; Jo 4:25 **d** 1:41 Mt 16:18; Mk 3:16 **e** 1:42 Mt 8:22; Mk 2:14 **f** 1:44 Diu 18:18; Ais 7:14, 9:6; Jer 23:5; Esi 34:23 **g** 1:45 Jo 7:41,52 **h** 1:47 Sam 32:2

Ea' Jisas nagwamana na'ipana na'i, "Doko' Filip ina dei' nofalena, ata' owa'atin, ae' ali' atilina nagape lawag fik kofagegama. Nogota atamba atilina."ⁱ

⁴⁹Nataniel nagwamana na'i, "Tisa Dembinai, ina' Nogamana Godi endilisi. Ina' dembinai King apa' Israeli."

⁵⁰Ea' Jisas nagwa basef na'i, "Ae' doko' ea' ali' atilina egawena nagape lawag kofagegama. Isimba atis dei' ina' nahapifi. Endilisi anaf ina' a' niti anom hiahaom banagami mikila' dei' atilina nagape laogon."^j

⁵¹Ea' Jisas na'ipana wapani na'i, "Ae' a'ipipa endilisi atis, anaf ipa' piti heven nundausi' nogal ea' amom ensel Godi lota sila'mima ae' ataga epen egefa' alop epesi."

Jisas nambema embel bataga wain

2 ¹Anef nemaf fagafe'ma wanifi anona aman naso' ano'w nemata'w wambel ambalemba Kana bagape itap apamba lu'upa Galilii. Ea' ma'mama Jisasi kwape ipat atamba sandaso'amatai.^k ²Esis sofala Jisas naloma alipumi ananiami wapani mafi'i mati daso'ama inimba. ³A'i owa' main embel wain ahi'alan. Ea' ma'mana Jisasi kwafi'i kwa'ipana kwa'i, "Esis embel wain a' akas."^l

⁴Ea' Jisas na'ipa'w na'i, "Ma'me, maol inimba ina ae'ani. Ea' ina maol ine'ini, owa'. Nogota ae'atai ina dei' tataga, ata' owa'."^m

⁵Ea' kwa'ipa amom manda' maola anen nogaso' nemata'wi kwa'i, "I'i anen niga'ipipa anif basefa, ipa' pihapifana."ⁿ

⁶Anom maloh lu'wami ma'oh ama esis Juda saila mu'uli Godi sagasa'ofami. Maloh amamba wanom wanom sanda' otamba sanda'ami si'i dram lu'wami 44 galon.

⁷Jisas na'ipa amom manda' maol na'i, "Ipa' pilai embel pekolo'wam maloh amamba ma si'im kwaef endilisi."

Ea' amom molam si'im si'i anen naga'ipam. ⁸Ea' na'ipam na'i, "Dei' kolo' du'wanimbel pefa'ambel pefe' pese'anam aman nugumafi gwa'aisii."

Ea' mofa'mana embel mafe'. ⁹Dembinai nugumafi gwa'aisii embel ambalemba name'ambel owa', ea' bataga fasimbel si'i wain, apa' anen ina nogawa embel ambalemba amom mogofa'ambelima, owa'atin. Apa' amom manda' maola anini mogawambel. Amom molai embel atembel wafimbili. Ea' anen dembinai nofala aman anamba nagaso' nemata'wi ¹⁰nahali'ana na'i, "Epas hiasi ata' sali' saso'asa wain inimba bu'wani nali' sa'ana ea' sagi' sofa'masi wain inimba awasin kwasakwasalai. Apa' ina' owa'atin. Ina' nambaho'wa wain inimba bu'wani na'ihai dei'aol nagi' nofa'an nafi'i."^o

ⁱ 1:48 Mt 14:33, 16:16; Mt 27:42; Mk 3:11 ^j 1:50 Jen 28:12 ^k 2:1 Jo 1:43 ^l 2:3 Mt 12:48; Jo 19:26 ^m 2:4 Jo 7:30, 8:20 ⁿ 2:5 Mk 7:3-4 ^o 2:10 Lu 9:32; Jo 1:14, 4:54; Jo 11:40

¹¹Amamba ametal banagami magali'i si'i God nanda'ami, dambadamba Jisas nanda'am Kana itap apamba lu'upa Galili. Anen nihimba'ma esisa glori ananiami banagami mogogala'i. Ea' amom alipumi ananiami mahapifana.^p

¹²Isimba hi'alasa main, Jisas naloma alipumi ananiami miliana Kaperneam maloma ma'mana anani'wi kwaloma owapana ananiami wapani ea' sape na'amba anif nimaguf.^q

Jisas nugulatamasa hiahaom esis sagatalom nomon ipat lu'unai Godi
(Mt 21:12-13; Mk 11:15-19; Lu 19:45-46)

¹³Nemaf afamba Pasovaefi felefele'ma fegataga, Jisas nondowasa' Jerusalem. ¹⁴Ea' nawis ipat lu'unai Godi nomon nati epes satama mafis amamba sipsip bulmakau amiguf ma'unamb ea' anis satalom otamba sindisila'mamba. ¹⁵Ea' Jisas nasa'ma anof mandof strin nanda'af nanda' anep wip si'i bumbulita. Ea' nopagaha epes isimba natofas natofamasa hiahaom amamba asasimi sipsipi bulmakau wapani mawis mafe' ando'. Ea' nugulatamasa otamba moni esis sindisila'manai nakwahona, nambema tebol asasimi nakolo'masom.^r ¹⁶Ea' na'ipa amam amamba magatala amigufi na'i, "Ipa' fa'a hiahaom amamba fo'o."^s

¹⁷Ea' alipumi ananiami ukup pandanda'ma anif basef fagape Baibeli fa'ias faga'i, "Ae' okom mohafel a'owa' ma enda' maol banagambel endilisi ma igimafi ipat ine'inai nogape andeande'."

¹⁸Owa' amom Juda mati anen nanda'am na'amba, ma'ipana ma'i, "Ina' ata' nihimba'mafa anol ametala hiahaom banagami si'i God nanda'ami ma ogogawa ina' agol lu'wagilinai ma nanda'am na'amba ma afa'."^t

¹⁹Ea' Jisas nagwamama basef na'i, "Ipa' da'a ipat anamba lu'unai Godi awasina, atiasi ae' itanima ila'ana nogotawa wapani nimaguf wanif dowaf."

²⁰Ea' amom Juda ma'ipana ma'i, "Ipat anamba sanda'ana sala'ana afagof hiagufi 46-pelaiguf, apa' owa' ina' na'i nimaguf wanif dowaf nela'ana notawa wapani a'amon?"^u

²¹Apa' ipat anamba Jisas naga'ianai ina na'i ipat anamba endilisinai lu'unai Godi, owa'. Anen na'i alop ananipi.^v ²²Ma anaf God nosa'mana wapani nowaga sogawanama, nogota atamba amom alipumi ananiami a' ukup popoma basef ifimba ananifi fowa' naga'iefi. Ea' dei' a' mahapifa basef ifimba fagape Baibeli faloma basef ifimba Jisas fowa' naga'iefi.^w

Dembina Jisas nogawa epes hiasi ea'

²³Jisas nape Jerusalem ama nimaguf ifimba Pasovaefi, esis amam nematawa hiasi sati maol anen nanda'ani banagani. Ea' sahapifa agol

P 2:11 Mt 4:13 **Q 2:12** Eks 12:1-27; Jo 6:4, 11:55 **R 2:15** Lu 2:49 **S 2:16** Sam 69:9

T 2:18 Mt 21:23, 26:61; Mt 27:40; Ap 6:14 **U 2:20** 1 Ko 6:19 **V 2:21** Lu 24:6-8; Jo 12:16, 14:26 **W 2:22** Jo 7:31

ananigili. ²⁴Apa' Jisas nogawa epes hiasi hi'alas. Na'amba anen ina nahapifas, owa'.^x ²⁵Anen ina gawa akanai ma anis daias sog'aipana ma waf epesi, owa'atin. Anen a' nogawa epes hiasi hi'alas ea' nogawa ukupi opalef اساسisi.

Jisas na'i naloma Nikodemus

3 ¹Anona aman agilinama Nikodemus, anen Farisi agol lu'wagili ma esis Juda.^y ²Anamb owamb nafi'mai Jisas na'ipana na'i, "Tisa Dembinai, apa' mogawa ina', God nasapa'ena nafi'i si'i dembinai Tisa. I'i owa' God nope noloma anin epena, anin ina la'ifina nenda' maol inimba banagani ina' nanda'ani, owa'atin."^z

³Ea' Jisas nagwamana basef na'i, "Ae' a'ipina endilisi atis, epen ami i'i owa' God nolan netaga dambaina, anin ina atiasi nuwis nomona maol Godi nope Dembinai nugumafian, owa'atin."

⁴Nikodemus nahali'ana na'i, "Dei' isimba ea' hagasi sonda'am si'imama ma solas sogataga dambais wapani? A sotanima sundawis nelelemb mamamasi a'amon, ama bola otanima olasi wapani?"^a

⁵Owa' Jisas nagwamana na'ipana na'i, "Ambal bu'unai Godi la'ifina nolan negataga dambain. Ae' a'ipina endilisi, i'i owa' Ambal Godi nolana dambaina embela, ina atiasi la'ifin nuwis nomona maol Godi, owa'atin. Apa' i'i Ambal Godi nogolan dambaina, dao'. Anin ilama nogawis nomona maol ananini.^b ⁶Hiahaom magataga alop atopi, amamba alop atopumi si'i ano'w nemata'w kogola awani. Apa' hiahaom Ambal Godi nogolami, amamba mataga si'i ambal bu'unai. ⁷Ina a' nomonas hiahawesa aga'ipina na'amba aga'i pegataga dambaipa wapani si'i epes sogolaipa, owa'i.^c ⁸Fufin nagaluwi nandagi'ma anin si'i nalo nagafe' ganigani. Ina' name' amalemb magala'an, apa' ina negawa anamba anin nalo nagafi'ima ma a' nalo nagafe'ma, owa'atin. Epes hiasi Ambal bu'unai Godi nolasa sagataga dambaisi, esis ea' sataga na'amba atin."

⁹Ea' Nikodemus nagwamana na'i, "Hiahawes isimba atiasi sotaga sondowalap si'imama?"

¹⁰Jisas nagwamana na'i, "Dei' si'i main? Ina' Tisa dembinai esis Judai, owa' ina' owa' ata' negawa chiahawes isimbaia?^d ¹¹Endilisi atis ae' a'ipina apa' ma'i hiahawes apa' mogogawasi, ea' mawalapa hiahawes isimba a' magatilisi. Apa' owa' ipa' pewa' alafugaha basef ifimba afa' wagawalapafi.^e ¹²Ae' a'ipipa hiahawes isimba itapasi, apa' ipa' ina pegawam pahapifam, owa'. I'i ae' iga'ipipa hiahaom ilifami, atiasi ipa' pegawa pihapifam pi'imama? Owa'atin.^f ¹³Ina anona aman itapanai

^x 2:24 Mk 2:8 ^y 3:1 Mt 22:16; Jo 9:16, 7:50, 19:39 ^z 3:2 Mt 18:3; 1 Pi 1:23 ^a 3:4 Esi 36:25-27; Ta 3:5 ^b 3:5 Sam 51:5; Jo 1:13 ^c 3:7 Ekl 11:5 ^d 3:10 Jo 3:32, 8:26
^e 3:11 Lu 22:67 ^f 3:12 Pro 30:4; Ro 10:6

nalota gani heven, owa'. Ae' atowe. Ae' ataga epen egefa' alop epesi ea' ae' atowe akwaha heven isila'i, ea' ma'uwi.^g ¹⁴Fowa' gani aman anamba Moses nasa'ma anal ul nanda' kapa nanda'ali lail anoga lawag ilif. Nanda'am anamba wafigima fataupigima. Amamba ea' na'amba atina atiasi sefela ae' ataga epen egefa' alop epesi sendele igail anoga lawag ilif.^h ¹⁵Ama epes mamahisa isimba sogahapifa ae'i, atiasi sofa' ambal namili sogape andeande' lifilafi.ⁱ

¹⁶Aho' endilisi, God nogamana aman ananinai atotona nape. Owa', owa'atin. Anen okom maimaila amam nematawa hiapai magape itapi hi'alapa. Ea' naso'apai Nogamana ananinai atotona ma epes ami sogahapifanai sogape andeande', ina sogama waf awafi, owa'atin. Sofa' ambal namili sope andeande' lifilafi.^j ¹⁷God ina nasapa' Nogamana ananinai nafi'i itap apa'e ma nonda' kotimapa, owa'atin. Anen nasapa'ana nafi'i ma nimbimai epes hiapai magape itapi nokwahomapa waf awafi mogafi'mai anen.^k ¹⁸Epen ami nigahapifa anini, anin atiasi basef akana kot lu'utai. Apa' epen ami owa' nigahapifanaia, epen inimba a' lamonan higililan ea' ma kot anamba lu'unai aunai. Dei' main? Anin nandaiwa'ma nigahapifa Nogamana atotona Godi, na'amba epes isimbai a' lamonas hi'ilas.^l ¹⁹Basef kofagefa ma kot lu'unai anamba na'amba. Mogogala'i a' mafi'i mataga itap apa'e ea', owa' esis ukup panda'i waf atona anamba itapanai si'i owambi, sandaiwa'ma mogogala'i amamba. Dei' maina esis sandaiwa'? Esis sanda' waf awafi na'amba dei' sandaiwa'.^m ²⁰Epes ami sanda' waf awafii, sogowa' alafugaha mogogala'ii, esis sandaiwa'ma waf awafi asasifi fendawalap. Ea' dei' ombal mahas sandaiwa'. ²¹Epen ami nanda' waf endilisifi, anaf anin negatagama mogogala'i. Ma anis epes daias sitilin sogogawa anin nape sisihin atapina God nanda' maol ananini.ⁿ

Jon nawalapa basef kofagefa Jisasi na'if alihif

²²Basef ifimba hi'alefa main, Jisas naloma alipumi ananiami a' mafe' itap lu'upa Judia. Ea' nape nalomam napisi' esis amam nematawa. ²³Apa' Jon nape wambel ambalemba Inon felefele'ma anambel wambel Selim. Anamba walemb lu'wambi begetaha, esis amam nematawa hiasi safi'i na'amba, anen napisi'as.^o

²⁴Nemaf afamba dembinai King Herot ina dei' nanda' Jon nanda' kalabus, ata' owa', ²⁵amom alipumi Joni ma'i anif basef fape la'afena amom maloma anona aman Judainai. Amom ma'i basefa waf afamba esis Juda sasa'of sogowando' alogwa ma sogape bo'wesa naep Godi.^p

g 3:13 Nam 21:9; Jo 8:28, 12:32 h 3:14 Jo 20:31 i 3:15 Jo 3:36, 10:28; Ro 5:8, 8:32; 1 Jo 4:9-10 j 3:16 Lu 19:10; Jo 5:22, 12:47; Ap 17:31 k 3:17 Jo 3:36, 5:24 l 3:18 Jo 1:5,9, 8:12 m 3:19 Ef 5:11-13 n 3:21 Jo 4:1-2 o 3:23 Mt 4:12 p 3:25 Jo 1:26-34

²⁶Ea' alipumi Joni mafe'ma anen ma'ipana ma'i, "Dembina'i Tisa, aman fowa' nape nagaloma ina' gani wa'ol walemb Jordani ma ina' nagawalapa basef naga'ifanai, aman anamba dei' amam nematawa hiasi safe'ma anen napisi'as embel."^q

²⁷Jon na'ipam na'i, "I'i God nagape heveni owa' noso'an anis maefah anin epena, epen inimba ina' la'ifin nenda' anin maol, owa'atin.^r ²⁸Ipa' apegawa basef ifimba fowa' ae' aga'iefi a'i ae' ina Krai, God nandandepe nasapa'e agafi'ii, owa'. Apa' God nasapa'e ali' afi'mai Krai.^s ²⁹I'i anona aman nogaso' ano'w nemata'wi, nemata'w akwamba ea' anani'wi nagaso'akwi. Ea' alipunai aman anambai sonahana nalutu name' aman anamba dei' nagaso'akwi nagafi'i. Dei' na'amba atina ae' sonahe a'owa' ma okom ae'ami, andagalama Dembinai Jisas. ³⁰Agol ananigili lu'wagol, apa' agol ae'agili a' gowala gofe' sa'ogol."^t

Aman nagafi'i heveni

³¹Aman nagafi'i ilifi anen nape ilifa hiahaom hiami. Apa' aman nagataga itapi anen itapanai naga'i basef itapafi atifi. Apa' aman nagafi'i heveni anen nape ilifa hiahaom hiami.^u ³²Anen na'i basef nawalapa hiahawes hiasi natilis nagame'as ea'i. Apa' ina anin epen neme' basef ifimba anen naga'iefi, owa'atin. ³³Epen ami name' basef ananifi ma nigailafi, anin na'i aho'ma basef ifimba nihimba'masaf alihif God anen naga'i basef endilisifi atifi.^v ³⁴Aman anamba God nasapa'ana nagafi'ii anen nawalapa basef Godi. Ea' God naso'ana Ambal bu'unai ananinai nape si'inama anen.^w ³⁵Ahamana God okom maimaila Nogamana ea' naso'ana hiahaom hiami hi'alama lagof ananigufi.^x ³⁶Epen ami nagahapifa Nogamana ananinai, epen inimba dei' a' nefa' ambal namilima negape andeande' lifilafi dondol. Apa' epen ami newa' alafugama Nogamana ananinai, inimba ina atiasi nefa' ambal namili, owa'atin. Anaf nembel wandafunai Godi a' nopoman.

Jisas na'i naloma ano'w nemata'w Samariai'wi

4 ¹Nemaf afamba amom Farisi dembami Judai mame' anif basef na'amba fa'i, "Jisas napisi' alipisi hiasi nikila' isimba Jon nagapisi'asi."^y

²Apa' Jisas ina napisi'as, owa'. Amom alipumi ananiami atom mapisi'as. ³Jisas ea' nogawa amom Farisi mame' basef ifimba. Ea' anen nakwaha itap apamba Judia notanima nafe' itap lu'upa Galili wapani. ⁴Ufia'w akwamba anen naila'w nagafi'i, kwafe' la'afena itap lu'upa Samaria.^z ⁵Ea'

q 3:26 Jo 19:11; 1 Ko 4:7; Hi 5:4 **r** 3:27 Jo 1:20,23; Mt 11:10 **s** 3:28 Mt 9:15 **t** 3:30 Jo 8:23; 1 Jo 4:5 **u** 3:31 Jo 3:11 **v** 3:33 Jo 1:32 **w** 3:34 Mt 11:27; Jo 5:20, 10:17 **x** 3:35 Jo 3:16-18; 1 Jo 5:12; Lu 3:7 **y** 4:1 Jo 3:22,26 **z** 4:4 Lu 9:52; Jen 33:19; Jos 24:32

nafe' nataga anambel wambel nagape Samariai taun inimba agiligima sa'i Sikar. Anamba nape felefele'ma Jekop fowa' nagaso'anap nogamana ananinai Josepa. ⁶Ifata sogola embelatai fowa' Jekop nagandowatai tape wambel ambalemba. Nogota atamba nemaf awin nandasapa'. Jisas nafi'i laogon na'amba napoma noma'w ifata atamba saga' embela.

⁷Ea' ano'w nemata'w Samariai'wi kwafi'i kwa'i kola embel, owa' Jisas natolo'w a' nahali'akwa kogaso'ana anambel embel. ⁸Apa' alipumi ananimi mafe' wambel lu'wambili ma mogatalai gwa'aisi.^a

⁹Ea' nemata'w akwamba kwa'ipana kwa'i, "Ina' Judainai, ina apa' atepa, owa'atin. Ae' nemata'w Samariaiwai. Dei' maina ina' nagahali'ima embel, 'Isi'ina embel nega' embel?"

Esis Juda ina sagaloma esis Samaria atogini, owa'atin. Esis naumbih.^b

¹⁰Ea' Jisas nagwama'wa basef ako'w na'i, "Ti ina' okom mopaina ma negawa anin mae fasifasini God na'i nogasi'inaniai, ina' a' negawa aman anamba nagahali'inai ma embeli, ina' nihali'anama anambel embel ambal namili lagapaimbeli anen a' nese'enambel."^c

¹¹Ea' kwa'ipana kwa'i, "Aman Dembinai, ifata ana'e launai nowala gani awin. Ina' baket akena ma negela embel. Dei' ina' nilai embel ambalemba ambal namili lagapaimbeli anima?^d ¹²Akunamapa ape'inai Jekop na' embelata nao'wa nogaopana ananisi saloma mafis bulmakau sipsip maim asasimi sa'ambelata. Dei' ea' nakwahota tapoma apa'. A'i ina' nikila' anen ama negese'apa embel ambal namili lagapaimbeli?"

¹³Jisas nagwama'wa basef na'i, "Epes mamahisa soga' embel ambalembai, bola iap pese'as wapani.^e ¹⁴Apa' epen ami nega' embel ambalemba ae' a'i igaso'anambeli, anin ina atiasi iap pese'an wapani ma nimaguf hiafi dondol negape, owa'atin. Embel ambalemba ae' agaso'anambeli atiasi begataga si'i embel bagataga dowafi bambul atapimbel bagapani ma nomon opaf ananifi nefa' ambal namili negape andeande' lifilafi."

¹⁵Ea' kwa'ipana kwa'i, "Dembinai, ina' se'e embel ambalemba ma ae' ina ata' iap pese'e itanima ifi'i na'a ma egela embel wapani, owa'."

¹⁶Ea' Jisas na'ipa'w na'i, "Ina' fo'o falai waulunamena nili' ea' pitanima pifi'i na'a."

¹⁷Ea' kwagwamana basef kwa'i, "Ae' aman ake."

Jisas na'ipa'w na'i, "Ina' na'i ina' aman akena, isimba ina' na'i endilisi atis. ¹⁸Dei' main? Ina' fowa' amam ine'imi wanom biam. Apa' aman anamba dei' ina' nape nagalomanai anamba ina aman ine'inai, owa'. Basef ifimba ine'ifi endilisifi."^f

a 4:8 Esr 4:1-5; Esr 9:1-10:44; Lu 9:52-53 **b** 4:9 Jo 4:26 **c** 4:10 Jo 7:37-38; Re 21:6
d 4:11 Jo 8:53 **e** 4:13 Jo 6:35 **f** 4:18 Diu 12:5-14; Sam 122:1-5; Jo 7:40, 9:17; 1 Ko 14:24-25

¹⁹⁻²⁰ Ea' kwa'ipana kwa'i, "Aman Dembinai, dei' ae' egawaena, ina' anina profet. Esis a'mes bafas ape'isi safe' sogonalo'ma halafuta anamba sanda' lotuma. Ea' ipa' Juda pa'i wambel esis sanda' lotuwagoma anamba napani Jerusalem."

²¹ Ea' Jisas na'ipa'w na'i, "Nemata'w, ina' nindahapifa ae'. Anef nemaf feगतaga ipa' ina atiasi pefe' penda' lotuma Ahame halafuta atamba, a penda' lotumana Jerusalem atogon, owa'atin.^g ²² Ipa' panda' lotuma hiahawes ipa' owa' pegegawasia. Apa' Juda manda' lotuma hiahawes apa' mogogawasi. Basef kofagefa ma apa' manda' lotu ifimba. God nowambilai amam nematawa ma nogakwaha waf awafi esis sanda'afi, amamba matagama apa' Juda atepa. ²³ Nemaf afamba fa'i figatagai, dei' fataga ea' ma amam nematawa mamahisa sanda' lotu endilisii a' sondanda' lotuma Ahamapa Goda Ambal bu'unai ananinai noloma waf bu'wafi endilisifi. Anen nowando'ma amam nematawa na'ambaisi ma sonda' lotumana.^h ²⁴ God anen ambal. Na'amba amam nematawa mamahisa si'i sonda' lotumana endilisii, esis a' sondanda' lotumana andeande'ma ukup peloma ambagof asasimi ma waf endilisifi."ⁱ

²⁵ Nemata'w akwamba kwagwamana basef kwa'i, "Ae' egawa aman anamba Mesaia sofalana saga'i Kraisi, God nandandepana nosapa'ana nugafi'ii. Afamba anen nugafi'i, nowalapam ni'ipapa hiahaom hiami."^j

²⁶ Ea' Jisas na'ipa'w na'i, "Ae' ea' ma'uwi, dei' a'i alomena."

Alipumi Jisasi motanima mafi'i

²⁷ Anen na'ipa ako'w na'amba, owa' alipumi ananiami motanima mafi'i. Ea' amom a' nomonas hiahawesa anen naloma nemata'w akwamba nalutu naga'i. Apa' amom ina anona nahali'ana na'i, "Ina' na'i nefa' main? Ama dei' naloma'w naga'i?" Owa'.

²⁸ Ama main, nemata'w akwamba kwa'waha baket kogola embelatai ta'oh, kotanima kwafe' taun wambel lu'wambili. Ea' kwa'ipa esis kwa'i, ²⁹ "Ipa' pifi'i piti anona aman nawalapai hiahaom hiami fowa' ae' anda'ami na'ipiam hi'alam. Anen Kraisi a'amon?"

Ea' esis same' na'amba, ³⁰ sakwaha wambel safi'i sati Jisas.

³¹ Owa' alipumi ananiami ma'ipana dindinip ma'i, "Ina' ata' nea' gwa'aisi."

³² Owa' anen na'ipam na'i, "Ae' anis gwa'aisi sa'oh, isimba ipa' owa' pegawasa."

³³ Ea' alipumi ananiami atom mape manifas ma'i, "A' anis sofa'manai anis gwa'aisi a'a?"^k

³⁴ Ama main Jisas nawalapaf na'ipam na'i, "Gwa'aisi ae'asi isimba. God nasapa'e afi'i. Dei' ae' a'i indaila okom ananiami atom enda' maol ananiami

g 4:21 2 Kin 17:29-41; Ais 2:3; Ro 9:4-5 h 4:23 2 Ko 3:17; Ro 12:1; Fl 3:3 i 4:24 Jo 1:41
j 4:25 Mk 14:61-62; Jo 9:37 k 4:33 Jo 6:38, 17:4

atin efe! imbifan hi'indalan. Maol inimba si'i gwa'aisi ae'asi.^l ³⁵Ipa' paga'ias pa'i, aomb biambibiamb ata' bape ma nogota atamba gwa'aisi sogaofatai togotaga. Apa' dei' ae' a'ipipa, ipa' ata' sa'ma naep petologon aof tulif. Gwa'aimi maof ea' ma sogala'am. ³⁶Epen ami negala' gwa'aisii, anin nefa' otamba ma maol inimba nanda'ani. Ea' nakolasa gwa'aisi isimba ambal namili lagapaisi sogape lifilafi. Ea' epes isimba sagawasi saloma anis daias sagala'asi sokolata sondagala atin. ³⁷Na'amba dei' basef gawaifi ifimba afataga endilisifi atif, 'Anin epen nawasogon aof afamba, ea' anin daian nafe' nala'as.'³⁸ Ae' asapa' ipa' pafe'ma pegala'i gwa'aisi aof afamba fowa' ipa' owa' penda' maolanafia. Anis epes sanda' maola aof afamba, ea' ipa' pefa' gwa'aisi dowafa esis daias sanda'as sagawasi.”

Esis Samaria hiasi sahapifa Jisas

³⁹Ako'w doko' kwa'i Jisas nawalapa hiahaom ako'w fowa' kwanda'ami, nawalapan na'ipa'wam alihim. Ea' esis Samaria amam nematawa hiasi sagape taun inimbai same' basefa ako'w asahapifana. ⁴⁰Ea' esis safi'mai anen sahali'ana dindinip sa'i ata' nope nogaloma esis. Ea' napani nimaguf bif nalomas wambel ambalemba. ⁴¹Ea' epes hiasi wapani wambel ambalembaisi same' basef ananifi sahapilif.^m ⁴²Ea' sa'ipa ako'w sa'i, “Dei' apa' ina mame' basef ine'ifi atif mahapilif, owa'atin. Apa' mame' basef aman anambai a' mogawa anen atona nowambilai amam nematawa hiasi itapasi mokwaha waf awafi asasifi sogotanimai.”ⁿ

Jisas nanda' anin awani anona aman nanda' maola kingi bo'wen

⁴³Nimaguf ifimba bif hi'alef, Jisas nakwaha wambel ambalemba a' nafe' itap lu'upa Galili.^o ⁴⁴Fowa' jisas anen atona nawalapa basef na'if na'i, “Anona profet ina anagol agol gatoma gandawalapana alihigila wambel kofagama ananima, owa'.”^p

⁴⁵Ea' dei' nafe' nataga itap apamba Galili, ea' esis asonahasa anen nagafi'i. Dei' main, esis fowa' safe' Jerusalema nemaf bu'wafi Pasovaefi ea' satolom sogawa hiahaom hiami anen nanda'am nemaf afambai.^q

⁴⁶⁻⁴⁷Anen notanima nafe' wapani nataga anambel wambel Kana itap lu'upa Galili. Wambel ambalemba fowa' nambema embel bagataga si'i waina. Ea' anona agilinai nanda' maola dembinai kingi, nogamana ananinai aowas nanda'ana na'oh anambel wambel Kaperneam felefele'ma a' nogaga'. Apa' agilinai anamba nape Kana name' basefa Jisas nakwaha itap lu'upa Judia nafi'i Galili, ea' nafe'ma Jisas nahali'ana dindinipa nefe' nonda' nogamana ananinai bo'ona.^r

⁴⁸Ea' Jisas na'ipana na'i, “I'i ipa' hipai pigati banagami mamimami si'i God nanda'amima, ipa' pihapifi. I'i owa', owa'atin.”

^l 4:34 Lu 10:2 ^m 4:41 1 Jo 4:14 ⁿ 4:42 Jo 4:40 ^o 4:43 Mt 13:57 ^p 4:44 Jo 2:23
^q 4:45 Jo 2:1-11; Mt 8:5-6 ^r 4:46-47 Jo 2:18; 1 Ko 1:22

⁴⁹Ea' anen nanda' maola dembinai kingi na'ipana na'i, "Dembina, ina' lianai kwafalis. Na'amba nogame ae'anai a' noga'."

Ea' Jisas na'ipana na'i, "Ina' fo'lo. Nogamena ine'inai atiasi a' nope namona ambal lopaona."^s

⁵⁰⁻⁵¹Ea' aman anamba nahapifa basef Jisasi a' nafe'. Anen ata' nafe' atin ufia'w owa', amom manda'mana maoli mafi'i matolona ufia'w ma'ipana ma'i, "Nogamena ine'inai ambal lapaona a' nosafel nape."

⁵²Ea' nahali'ama nogota mamahotama nogamana ananinai nosafel bo'ona kwasakwasala. Ea' ma'i, "Nambati' awin nendemba'a aowas alop nifipini nakwahona ea' hi'alan."^t

⁵³Ea' ahama awani inimbai a' nogawa nambati' nogota atamba atota Jisas na'ipana na'i, "Nogamena ine'inai ambal lopain nepe."

Ea' nahapifa Jisas naloma esis amam nematawa ananisi wapani.^u

⁵⁴Fowa' Jisas nakwaha itap lu'upa Judia a' nafe' nataga itap lu'upa Galili, ea' dei' nanda' ametal inimba banagani. Ametal inimba nagafe'ma bifi nanda' awani inimba bo'wen.

Jisas nanda' anona aman bo'ona anemb dumb Betesda

5 ¹Jisas nape Galili ma main, anef nemaf esis Juda sog'a' gwa'aisi lu'wasiafi ea' fataga. Ea' anen nondowasa' Jerusalem. ²Wambel ambalemba nomon felefele'ma uta lu'utai sipsip magawisatai anamba anemb dumb sa'usa'umbi betahagon. Agilimba esis sofalamb diga Hibrui sa'i Betesda. Dumb ambamba ambugufimba wa'owa'ol sala' ifagw sanda' ilalef wanelef bialef fape. ³Ilalef afalemba epes isimba hiasi aowas nanda'asi sape saloma isimba naep pagaso'asi saloma bo'wagahi lagof saga' sagailasi. [Esis sape sasasa embel pindawianama atina benda'as da'linda. ⁴Anif nimaguf anona ensel Dembinai Godi nakwehef nowala dumb ambamba nanda' embel banda'as wianaiwiana ea', dao'. Epen ami aowas nanda'ani nili' nefe' newala embel a' netaga bo'wen wapani.]

⁵Anona aman nape aowas lu'unai nanda'ana nape afagof hiagufi 38-pelaiguf. ⁶Ea' Jisas natolona tol na'oh ea' nogawa aman anamba awasina na'oh nogota laota a'owa'. Na'amba nahali'ana na'i, "Ina' na'i atiasi alop ine'ipi potaga bo'op, a'a owa'?"

⁷Ea' nagwamana basef na'i, "Aman dembinai, nemaf afamba embel banda'as wianaiwiana ina anis epes sasa'me salae ewala embel, owa'atin. Ae' atowe anda'am a'i efe' owa'a, anis daias sali' sowala sikila'e."^v

⁸Ea' Jisas na'ipana na'i, "Ina' safel dasa'ma nilutu nefa' alahis ine'isi a' nilutu nefe'."

⁹Ea' kwafalis atis alop ananipi ea' pataga bo'op andeande'. Na'amba anen bo'ona nosafel nalutu nasa'ma alahis ananisi ea' nafe'.^w ¹⁰Ea' amom

^s 4:49 Mt 8:13; Mk 7:29 ^t 4:52 Ap 16:14-15,31 ^u 4:53 Jo 2:11,23 ^v 5:7 Mt 9:6

^w 5:9 Jo 9:14; Nia 13:19; Jer 17:21; Lu 13:14

dembami esis Judai mati aman anamba aunai nasa'ma alahis ananisi nofa'as nalutu nafe' naep amamipi nemaf afamba sabat noma'wafi. Ea' mal'ipana ma'i, "Dei' nemaf apa' magapoma noma'wafi, mu'uli ape'ini na'i owa'i ma ina' nesa'ma alahis nefa'as negafe'a, owa'i."

¹¹Owa' anen nagwamama basef na'i, "Aman anamba nanda'e bu'uwai anen na'ipi na'i, 'Sa'ma alahis ine'isi a' nefa'as nefe!'"

¹²Ea' mahali'ana ma'i, "Aman mamahonama na'ipina na'i, 'Ina' sa'ma alahis ine'isi nefa'as nefe?'"

¹³Apa' aman anamba ina nogawa anen nanda'ana bu'unai, owa'atin. Dei' main? Jisas nafe' nandambaho' naloma amam nematawa hiasi wambel ambalembaisi.^x ¹⁴Ama main Jisas natolona ipat lu'unai Godi na'ipana na'i, "Neme!! Dei' ina' ambo'wena ea'. Ea' ina' owa'i nitanima nefe' nenda' waf awafi wapania, owa'. Na'amba hiahaom awami endilisi a' motagamena.

¹⁵Ea' nafe' na'ipa amom Juda na'i, "Aman anamba nanda'e bu'uwai anen Jisas."^y

¹⁶Ea' dei' amom Juda ukup numbutipa anen nanda' aman anamba awasinai nosafel nofa' alahis naga'ihisi nagafe' nemaf afamba sagapoma noma'wafi. Ea' dei' mosafel manda'mana waf awafi mowando'mana ma mogahana.^z ¹⁷Ea' Jisas nagwamama basef amom na'i, "Ahame ae'anai nanda' maol nafi'i notambel dei' nemaf afa'e sabat wapani. Ea' ae' wapani anda' maol si'i anen."^a

¹⁸Owa' amom Juda ukup panda'i atin a'owa' ma'i mohana nogaga'. Amom ma'i anen nosambala basefa mu'uli ma nemaf afamba sagapoma noma'wafi. Ea' Jisas na'ias wapani na'i God anen ahamana ananinai endilisi. Ea' amom ma'i anen na'i a' notaga nope na'amba atin si'i God. Isimba atis dei' mandaiwa'mana.^b

Nogamana Godi anen agol gatomana ma nanda' maol

¹⁹Ea' Jisas nagwamama basef amom na'i, "Ae' a'i endilisi atis a'lipa. Ae' Nogamana Godi ina la'ifiwai ma enda' anis maefaha okom ae'ami atom, owa'atin. Ae' anda' hiahawes isimba ati ahame nanda'asi, ea' isimba atis. Dei' main, hiahaom hiami ahame nanda'ami, amamba ae' Nogamana wapani dei' anda'am.^c ²⁰Ahame ae'anai a' okom maimaila ae' Nogamana a'owa' nihimba'me hiahaom hiami anen nanda'ami. Ma anaf nigihimba'me anin maol lu'wani nikila' amamba. Na'amba atiasi ipa' a' gogololasipa kwapete' ma maol inimba lu'wani.^d ²¹Ahame nagasa'ma esis sagaga'i sogosafel wapani ma nogaso'as ambal namili. Ea' dei' na'amba atin Nogamana ananiwai wapani ae' aso'as ambal namili

^x 5:13 Jo 8:11 ^y 5:15 Mt 12:14 ^z 5:16 Jo 9:4 ^a 5:17 Mt 26:4; Jo 7:1,30; Jo 10:30,33
^b 5:18 Jo 5:30, 8:28 ^c 5:19 Jo 3:35 ^d 5:20 Ro 4:17; Ef 2:5; Jo 11:25

epes ae' okom maga'iasi.^e ²² Ahame God ina nagawaloga anin epeni si'i sanda'mas koti sanda'as, owa'. Maol hiani ma nonda'masa kot, a' nase'ean ae' Nogamana hi'alan.^f ²³ Ama dei' esis amam nematawa hiasi sasa'ma agol ae' Nogamanai lu'wagol si'i sagasa'ma agol ahamai lu'wagol. Epen mamahina owa' negasa'ma agol ae' Nogamanai lu'wagola, epen inimba anin ina nasa'ma agol ahamai God nasapa' ae' agafi'ii lu'wagol, owa'atin.^g ²⁴ Endilisi atis ae' a'ipipa. Epen ami neme' basef ae'afi ma nihapifa anen nasapa' ae' agafi'ii, epen inimba anin ina a' nefa' basef lu'wafi ma kot, owa'atin. Anin a' nefa' ambal namili nikila' ga'.^h ²⁵ Endilisi atis ae' a'ipipa, nemaf afamba fa'i figatagai, dei' fataga ea' ma esis sagaga'i atiasi sogame' lagol ae'agili Nogamana Godi. Epes ami sogame' ae'i, atiasi asofa' ambal namili ma sogape bo'wes endilisi. ²⁶ Ambal namili lape ahame atona. Ea' nowa' banaga ae' Nogamana ananiwai ea' ae' wapani na'amba atin si'i anen ahame, ambal namili lapauwai,ⁱ ²⁷ ae' ataga epen egefa' alop epesi. Na'amba God nase'e agola hiahaom banagami ma egawaloga epesa kot basef lu'wafi.^j ²⁸⁻²⁹ Ipa' ina a' ukup hiahawep pepoma amamba, owa'i. Nemaf dondo'afi fi'i feगतaga amam nematawa hiasi saga' sawas sagape wandeledi anaf some' malogol ae'agili sosafel sokwaha wandeled suwisi ando'. Ea' epes ami sanda' waf fasifii, anaf sosafel wapani sofa' ambal namili sope namis. Apa' epes mamahisa sanda' waf awafii, anaf sotanima sosafel sefe' sulutu sonda' basef lu'wafi ma kot."^k

Anis epes sawalapa basef kofagefa sa'ifa Jisas

³⁰ Ea' Jisas na'ias na'i, "Ae' ina anda' anin mae ma okom ae'ami atom, owa'. Basef ae' agame'efa ahamai, ifimba atif ailif awalapefa esisa kot. Ea' basef ifimba ma kot ae'atai ifimba usi'if andeande'. Ae' ina anda'ama agaila nomonas ae'asi atis, owa'atin. Ae' anda' maol aila okom aman anamba nasapa'e agafi'ii.^l ³¹ I'i ae' atowe ewalapa basefa ae' atowe ai, na'amba ipa' api'i basef ifimba ae' aga'iefi ina endilisifi. Owa'atin. Pi'i basef baso'aifi.^m ³² Anen nape dei', nawalapa basefa ae'. Na'amba ae' dei' egawa basef ifimba faga'iasa ae'i endilisifi atif. ³³ Fowa' ipa' pasapa' basef fafe'mago Jon. Anen nawalapa basef endilisifi ma ae' ea'.ⁿ ³⁴ Na'amba dei' ae' ina efala anis epes itapasi ma sowalapa basefa ae' sogatopalope, owa'atin. Ae' a'i God nuwambilipai nokwahomepa waf awafi pitanima pifi'mai anen. Ea' dei' a'i basef ifimba. ³⁵ Aman anamba Jon si'i anin nagwapina nogogala'ma amam nematawa. Ea' ukup ipe'ipi pa'i aho'ma ipa' pendagala nogota atamba kwaia'uta ma mogogala'i amamba Joni.^o

e 5:21 Jo 3:17, 5:27; Jo 9:39; Ap 10:42 **f** 5:22 Fl 2:10-11; 1 Jo 2:23 **g** 5:23 Jo 3:15-18; Jo 8:51; 1 Jo 3:14 **h** 5:24 Mt 8:22; Ef 2:5-6 **i** 5:26 Jo 1:4, 5:22 **j** 5:27 Dan 12:2; Mt 16:27; Jo 6:40; Ap 24:15 **k** 5:28-29 Jo 5:19, 6:38 **l** 5:30 Jo 8:13-14 **m** 5:31 Jo 5:36-37; 1 Jo 5:9 **n** 5:33 Jo 1:19-34; Jo 3:27-30 **o** 5:35 Jo 3:2; Jo 10:25,38; Jo 14:11

³⁶Hiahaom amamba maol banagani ahame nase'ean na'i imafian enda'an hi'igalani, inimba atin ae' dei' anda'an. Inimba maol banagani nikila' maol Joni nagawalapa basef kofagefa ma ae'i. Ea' maol inimba ae' anda'ani nihimba'ma esis amam nematawa sogogawa Ahame nasapa'e dei' afi'i.^p ³⁷Ea' Ahame nasapa'e agafi'ii, anen atona nawalapa basef kofagefa ma ae'. Apa' fowa' gani pafi'i pataga dei' ipa' ina pati nogohnaep ananisi a pame' amalemba malogol ananigili, owa'atin endilisi. Ea' ipa' ina pati amaga ananigai, owa'.^q ³⁸Ea' basef ananifi wapani ifimba ina fape ukup ipe'ipi, owa'atin. Dei' main, ipa' owa' pihapifa ae' God nasapa'e agafi'ia.^r ³⁹Ukup ipe'ipi pandanda' paga'i basef ifimba fagape Buk Baibeli fagase'epa ambal namili ipe'i ma pegape andeande' lifilafi. Ea' pati basef ifimba pegawa ea' panda' maol pewando'ma basef ifimba hiafi. Dei' basef ifimba atif Baibelifi fa'i ae' fawalape. Owa', owa'atin. ⁴⁰Ipa' pandaiwama pifi'mai ae' pefa' ambal namili pegape andeande' lifilafi.

⁴¹"Ae' ina okom ma'i epes itapasi sogasa'ma agol ae'agili lu'wagol, owa'. ⁴²Apa' ae' ea' egawa ukup ipe'ipi ina paipaila God, owa'atin.^s ⁴³Ae' afi'i agol ahame ae'anai, apa' ipa' ina pase'e opalef ae', owa'atin. Apa' anaf anona aman daiana nogafi'i ma agol ananigili atogili, ipa' a' pi'i aho' pese'ana opalef anen.^t ⁴⁴Ukup ipe'ipi pa'i pendefa' agof lu'wagufi ma sahopepa owapepa ipe'imi atom. Apa' God owa'atin. Dei' ipa' atiasi pihapifi pi'imama? Owa'atin.^u ⁴⁵Ipa' ina a' ukup pendanda' pi'i atiasi ae' enda' kotimipa ma Ahame God, owa'atin. Aman nonda' kotima ipe'i, anen Moses, aman anamba ipa' pa'i atiasi nogatopalopipai.^v ⁴⁶Ipa' i'i pihapifa basef ananifi, ea' pihapifa basef ae'afi wapani. Dei' main, anen atona nanda' basef ifimba ma ae' fail Buk Baibel.^w ⁴⁷Apa' ipa' owa' pihapifa basef anen nanda'afi ma ae'a, owa'. Atiasi ipa' pihapifa basef ae'afi pi'imama? Owa'atin."

Jisas naso'asa gwa'aisi epes hiasi 5000-pelais sa'as

(Mt 14:13-21; Mk 6:30-44; Lu 9:10-17)

6 ¹Jisas nanda' basef ifimba ma main, a' nafe' nambo dumb ambamba Galili fisanamb. Dumb ambamba sa'i Taiberias. ²Ea' amam nematawa hiasi safi'mai anen. Dei' main, esis sati hiahaom amamba banagami anen nanda'am na'ambai ma nanda' isimba aowas naninani nanda'asi sagataga bo'wes. Ea' sailana.^x

³⁻⁴Nemaf afamba lu'wafi sanda' gwa'aisiafi saga'i Pasovaefi felefele' ma fegataga. Ea' nondowasa' halafuta atamba nao'wa alipumi anan mape.

⁵Jisas natologon ganigani nati amam nematawa hiasi safi'mai anen. Ea'

P 5:36 Mt 3:17; Jo 5:32, 8:18 **q 5:37** Jo 6:29 **r 5:38** Lu 24:27,44; Ap 13:27; 2 Ti 3:15-17;
 1 Pi 1:10-11 **s 5:42** Mt 24:5 **t 5:43** Jo 12:43 **u 5:44** Diu 31:26-27 **v 5:45** Diu 18:15;
 Ap 3:22 **w 5:46** Lu 16:31 **x 6:2** Jo 2:13

na'ipa Filip na'i, "Afa' ata' otala bret ani ma ogaso' amam nematawa isimba sog'ata?"

⁶Apa' Jisas nagwambana na'ias na'amba. Anen nogawas ea' hiahawes anen na'i nonda'asi.

⁷Ea' Filip nagwamana basef na'i, "Afa' i'i ogatala bret 200 kina, ina atiasi dondo'ma epes isimba hiasi sea'ata kwasakwasala, owa'atin."

⁸Ea' anona amom alipumi Jisasi Andru, Saimon Pita sahomana, na'ipa Jisas na'i, ⁹"Anona aman sa'unai nahapila anis gwa'aisi bret sa'usa'utai wa'agolita taloma agof sa'ugufi biagof nape na'a. Apa' isimba ina atiasi dondo'ma epes isimba hiasi, owa'atin."

¹⁰Anamba otalef fasilifi fagapoma. Ea' Jisas na'ipa alipumi na'i, "Kipa esis amam nematawa hiasi sope itap."

Ea' amam atom mataga 5,000-pelaim mape otalef itap. ¹¹Ea' Jisas nafela bret atamba nanifela God ama ea', naso'asata esis sagape itapi. Ea' nanda'as na'amba atina agof wapani. Naso'asas sa'as alihis dindi'i dondo' si'i doko' nolomagahas. ¹²Sa'as alihis ea', anen na'ipa alipumi ananiami na'i, "Ipa' petatama du'wawanis sagasaga'ih. Na'amba so'oh sowala dowadowaf."

¹³Esis sa'as safe' owa' du'wanis sa'oh. Ama main, alipumi mafe' matatama du'wa'wanisi malo'was folalef lu'walifi 12-pelailifa bret atamba.^y

¹⁴Ea' esis amam nematawa sati ametal inimba ma hiahaom banagami amamba Jisas nanda'ami sa'ias sa'i, "Endilisi atis, anen aman profet anamba nagafi'i itapapai."^z

¹⁵Ea' Jisas nogawa ukup asasipi sa'i sufi'i sohapilana sonda'ana notaga nope si'i anona dembinai kinga nugumafias. Owa', anen atona notanima nondowasa' halafuta ilif.

Jisas nalutu nafe' dumb embel ilif

(Mt 14:22-33; Mk 6:45-52)

¹⁶A'i owa' wambomota felefele'ma owamb, alipumi Jisasi ¹⁷malota bot mafe' dumb ambamba ma'i mombo Kaperneam. Ea' owamb baso'am la'afen, apa' Jisas ina dei' nafi'i natagamam, ata' owa'atin. ¹⁸Ea' fufin banagonai naluwi, naoh amohafel manda'am fetawa lasiali' a'owa'.

¹⁹Amom manda' pul mafe' nogota lautai si'i nohotagw wanogw, owa' mati Jisas analutu nafi'i embel ilif dumb ambamba nafi'i nataga felefele'ma bot tagafe'ma. Ea' amom ombel maham a'owa'. ²⁰Owa' Jisas na'ipam na'i, "Ipa' banagepa, ombal mogahepa owa'. Ae' atowe ma'uwi ailipa afi'i. Ipa' ina a' ombel mehepa, owa'i."

²¹Ea' ma'i aho'ma nondagai bot. Ea' bot atafe' kwafalis tataga tol anamba amom ma'i mogafe'ma.

²² Esis amam nematawa hiasi nambati' sagapani dumb fisanai, esis sogawa ea' sa'i, "Nambati' alipumi ananiami atom malota bot atamba a' mafe'. Apa' anen ina nafe' nalomam, owa'atin. Ina a' anota bot tail taloma atamba, owa'. Atotota tala."^a

²³ Ea' anogw botagw wapani Taibiriasigwi gwafi'i felefele'ma na'amba anen nape nanifela God nagaso'as gwa'aisima. ²⁴ Esis amam nematawa sati Jisas naloma alipumi ananiami amom ina ata' mape, owa'. Ea' safe' salota anogw botagw safe' Kaperneam solaoma Jisas.

Jisas anen gwa'aisi bret tagafi'i heveni

²⁵ Esis solaomana ma satolona gani wa'ol dumb ambamba fisanamb, sa'ipana sa'i, "Dembina'i Tisa, ina' nambai' nafi'i na'a?"^b

²⁶ Owa' Jisas nagwamasa basef na'i, "Ae' a'ipipa endilisi, ipa' ina ukup pandanda'ma banagami ae' anda'ami dei' pafi'i pa'i petolowe, owa'atin. Ipa' ukup papoma bret atota paga'atai ma nelelemb ipe'ilimbi si'ilimb, isimba atis dei' pala' pelaome pafi'i.^c ²⁷ Ipa' ina a' penda' maola pegefa' gwa'aisi isimba awasi folo'ogolasi, owa'i. Ipa' a' pendanda' maola gwa'aisi bu'wasi saga'asa sogape be'es andeande' lifilafii. Gwa'aisi isimba ambal namili lagape lifilafii. Gwa'aisi isimbai ae' ataga epen egefa' alop epesi, ae' atowe atiasi ese'epas ipa'. God a' nase'e agola nandandepe ea' ma enda' maol inimba lu'wani."

²⁸ Ea' sahali'ana sa'i "Dei' apa' monda' maol main ata' nili'ma monda' maol Godi?"^d

²⁹ Ea' Jisas nagwamasa basef na'i, "Maol Godi na'amba. Ipa' pihapifa ae', God nasapa'e agafi'ii."^e

³⁰ Ea' esis sa'ipana sa'i, "Ina' nihimba'mapa hiahaom maim banagami ma apa' mitilina mogahapifina? Ina' nanda' maol main?"^f ³¹ A'mesapa ape'isi fowa' sa' anis gwa'aisi agilisa sa'i mana ma itap apamba wafigima fataupigima si'i basef fagape Baibeli fa'ias faga'i, 'Anen naso'asai gwa'aisi sagafi'i heveni sa'as.'"

³² Ea' Jisas na'ipas na'i, "Endilisi atis ae' a'ipipa, Moses ina nase'epa gwa'aisi isimba sagafi'i heveni, owa'atin. Ahame ae'anai atona nasi'ipai gwa'aisi isimba endilisi. ³³ Gwa'aisi isimba God nagasi'ipasi isimba ae' akwaha ilif isila'i ma agaso'asa ambal namili esis amam nematawa hiasi sagape itapi."^g

³⁴ Ea' sa'ipana sa'i, "Dembina'i, dei' ina' nese'apa gwa'aisi isimba atapis sope lifilafi."^h

³⁵ Ea' Jisas na'ipas na'i, "Ae' atowe ae' gwa'aisi bret ambal namili bu'wali lagapauwai. Epen ami nigafi'mai ae'i ina atiasi nolomohan, a epen

a 6:22 Jo 6:11 **b** 6:25 Jo 6:11-12 **c** 6:26 Jo 4:14; Jo 6:48-58 **d** 6:28 1 Jo 3:23

e 6:29 Mt 16:1; Jo 2:18 **f** 6:30 Eks 16:14-15; Nam 11:7-9; Sam 78:24 **g** 6:33 Jo 4:15

h 6:34 Jo 4:14; Jo 6:48-58

mamahina nigahapifa ae'i, anin ina atiasi iap pese'an wapani ma embel, owa'atin.ⁱ ³⁶ Ae' a'ipipa, ipa' patolowe ea' apa' ipa' ina pahapifa basef bu'wafi ae'afi, owa'.^j ³⁷ Epes mamahisa ahame nagase'eas ae'i, isimba atis asifi'mai ae'. Epen ami ni'i nigafi'mai ae'i, ae' ina atiasi ili'amonan, owa'atin endilisi.^k ³⁸ Ae' ina akwaha heven isila'i ma igaila okom ae'ami atom, owa'atin. Ae' afi'lma igaila basefa okom ananiami nasapa'e agafi'ii.^l ³⁹ Okom aman anamba nasapa'e agafi'ii magape na'amba. Esis amam nematawa hiasi anen a' nagase'eas ae'i, ae' ina ekwaha anin atitin nepe higililan lamonan, owa'atin. Ae' egasa'mas wapani nemaf akutaifi.^m ⁴⁰ Okom ahame ae'anai magape na'amba. Amam nematawa hiasi mamahisa siti ae' ma sogame' basef ae'afii ma sogahapifai, esis isimba atiasi sofa' ambal namili sogape andeande' lifilafii. Ea' esa'mas wapani nemaf akutaifi.”

⁴¹ Ea' anen na'i, “Ae' atowe gwa'aisi akwaha heven agafi'ii.”

Anen na'ias na'amba, owa' esis Juda sanda' megahahana sa'i basef hiafi ma anen.ⁿ ⁴² Esis sa'ias na'amba sa'i, “Dei' si'i main? Aman anamba Jisas anen Josep nogamana. Ahamanai ma'mana ananisi apa' mogawas. Dei' maina anen naga'i, ‘Ae' akwaha heven isila'i?’ ”

⁴³ Jisas nagwamasa basef esis na'i, “Ipa' ina a' pi'i basef hiahaof la'afena ipa'.^o ⁴⁴ Anin epen ina la'ifina anin atin nigafi'mai ae' dowaf, owa'atin. Ahame nasapa'e dei' afi'i, anen i'i nogasa'ma nomonas anin epeni, dao'. Epen inimba atiasi a' nifi'mai ae', ea' anaf ae' esa'man wapani nemaf akutaifi.^p ⁴⁵ Basef amom profet maga'iefi fagape Buk Baibeli faga'i na'amba fa'i, ‘God anaf nuwalipa amam nematawa hiasi.’

Amam nematawa hiasi hi'ilas sogame' basef ahame ae'anai ma sogogawa anini, esis isimba sogafi'mai ae'i.^q

⁴⁶ “Ina anin epen atitin nati ahame, owa'. Fowa' ae' ape agaloma Goda agafi'ii, ea' ae' atowe atolona.^r ⁴⁷ Ae' a'ipipa endilisi atis. Epen ami neme' basef ae'afi nihapifi, anin dei' nefa' ambal namili nepe andeande' lifilafi.^s

⁴⁸ Ae' gwa'aisi bret ambal namili lagapauwai. ⁴⁹ Fowa' a'mesepa ipe'isi sa' gwa'aisi isimba mana itap anamba wafigima fataupigima, dei' asaga' safe' ea'. ⁵⁰ Apa' gwa'aisi isimba dei' sakwaha heven sagafi'i isimba na'amba. I'i epen ami nega'asi, anin ina atiasi a' nega', owa'atin. Nepe atapin.

⁵¹ Ae' gwa'aisi ambal namili lagapauwai akwaha heven nepe andeande' lifilafi. Gwa'aisi isimba ae' atiasi igasi'inasi, isimba alop ae'api ese' amam nematawa itapasi ma sogofa' ambal namili sogape andeande' lifilafi.”

⁵² Ea' amom dembami Juda ma'i basef mehip mandahihianama Jisas la'afena amom atom ma'i, “Dei' si'i maina aman anamba na'i nogaso'apa alop ananipi apa' moga'ap?”

i 6:35 Jo 20:29 **j** 6:36 Jo 17:6-8; Mt 11:28 **k** 6:37 Mt 26:39; Jo 4:34 **l** 6:38 Jo 10:28-29; Jo 17:12 **m** 6:39 Jo 11:24 **n** 6:41 Mt 13:55 **o** 6:43 Jo 6:65 **p** 6:44 Ais 54:13
q 6:45 Jo 1:18 **r** 6:46 Jo 3:15-16 **s** 6:47 Jo 6:31,58

⁵³ Ea' Jisas na'ipam na'i, "Ae' a'ipipa endilisi atis, ae' ataga epen egefa' alop epesi. I'i ipa' pindaiwa'ma pega' alopi esimbel ae'asima, ipa' ina atiasi pefa' ambal namili, owa'atin. ⁵⁴Epen ami nega' alopi esimbel ae'asii, inimba dei' a' nefa' ambal namili negape andeande' lifilafi dondoli ea' esa'man wapani nemaf akutaifi. ⁵⁵Dei' main? Alop ae'api si'i gwa'aisi endilisisi, ea' esimbel ae'ambeli endilisimbeli ma sogas. ⁵⁶Epen ami nega' alopi asimbel ae'asii, anin a' nepe sisihin neloma ae', ea' ae' epe sisihwi eloman.^t ⁵⁷Ahame ambal namili lagapaunai nasapa'e sisihwi afi'i, ea' ae' dei' ape ambal namili ahamai. Ea' na'amba atina epen ami nega' alop ae'apii, anin atiasi a' nefa' ambal namili ma banagami ae'ami. ⁵⁸Gwa'aisi isimba sakwaha heven sigisila'i, isimba ina sa'ata ma ea' sagasagafi'i, owa'atin. Epen mamahina nega' gwa'aisi isimbai, anin atiasi a' nefa' ambal namili ma negape lifilafi dondoli."

⁵⁹ Jisas na'ipam na'amba, nawalipam nomon ipat esis Juda sandakolasatai wambel Kaperneam.

Basefa apa' mogape ambal namili lifilafi dondol

⁶⁰ Anis alipisi Jisasi hiasi same' basef ifimba ea' sa'i, "Basef ifimba ahihifa apa'. Atiasi ami nilif? Owa' owa'atin."

⁶¹ Jisas nogawa alipisi ananisi sanda' migimigah. Ea' na'ipas na'i, "Basef ifimba fa'i fehambombaga ukup ipe'ipi a'a?^u ⁶²I'i ipa' piti ae' ataga epen egefa' alop epesi itanima ilita gani ilif fowa' agapanima, atiasi agogolalasipa kwapete'epa.^v ⁶³Ambal bu'unai Godi atiasi nese'epa ambal namili pepe andeande' lifilafi dondol. Apa' wafi gawa epesi atis ina asotopalopepa, owa'atin. Basef ifimba atif ae' aga'iefi, ifimba ambal namili lagapaifi fegape andeande' lifilafii.^w ⁶⁴Apa' anipa ina pahapifa basef ae'afi, owa'."

Dei' main? Jisas fowa' nogawa ami owa' nogahapifanaia ma atiasi ni'ipa boumi nigihimba'mama anen nagapoma.^x

⁶⁵ Ea' na'ipas wapani na'i, "Ae' a'ipipa ma ami nigafi'mai ae'i, ahame ae'anai a' notopalopan nohondo'ani. I'i owa', owa'atin. Ina anis sifi'mai ae' dowaf, owa'. Ahame atona notopalopas nofa'asi, dao' andeande'."

⁶⁶ Ea' dei' anis alipisi ananisi hiasi asakwahona sotanima safe' daindai, ina ata' sape salomana wapani, a'owa'.

⁶⁷ Ea' Jisas nahali' alipumi ananiami 12-pelaim na'i, "Ipa' wapani pa'i pekwaha ae' pitanima pefe', a'amon?"

⁶⁸ Owa' Saimon Pita nagwamana basef na'i, "Dembinai, afa' okwaha ina' ofe' ugi'ma ami? Basef ine'ifi atif fa'ipafa ma ogape ambal namili

^t 6:56 Jo 15:4-5; 1 Jo 3:24 ^u 6:61 Jo 3:13; Ap 1:9-11 ^v 6:62 2 Ko 3:6 ^w 6:63 Jo 13:11
^x 6:64 Jo 6:44

andeande' lifilafi.^y ⁶⁹Afa' wahapifina ogawa endilisi ina' aman Godi bu'winai hilili'i, nasapa'ena nagafi'ii."

⁷⁰Jisas nagwamama basef na'ipam na'i, "Ae' andandepa ipa' 12-pelaipa ea' ae'ipai owa' anona ipe'inai ambal aunai."

⁷¹Jisas na'i anona amamunai amom 12-pelaim agilinama Judas, anen Saimon Keriotinai nogamana.

Amom owapana Jisasi ina mahapifana, owa'

7 ¹Ama main, Jisas nafe' nolalona walemb hiagoma itap lu'upa Galili. Anom Juda dembami asasimi magape Judai ma'i mohana noga'. Na'amba anen ina ata' nape itap asasipi, owa'. Anen nape Galili atogon.^z ²Ea' felefele' ma anef nemaf esis Juda sanda' anis gwa'aisi lu'wasi ma ukup pegapoma esis sondolalima God. Ea' sala' aolah sa'uhi sapaoha sanda' gwa'aisi isimba. ³Ea' owapana Jisasi ma'ipana ma'i, "Ina' nekwaha na'a'e a' nefe' itap lu'upa Judia, ma alipisi sigati maol banagani ine'ini si'i God nanda'ani. ⁴I'i anona aman ni'i epes hiasi sogogawa maol ananini, anen ina nondambaho' nonda'an, owa'. Ina' ea' na'amba atin, nekwaha wambel ine'imbili nefe'ma epes hiasi sitilina sigati maol ine'ini ma sogasa'ma agol ine'igili lu'wagol."^a

⁵Owapana ananiami wapani amom ina mahapifana, owa'. Ea' dei' ma'ipana basef ifimbai.^b

⁶Ea' Jisas na'ipam na'i, "Nimaguf hiafi ipe'ifi atif, apa' nemaf ae'afi dondo'afi ina dei' afataga, ata' owa'. Nogota ae'atai totaga dao', a' efe' Jerusalem.^c ⁷Ae' awalapa waf awafi esis sagape itapi sanda'afi. Ea' dei' esis ukup awepa ae'. Apa' esis ina la'ifisa ukup awepa ipa', owa'atin.

⁸Ipa' pili' pendowasa' pefe'ma gwa'aisi isimba. Ae' ota'. Dei' ae' ina a' endowasa', ata' owa'. Dei' main, nogota ae'atai ata' owa' totagaia."

⁹Anen na'ipam na'amba ma ea', ata' napani Galili.

Jisas nafe'ma nigati gwa'aisi isimba lu'wasi gani Jerusalem

¹⁰Ea' owapana Jisasi mondowasa' mafe' Jerusalem ma gwa'aisi isimba lu'wasi. Amom mali' mafe', anen wapani nagil'mam nondowasa'ma gwa'aisi isimba. Apa' anen ina nafe' nandawalap, owa'atin. Anen nandambaho' atin nafe'.^d ¹¹Anamba sanda' gwa'aisi amom dembami Juda mape naep petaoma Jisas. Ea' mahali' esis ma'i, "Aman anamba nape ani?"

¹²Amam nematawa hiasi esis atis sanda'ipama anen sa'osa'ombel sa'i, "Anen aman bu'unai."

Apa' anis sa'i, "Owa', anen nagambaso'ma epes hasii."^e

Y 6:68 Mt 14:33, 16:16; Mk 1:24; Jo 1:49 z 7:1 Lev 23:34; Jo 5:18 a 7:4 Mt 13:55; Ap 1:14 b 7:5 Jo 2:4 c 7:6 Jo 15:18 d 7:10 Jo 11:56 e 7:12 Jo 9:22, 12:42; Jo 19:38, 20:19

¹³ Apa' ina anin epen nawalapa basef na'if alihifa Jisas, owa'atin. Dei' main, esis hiasi ombel mahasa amom agufumi esis Judai. ¹⁴ Nemaf afamba esis ata' sape sanda' gwa'aisi isimba atin, Jisas nafi'i nawis ipat lu'unai Godi nawalipasa basef esis.^f ¹⁵ Amom agufumi Judai bombolalasom a'owa' mahali'as ma'i, "Ami naso'ana gawa inimba?"^g

¹⁶ Ea' Jisas nagwamam na'ipam na'i, "Gawa inimba ina gawa ae'ani, owa'. Gawa anona amani nasapa'e agafi'ii. ¹⁷ I'i anin epen okom mi'ii nenda' maol Godi si'i anen naga'iani, atiasi epen inimba a' negawa basef ae' agawalipasafi fataga God a'a fataga ae' atowe.^h ¹⁸ Ami niga'ipasa gawa ananini atini, anin na'i esis sogasa'ma agol ananigili lu'wagol. Apa' ami ni'ii nenda' maola negasa'ma agol anen nasapa'e agafi'ii, anin epen bo'wen hilili'ii. Anin na'i basef endilisi'ifi atif.ⁱ ¹⁹ Moses nase'epa mu'uli Godi ipa', apa' owa' anin epen nila mu'uli inimbaia, owa'atin. Dei' maina ipa' pa'i pehe egaga?"^j

²⁰ Ea' esis amam nematawa hiasi sagwamana basef sa'ipana sa'i, "Ambal aunai napaina. Dei' ina' na'i, ami na'i nehena nega?"^k

²¹ Jisas na'ipas na'i, "Ae' anda' anom hiahaom banagami atifim. Ea' dei' ipa' gogolalasipa.^l ²² Apa' ipa' patopa'mam alop nogaopepa ipe'imi nemaf afamba sapat sagapoma noma'wafi. Dei' main? Ipa' pagi'ma mu'uli inimba fowa' God nagaso' Mosesani. Moses atona ina nali' nanda' waf afamba owa'. Dambadamba waf afamba fali' fapoma amom agufumi Judai fowa'imi magali'ii.^m ²³ Ipa' patopa'mam alop nogaopepa nemaf afamba sapat ama ipa' ina pewala mu'uli inimba God nagaso' Mosesani. Na'amba ipa' pa'i andeande'ma pagatopa'mam alop nogaopepai. Dei' maina ipa' ukup numbutipa ae' ma anda' anona aman bo'ona andeande' nemaf afamba sapat?ⁿ ²⁴ Ipa' owa'i pewaloga hiahawes penda'as hi'ihis' naep atip dowafa, owa'. Ipa' pewalogas ukup ipe'ipi ma waf usi'ifi atefa pegegawa waf asasifi be'ef a'a awef."^o

Esis sandahahali'ma sa'i Jisas anen Kraiss, God nasapa'ana a'a owa'?

²⁵ Anis Juda sagape Jerusalemi same' basef ifimba ananifi sahali'as sa'i, "Anen ea' ma'una anamba dembami ape'imi ma'i mohana nogaga'i, a'a owa'?" ²⁶ Anen nape nawalipasa basef alihigima apa' amom agufumi ina magwamana anif basef, owa'. Isimba endilisi a'amon? Amom mogawa aman anamba Kraiss, God nandandepana nasapa'ana nagafil'ii, a'a owa'?"^p ²⁷ Apa' mogawa aman anamba nataga itap ape'ipi. Apa' anaf owagama Kraiss nogafil'ii, ina anin epen negawa Kraiss anaf nogatagama, owa'."^q

f 7:14 Mt 13:54; Lu 2:47 g 7:15 Jo 12:49, 14:10 h 7:17 Jo 5:44, 8:50 i 7:18 Ap 7:53; Ro 2:21-24 j 7:19 Jo 8:48,52; Jo 10:20 k 7:20 Jo 5:16 l 7:21 Lev 12:3; Jen 17:9-13 m 7:22 Jo 5:8-10,16 n 7:23 Lev 19:15; Ais 11:3-4; Jo 8:15 o 7:24 Jo 5:18 p 7:26 Jo 7:41, 9:29 q 7:27 Mt 11:27; Jo 8:55

²⁸ Ea' Jisas ata' nape ipat lu'unai Godi nawalipas na'i mehip na'i, "Ipa' pegawa ae' endilisi apegawa ae' agatagama wambel kofagama. Apa' ae' ina afi'i dowaf aila okom ae'ami atom, owa'. Anen nasapa'e agafi'ii endilisinai. Ipa' ina pegawana, owa'. ²⁹ Apa' ae' egawana. Dei' main, fowa' ae' alomana wape atogon ea' anen nasapa'e afi'i."r

³⁰ Esis same' basef ifimba ananifi, opalef awalefa anen sa'i sofa'ana sonda'mana basef sonda' kotimana, owa' owa'atin. Dei' main, nemaf afamba nogaga'afi ina fataga, ata' owa'.s

³¹ Epes hiasi same'anana dowaf apa' anis sahapifana sa'i, "Nemaf afamba Kraisi nonda' maol banagani. Maol Kraisi a' nikila' maol aman anamba nanda'ani?"

Amom masapa' anom plisman mafi'i ma mogowa' Jisas

³² Amom Farisi mame' esis amam nematawa hiasi sa'i basef fafafi ma Jisas. Ea' amom pris dembami maloma amom Farisi masapa' anom plisman amamumi mafi'i mogowa'ana. ^t ³³ Ea' Jisas na'ipas na'i, "Ae' ina ata' elomewa epe nogota laota, owa'atin. Ae' epe nogota bandata ea' itanima efe'ma anen nasapa'e agafi'ii. ^u ³⁴ Ipa' atiasi pelaoma ae' pefe', owa'atin. Gani ae' atiasi igapanima, ipa' ina la'ifipa pefe'agono, owa'."r

³⁵ Ea' amom Juda atom manda'ipama ma'i, "Aman anamba na'i nefe' anima ma afa' ogolaomana? Anen atiasi nefe'ma esis Juda afa'isi saloma Grik a'amon?"

³⁶ Ea' na'i, 'Ipa' pewando'ma ae' apa' ina atiasi petolowe, owa'. Ea' na'ias wapani na'i, 'Ipa' ina la'ifipa piti ae' egapoma, owa'. Basef ifimba kofagefa mamahifa?"v

³⁷ Owa' nemaf afamba akutaifi lu'wafi ma esis Juda sonda' gwa'aisi isimba, Jisas nalutu na'i dindinip na'i, "Epen ami iap pese'an nifi'mai ae' nea' embel. ^w ³⁸ Epen ami nihapifa ae' si'i basef fagail Buk Baibeli fa'ias faga'i, 'Ami nigahapifa ae'i, atiasi embel ambal namili lagapaimbeli bitagai okom ananiami nomon a kolo' atin biwisi ando'. ^x"

³⁹ Basef Jisasi kofagefa fa'i Ambal bu'unai Godi anaf nope nogaloma esis sogahapifanai ukup asasipi nomon. Nemaf afamba Ambal bu'unai Godi ina' dei' nawis anis epes sagahapifanai, ata' owa'. Dei' main, Jisas ata' owa' noga' nosafel wapani nofa' agol lu'wagilima mogogala'i ananiamia, ata' owa'.y

Esis amam nematawa sandawal mini'ap biafip

⁴⁰ Ea' anis amam nematawa same' basef ifimba sa'i, "Endilisi, aman anamba anen dembinai Profet apa' mape mogahafanai."z

r 7:29 Jo 7:44, 8:20; Jo 13:1 s 7:30 Jo 2:23, 8:30; Jo 10:42, 11:45; Jo 12:11,42

t 7:32 Jo 13:33 u 7:33 Jo 8:21, 13:36; Jo 17:24 v 7:36 Lev 23:36; Ais 55:1; Jo 4:10,14

w 7:37 Ais 58:11; Sek 14:8 x 7:38 Jo 16:7, 20:22; Ap 2:4 y 7:39 Jo 6:14 z 7:40 Jo 1:46, 4:29

⁴¹Apa' anis daias sa'i, "Dei' Kraiis nataga itap lu'upa Galili, a'a owa'? Owa'atin.^a ⁴²Basef fagail Baibeli faga'i na'amba fa'i, 'Kraiss owagama notaga wambota Deviti wambel Betlehem, Devit fowa' nagapoma.'^b

⁴³Ea' esis amam nematawa sandawal mini'ap biafipa Jisas. Anis sa'i anen Kraiss, apa' anis sa'i, "Owa'."^c ⁴⁴Ea' anis sa'i sofa'ana nefe'ma kot, apa' owa'. Ina anis sando lagof sahapilana, owa'.^d

Agufumi esis Judai owa' mohapifa Jisasa

⁴⁵Ea' plisman amamba motanima mafe'ma amom pris dembami maloma amom dembami Farisi magapoma. Ea' dembami amamba mahali' plisman ma'i, "Dei' maina ipa' owa' pewa' Jisas pefa'ana pifi'ia?"^e

⁴⁶Owa' amom ma'i, "Fowa' gani nafi'i nafi'i nataga dei' owa' anin epen newalapa basef si'i anen naga'iefia, owa'."

⁴⁷Amom Farisi magwamama basef ma'i, "Anen nambaso'mepa wapani, a'amon?^f ⁴⁸⁻⁴⁹Ina anona dembinai a'a anona Farisi nahapifana, owa'atin. Apa' amam nematawa isimba hiasi, ina sogawa mu'uli Godi, owa'. Isimba atis anaf God nogwamasa waf awafi esis sanda'afi."^g

⁵⁰⁻⁵¹Nikodemas fowa' nagafe'ma Jisasi, anen dembinai naloma amom dembami Farisi, nahali'am na'i, "Afa' andeande'ma onda' waf awafi ma aman anamba a'a owa'atin? Mu'uli afa'ini naga'i na'amba na'i, afa' uli' uhali'ana ma ogogawa waf ananifi feloma maol ananini, ma main dao', afa' a' wi'i anif basef."^h

⁵²⁻⁵³Amom ma'ipana ma'i, "Ina' wapani Galilina'i a'a? Owa'atin. Ina' ata' niti basef fagail Buk Baibeli ea' nitalifif. Ama atiasi negegawa ina anona profet nataga itap lu'upa Galili, owa'atin."

Nemata'w kwanda' so'a wauli kwawala waf sandaso'amaifi

8 ¹[Amam amamba hiami mafe' ifagw amamigwi, apa' Jisas nondowasa' nafe' halafuta Oliv.ⁱ ²Ea' a'i owa' kuhumbita atota notanima nafe' ipat lu'unai Godi. Esis amam nematawa hiasi safi'mai anen ea' nape nawalipasa basef. ³Ea' amom dembami magawalipasa mu'uli Godi maloma amom Farisi mati ano'w nemata'w kwanda' so'a waol kwaloma anona aman kwa'oh mao'wakw mafi'i. Ea' ma'ipa'w kwalutu la'afena amom hiami matolo'w. ⁴Ea' ma'ipa' Jisas ma'i, "Dembinai tisa, nemata'w akwamba afa' watolo'w kwaloma anona aman kwanda' so'a waola waf awafi.^j ⁵Mu'uli God nagaso' Mosesani na'ipafa na'i afa' okwaha otamba oha nematawa wanda' waf afambai ogaga'. Ina' okom mape ma'imama?"^k

a 7:41 Sam 89:3-4; Mai 5:2; Mt 2:5-6 **b** 7:42 Jo 9:16 **c** 7:43 Jo 7:30 **d** 7:44 Jo 7:32

e 7:45 Mk 1:22 **f** 7:47 Jo 12:42 **g** 7:48-49 Jo 3:1-2; Diu 1:16 **h** 7:50-51 Jo 7:41-42

i 8:1 Lu 21:37 **j** 8:4 Lev 20:10; Diu 22:22-24 **k** 8:5 Mt 22:15

⁶Amom ma'li mogwambana i'li anen owa' nogwamoma basef andeande'a, monda' kotimana. Owa', Jisas nasisil notawa nanda' faf ananifi nanda' anif basef fail itap.^l

⁷Amom malutu mahali'ana ma basef hiafi, ea' nosafel nalutu na'ipam na'i, "Ipa' ami owa' penda' waf awafia, ipa' pili' pekwaha otam peha ako'w."^m

⁸⁻⁹Ea' anen nasisil wapani nanda' anif basef fail itap. Amom mati basef ifimba matalifif, ea' mandaumb atona atin motanima mafe'. Amom hagami mali' mafe' ea' sa'umi magi' mafe'. Mafe' atona atin makwaha ako'w kwaloma Jisas atis sape.

¹⁰Ea' Jisas nosafel nalutu nahali'akw na'i, "Dei' amam amamba mape ani? Owa' anona aman ni'i nonda' kotima ina'a?"ⁿ

¹¹Ako'w kwa'ipana kwa'i, "Dembina, owa'. A' mafe' hi'alam."

Ea' na'ipa'w na'i, "Ae' na'amba atin si'i amom. Ae' ina anda' kotimina, owa'. Ina' fo'o, apa' ina netanima nenda' waf awafi wapani, owa'i."^o

Jisas anen si'i nagwapin nogogala'ma amam nematawa sagape itapi

¹²Ea' Jisas na'ipa amam nematawa wapani na'i, "Ae' si'i mogogala'i fasimi egala'ma ipa' hipai pagape itapi. Epen ami nila ae' anin ina atiasi nefe' akota ufia'w anani'wi, owa'. Anin nepe nogogala'i ambal namili lopain."

¹³Amom dembami Farisi ma'ipana ma'i, "Dei' ina' nanda'i basefa ina' atina. Na'amba afa' ina ohapifina, owa'. Basef ine'ifi ina endilisifi, owa'atin."^p

¹⁴Jisas nagwamam basef na'i, "Ae' a'ipasa basefa ae'. Ea' dei' basef ifimba ae'afi endilisifi atif. Dei' main, ae' a' egawa ae' ataga agafi'ima ea' egawa anamba anaf egafe'ma. Apa' ipa' ina pegawa anamba ae' ataga agafi'ima, anaf egafe'ma, owa'.^q ¹⁵Ipa' pawaloga epes si'i epes sagape itapi sagawalogs. Apa' ae' owa'. Ae' ina ewaloga anin epen, owa'.^r ¹⁶I'i ae' egawaloga anis epes, ae' ewalogs andeande' endilisi. Dei' main? Ina ae' atowe ape, owa'. Ae' ape aloma ahame nasapa'e agafi'ii. Na'amba afa' biafa wawalogs andeande' endilisi.^s ¹⁷Anif basef fagail mu'uli ipe'ini fa'i, 'I'i anom amam biam muga'i basef atifif, basef ifimba amamifi endilisifi atif.'^t ¹⁸Basef ifimba ma ae' afa' biafa wa'if, ae' aloma Ahame ae'anai nasapa'e agafi'ii."^u

¹⁹Ea' amom mahali'ana ma'i, "Ahamena ine'inai nape ani?"

l 8:6 Diu 17:7 **m** 8:7 Mt 22:22 **n** 8:10 Jo 5:14 **o** 8:11 Ais 49:6; Jo 1:4-9, 9:5; Jo 12:46
p 8:13 Jo 5:31-32; Jo 7:28, 9:29 **q** 8:14 Jo 7:24, 12:47 **r** 8:15 Jo 5:30, 8:29 **s** 8:16 Diu 17:6, 19:15 **t** 8:17 1 Jo 5:9 **u** 8:18 Jo 14:7

Jisas nagwamamef na'i, "Ipa' ina pegawa ae', ea' ipa' ina' pegawa ahame ae'anai wapani. I'i ipa' pegawa ae'ai, ipa' pegawa ahame ae'anai wapani. Owa' owa'atin."^v

²⁰Jisas ata' nawalapa basef ananifi nomon ipat lu'unai Godi ma rum sagambe' otamba moni sanda' ofaeni naga'oma. Apa' ina anona aman nafe' nombalo'ana nofa'ana ma kot, owa'. Dei' main, nogota ananitasi ata' owa' totagaia."^w

Ipa' ina atiasi la'ifipa ma pegafo'o anamba ae' egafe'ma

²¹Jisas na'ipam wapani na'i, "Ae' a' efe'. Apa' ipa' ina atiasi petolowe, owa'. Ipa' atiasi pepe a pega' ma waf awafi ipe'ifi. Dei' main, anamba ae' egafe'ma, ipa' ina atiasi la'ifipa pefe'agono, owa'."^x

²²Ea' amom Juda manda'ipama ma'i, "Anen na'i nefe' ani, ma afa' ina la'ififa ogafe'a? Dei' maina anen naga'i na'amba? Anen na'i nondaha anen atona a'a?"^y

²³Ea' Jisas nagwamam na'i, "Ipa' pagape itapi. Apa' ae' agape ilifi. Walemb ipe'ilimbi itap apa'e, apa' ae' owa'. ²⁴Ae' a'ipipa ea'. Atiasi ipa' pega' waf awafi ipe'ifi ata' atapif fipaipa. I'i ipa' owa' pihapifa ae', aman God nasapa'e agafi'ia, atiasi ipa' pegaga' waf awafi ipe'ifi atapif fepaipa."^z
²⁵⁻²⁶Amom mahali'ana ma'i, "Ina' aman mamahinama?"

Owa' Jisas nagwamamef na'i, "Si'i fowa' aga'ipipa. Ae' la'ifiwai ma iga'ipipa basef hiafi ipa' ma enda' kotimipa ma basef hiafi ifimba aga'ipipafi. Apa' anen nasapa'e agafi'ii, anen endilisinai. Basef ananifi ae' ame'ef ea' a'ipipaef ipa' pagape itapi."

²⁷Amom ina mogawa anen naga'ipama ahamana ananinai, owa'."^a

²⁸Ea' Jisas na'ipam na'i, "Namanani ipa' pesa'ma anen nataga epen nogofa' alop epesi pendelona nil lawag usi'igai ti'waenagai ilif. Nemaf afamba a' pegawa basef ifimba fa'i ae' atowe ea' ma'uwi si'i ali' aga'ipipa. Ea' pegawa ae' ina anda' maol ae' atowe aga'iani, owa'. Basef Ahame nagawalipiefi, ifimba atif a'if a'ipipaef."^b ²⁹Anen nasapa'e agafi'ii nape nalome. Anen ina nakwahowe ae' atowe ape, owa'. Dei' main, dondol ae' anda' maol okom ananiami maga'iani."^c

³⁰Jisas ata' na'ipam atin, owa' hiasi sahapifana.

Basef endilisifi atiasi fenda' ipa' petaga wahifipa

³¹Ea' Jisas na'ipa esis Juda sagahapifanai na'i, "I'i ipa' pihapifa basef ae'afi pigi'mif, ipa' alipipai endilisi. ³²Ea' ipa' atiasi pegawa basef endilisifi ea' ifimba atif fetagwahepa pepe wahifipa."^d

^v 8:19 Jo 7:30 ^w 8:20 Jo 7:34,36; Jo 13:33 ^x 8:21 Jo 7:35 ^y 8:22 Jo 3:31 ^z 8:24 Jo 7:28, 12:49 ^a 8:27 Jo 3:14, 5:19 ^b 8:28 Jo 8:16, 16:32 ^c 8:29 Jo 7:31 ^d 8:32 Mt 3:9

³³Owa' esis sagwamana basef sa'i, "Apa' akupana Abrahami. Apa' ina agof akapa mape lafela anis epes, owa'atin. Dei' maina ina' na'ipapa naga'i basef endilisifi fatagwahepa magape wahifipa?"^e

³⁴Jisas nagwamas basef na'i, "Endilisi ae' a'ipipa, epen ami nape nanda' waf awafii, waf afambai fewa'an si'i agol akani nagape lafela anis epesi. ³⁵Epen inimba agol akani ina nape andeande' ipat nomon dondol, owa'. Apa' Nogamana endilisi dao'. Anen nape ipat atamba nomon dondol. ³⁶I'i ae' Nogamana ananiwai etagwahipa panda' waf awafi fagawasi'ipa sisihipai, atiasi pepe andeande' wahifipa endilisi.^f ³⁷Ae' egawa ipa' wambota Abrahami. Apa' ipa' pa'i pehe ega'. Dei' main, basef ifimba ae'afi ina fape nomonas ipe'isi, owa'. ³⁸Ae' awalapa basef ifimba gawafi ma hiahawes ae' aloma ahame ae'anai wagatilisi, ea' a'ipipa basef ifimba, apa' owa' ipa' panda'am si'i pagame' ahamepa ipe'inai naga'ipipa."

Ahamepa ipe'inai anen Satan^g

³⁹⁻⁴⁰Esis Juda sagwamana basef sa'i, "Ahamape ape'inai Abraham."

Ea' Jisas na'i, "Ti ipa' Abraham batawisanaiai, ipa' a' penda' maol Abrahami. Owa', owa'atin. Ipa' pa'i dindinipa pehe ega'. Ae' a'ipipa basef endilisifi atif ame' God naga'ipiefi. Abraham ina nanda' waf afambai si'i ipa' pa'i pehe ega', owa'atin.^h ⁴¹Ipa' panda' waf ahamepa ipe'inai nanda'afi."

Esis sagwamana basef sa'i, "Mamamape ape'iwai ina wanda' so'a waol olapa, owa'. Ahamape ape'inai God atotona."ⁱ

⁴²Jisas na'ipas na'i, "Ti God ahamepa ipe'inaiai, ukup ipe'ipi pipila ae'. Ina ae' atowe ela okom afi'i, owa'atin. Ahame nasapa'e afi'i ape na'a^j ⁴³Dei' maina ipa' owa' peme' basef ae'afia? Ipa' ina la'ifipama pegame' basef ae' aga'iefi, owa'.

⁴⁴"Ipa' si'i ahamepa ipe'inai naga'iani. Fowa' dambadamba nafi'i nafi'i nataga dei', anen naha epes sagaga'i, ea' nowa' alafugama basef endilisifi. Nomonas ananisi ina sapoma basef endilisifi, owa'. Anen nambaso'mas nimaguf hiafi dondol lifilafi. Basef baso'aifi anen naga'iefi, ifimba ananifi atif fagataga okom ananiami atumi. ⁴⁵Apa' ae' a'ipipa basef endilisifi atif. Isimba atis dei' pandaiwa'ma pigahapifi.^k ⁴⁶Ipa' epen mamahina nagape la'afena ipe'i banagena negawalapa anef waf awafi atetef ae' anda'afi? Owa'atin. Apa' i'i ae' iga'ipipa basef endilisifi, dei' maina ipa' owa' pihapifia?^l ⁴⁷Epes Godi same' basef ananifi. Apa' ipa' ina epes Godi, owa'. Ipa' anipa daipa. Na'amba ipa' owa' peme' basef ananifia."^m

Jisas na'i, "Fowa' Abraham ata' owa' notagaia ae' ali' ape."

⁴⁸Esis Juda sagwamana basef sa'i, "Apa' ma'i endilisi ina' Samariainai bounai ape'inai ea' ambal aunai napaina."

e 8:33 Ro 6:16,20; 2 Pi 2:19 **f** 8:36 Jo 5:18 **g** 8:38 Mt 3:9 **h** 8:39-40 Diu 32:6; Ais 63:16, 64:8 **i** 8:41 1 Jo 5:1; Jo 16:28 **j** 8:42 Ro 8:7; 1 Jo 3:8 **k** 8:45 2 Ko 5:21; 1 Pi 2:22; 1 Jo 3:5 **l** 8:46 Jo 18:37; 1 Jo 4:6 **m** 8:47 Mk 3:21-22; Jo 7:20

⁴⁹Jisas na'i, "Ae' ambal aunai owa'atin. Apa' ae' asa'ma agol Ahame ae'anai ea' ipa' pataloga agol ae'agili.ⁿ ⁵⁰Ae' ina anda' maola anis sogasa'ma agol ae'igili lu'wagol, owa'. Apa' anona dembinai nanda' maol inimba, ma anis daias sogasa'ma agol ae'agili, dembinai anamba Ahame nape jasa ae'.^o ⁵¹Ae' a'ipipa basef endilisifi atif. Epen ami nihapifa basef ae'afi nilif, anin ina atiasi nega', owa'. A' nepe lifilafi dondol."

⁵²Esis Juda same' basef ifimba sa'i, "Dei' apa' magawa ina' ambal aunai nape nomonas ine'isi. Abraham fowa' a' naga' ea' amom profet fowa'imi wapani a' maga'. Owa' ina' na'i, epen ami nihapifa basef ine'ifi anin ina nega', owa'."^p

⁵³Ea' sahali'ana wapani sa'i, "Ina' a' nikila' ahamapa ape'inai Abraham? Anen naga' ea' amom profet wapani a' maga'. Apa' ina' na'i ina' atina aman mamahinama?"^q

⁵⁴⁻⁵⁵Jisas nagwa basef na'amba na'i, "I'i ae' esa'ma agol ae'agili lu'wagilai, agol ae'agili wafigil si'i basef wafifi. Apa' Ahame ipa' paga'i God ipe'inai, anen nasa'ma agol ae'igili lu'wagol. Apa' ipa' ina pegawana, owa'. Ae' atowe egawana. I'i ae' i'i owa' igawanaia, ae' aga'i basef baso'ami si'i ipa' pagambaso'am. Owa' owa'atin. Ae' egawana aila basef ananifi.

⁵⁶"Abraham akunamepa ipe'inai, anen a' nandagala ma nogati nogota ae'atai owagama totagata, si'i nagati ae' ma sonagahana endilisi."

⁵⁷Esis Juda sa'ipana sa'i, "Afagof ine'igufi ata' owa' 50-pelaigufa, ina' na'i a' nati Abraham?"^r

⁵⁸Jisas nagwamas na'ipas na'i, "Ae' a'ipipa endilisi, fowa' gani Abraham ma'mana ata' owa' kolanaea, ae' ali' ape."^s

⁵⁹Ea' esis same' basef ananifi, ea' amom Juda mafe' masa'mai otamba ma'i mokwahemba mohana owa', Jisas nandabaho' nawisi nakwaha ipat lu'unai Godi nafe'.

Anona aman naep pagaso'anai Jisas nanda'ana bo'ona

9 ¹Jisas nafe' ufia'w ea' nati anona aman naep pagaso'anai. Fowa' ma'mana kogolana naep paso'ana nape na'amba atin atapina.^t

²Alipumi ananiami mahali'ana ma'i, "Dembinai tisa, dei' maina aman anamba naep pagaso'ana? Anen nanda' waf awafi a'a esis mamasana sanda' waf awafi solana?"^u

³Jisas na'ipam na'i, "Kofagema ma anen naep pagaso'ana ina mamasana sanda' waf awafi a'a anen nanda' waf awafi, owa'. Anen naep

n 8:49 Jo 5:41 **o** 8:50 Jo 5:24; Jo 6:40,47 **p** 8:52 Jo 4:12 **q** 8:53 Jo 7:28-

29 **r** 8:57 Jo 1:1; Eks 3:14, 6:3 **s** 8:58 Jo 10:31 **t** 9:1 Eks 20:5; Esi 18:20; Lu 13:2,4

u 9:2 Jo 11:4

paso'ana ma maol Godi negataga lu'win. Isimba atis dei' naep paso'ana.^v
⁴Dei' ea' alip, nogota apa' monda' maola anen nasapa'e agafi'ii. Owamb bogataga ina atiasi anis epes sonda' maol, owa'atin.^w ⁵Ae' ata' egape itap apa'e ipe'ipi, ae' si'i nagwapin nogogala'i ipe'iwai ipa' hipai pagape itapi.”^x

⁶Jisas na'ipam na'amba, ea' nisi'wafa apah itap nagwindisah haloma itap. Ea' nasomana naep aman anamba.^y ⁷Ea' na'ipana na'i, “Ina' nefe' nesa'opa naep embel dumb amamba Siloam.” Basef kofagefa ma agol agalemba ifimba fa'i, nasapa'ana.

Ea' aman anamba nafe' nasa'opa naep ananipi, ma ata' notanimai atin owa', naep patiana andeande' bo'ona.

⁸Esis wambel atembel saloma anis fowa' sati anen nagape ufia'w nandailasa otamba gwa'aisi maini sahali'as sa'i, “Anen aman anamba ma'una fowa' nape ufia'w nandailasa gwa'aisii?”

⁹Ea' anis sa'i, “Anen ma'una.”

Apa' anis sa'i, “Owa'. Anona daiana anamba. Apa amaga ananigai si'i anen.”

Apa' aman anamba fowa' naep pagaso'anai na'i, “Ae' ma'uwi.”

¹⁰Ea' esis sahali'ana sa'i, “Ina' nanda' maina dei' nagati andeande'?”

¹¹Anen nagwamas na'i, “Anona aman agol ananigili Jisas nanda' itap paloma apah ananihi nambemam nanda'meam naep ae'api. Ea' na'ipi na'i, ‘Ina' nefe' nesa'of dumb Siloam.’ Ea' afa' asa'of ea' naep apati.”

¹²Ea' sahali'ana sa'i, “Aman anamba nape ani?”

Ea' na'ipas na'i, “Ae' ina egawa nagapoma, owa'.”

Amom Farisi mahali'asa aman anamba fowa' naep pagaso'anai

¹³Esis sao'wa aman anamba fowa' naep pagaso'anai safe'ma amom dembami Farisi.^z ¹⁴Nemaf afamba esis sagapoma noma'wafi sabat, afamba atef Jisas nanda' itap Paloma apah nambemam nanda'manam naep ananipi, ea' naep patiana.

¹⁵Ea' amom Farisi mahali'ana wapani ma'i, “Anen nanda'mena maina dei' naep pagati?”

Aman anamba nagwamam na'i, “Anen nanda' itap paloma apah ananihi nanda'meam naep ae'api, ea' afa' asa'opa naep ea' dei' apati.”^a

¹⁶Ea' anom Farisi ma'i, “Aman anamba ina nagima mu'uli ma nemaf afamba sabat, owa'. Ea' anen ina aman Godi, owa'atin.”

Owa' anom Farisi daiam ma'i, “Anona aman nanda' waf awafii ina la'ifina nonda' maol banagani si'i God nanda'ani, owa'atin.”

Ea' amom Farisi mandawal biafim.^b

^v 9:3 Jo 5:17,20; Jo 11:9, 12:35 ^w 9:4 Mt 5:14; Jo 8:12 ^x 9:5 Mk 8:23 ^y 9:6 2 Kin 5:10
^z 9:13 Lu 13:14 ^a 9:15 Jo 3:2, 7:43; Jo 9:31-33 ^b 9:16 Jo 4:19

¹⁷Ea' mahali' aman anamba fowa' naep pagaso'anai ma'i, "Ina' negawana na'imama? Waf ananifi mamahefa? Aman anamba nanda' naep ine'ipi pagatii."

Aman anamba na'i, "Anen anona profet."

¹⁸Endilisi aman anamba fowa' naep pagaso'anai dei' patiana. Apa' amom dembami esis Judai ina mahapifana ma'i endilisi, owa'. Ea' mofalai mamasana ananisi safi'i mahali'as.

¹⁹Ea' mahali'as ma'i, "Aman anamba nogamepa ipe'inai a'a owa'? Aman anamba ipa' pa'i naep ananipi pagaso'anai fowa' ma'mana kogolana? Dei' anen nati andeande' na'imama?"

²⁰Esis mamasana sagwamam basef sa'i, "Afa' ogawa anen nogamafa afa'inai. Ea' ogawa fowa' ma'mana kogolana naep paso'ana. ²¹Apa' afa' ina ogawa dei' anen nagati, nati andeande' na'imama. Ami nanda' naep ananipi patiana, afa' ina ogawa. Anen dambena ea', afa' wa'i ipa' pihali'ana nonda'ipipa."^c

²²Esis mamasana ananisi ombal mahasa amom agufumi Judai. Ea' dei' sa'ias na'amba. Dei' main, amom agufumi ma'i basef ea' ma'i, epen ami ni'i basefa Jisas niga'i anen Kraisi, amom a' mili'amonana ipat esis Juda sandakolasatai ma ina nenda' lotu nelomas wapani, owa'.

²³Amom ma'ias na'amba dei' mamasana ananisi ombal mahas sa'i, "Anen dambena ea'. Pihali'ana nonda'ipipa."^d

²⁴Amom mofalai aman anamba wapani ma'ipana ma'i, "Ina' ni'i basef endilisifi atif, God natilina. Afa' ogawa aman anamba Jisas, anen aman aunai."

²⁵Anen nagwamam na'i, "Ae' ina egawa waf ananifi awafi, a'a owa'. Apa' ae' egawa endilisi atis, fowa' naep ae'api pase'e apa' dei' owa', ati andeande'."

²⁶Ea' mahali'ana ma'i, "Anen nanda'mena maina dei' nanda' naep ine'ipi pagati?"

²⁷Anen nagwamamef na'i, "Doko' ae' a'ipipa ea', apa' ipa' ina pame'e, owa'. Dei' maina pa'i pegame' basef ifimba wapani? Ipa' wapani pa'i petaga alipipai ananipai pilana?"

²⁸Owa' amom ma'i basef wandafifi ma anen ma'i, "Ina' aman alipunai ananinai. Apa' afa' alipufai Mosesi.^e ²⁹Afa' ogawa God fowa' na'ipa Moses ea' apa' aman anamba afa' ina ogawa waf kofagefa ananifi anen nataga ani?"

³⁰Anen nagwamamef na'i, "Amamba hiahaom maim? Ipa' ina pegawa anen nataga ani, apa' anen nanda' naep ae'api pati.^f ³¹Apa' mogawa God ina name' esis sanda' waf awafii, owa'. Anen name' epen ami nanda' maol ananini nagasa'ma agol ananigili ma negame' basef ananifi. ³²Fowa' gani nafi'i nafi'i nataga dei' ina anif basef fa'i anona aman ma'mana

c 9:21 Jo 7:13 **d** 9:23 Jos 7:19 **e** 9:28 Jo 8:14 **f** 9:30 Sam 34:15; Sam 66:18; Ais 1:15; Pro 15:29

kolana ea' nataga naep paso'ana ma anef nemaf anona aman daiana nonda' naep pigatiana, owa'atin.^g ³³I'i aman anamba ina aman Godiai, anen ina atiasi nonda' anis maefah, owa', owa'atin. Anen aman Godi.”^h

³⁴Amom magwamana basef ma'i, “Endilisi, fowa' ma'mena kogolaena ina' nanda' waf awafi atef. Ea' ina a' niwalipafa, owa'i.”

Ea' amom mali'amonana ipat atamba esis Juda sandakolasatai ina ata nolomas nonda' lotu wapani, a' owa'.

Naep pagape opalef nomoni apaso'

³⁵Ea' Jisas name' basefa amom mali'amonana nape ando' nowando'mana natolona nahali'ana na'i, “Ina' nahapifa aman anamba nataga epen nogofa' alop epesi, a'a owa'?”

³⁶Aman anamba nahali'ana na'i, “Dembina, aman anamba ami? Ni'ipiana ma igahapifana.”ⁱ

³⁷Ea' Jisas na'ipana na'i, “Dei' ina' natolona ea'. Anen epen anamba dei' na'i nagalomanai.”

³⁸Ea' na'i, “Dembina, dei' ahapifina.”

Na'ias na'amba ea', nindiwa nembawa notawa itap nanifelona nasa'ma agol ananigili.^j

³⁹Jisas na'i, “Ae' afi'i itap apa'e ma ewaloga epes hiasi hi'igalas. Ama esis naep pagaso'asi atiasi sogati andeande' a isimba naep pagatiasi ea' naep pese'as.”^k

⁴⁰Anom Farisi mape malomana mame' basef ifimba mahali'ana ma'i, “Ifimba basef maif? Ina' na'i afa' naep paso'afa wapani a'amon?”^l

⁴¹Jisas na'ipam na'i, “Ti' ipa' naep pese'epa ai, ipa' waf awafi akepa. Apa' owa', owa'atin. Ipa' apa'i, 'Afa' wagtii.' Na'amba waf awafi ipe'ifi ata' fapomepa.”

Basef waminif atina indaleleb sipsipi

10 ¹Jisas na'i, “Endilisi ae' a'ipipa, epen ami owa' nusi' uta indaleleb sipsipia ma anin nelota niwisi anagon daiagona, epen inimba nanda' wali. ²Apa' epen inimba usi'ini nigawisi utai, anin nigimafi sipsipi. ³Aman nugumafi utai nawisi'man uta ma nugumafi sipsip. Amom sipsip mame' malogol ananigili. Nofala agofa sipsip ananiami, ea' nao'wam mawisi ando'.^m ⁴Nao'wa sipsip ananiami hiami mawisi ando' hi'alam ea' nali' nafe', amom magi'mana. Dei' main? Amom mogawa malogol ananigili. ⁵Apa' sipsip ina magi'ma anona daiana, owa'. Na'amba mondafa'mana a' mofa' mefe' atona biana. Dei' main? Amom ina mogawa malogol ananigili, owa'.”ⁿ

⁶Ea' Jisas na'ipasa basef waminif atin na'amba, apa' esis ina sogawa basef kofagefa, owa'atin.

g 9:32 Jo 9:16 **h** 9:33 Sam 51:5; Jo 9:2 **i** 9:36 Jo 4:26 **j** 9:38 Jo 3:17; Jo 8:15-16; Mt 13:11-15 **k** 9:39 Mt 15:14, 23:26 **l** 9:40 Jo 15:22 **m** 10:3 Jo 10:27 **n** 10:5 Jo 16:25

Jisas aman bu'unai nugumafi sipsipi

⁷Ea' Jisas na'lipas wapani na'i, "Endilisi ae' a'lipipa, ae' si'i uta sipsip mugawisatai.^o ⁸Amom fowa' mugumafi sipsipi, hiami manda' wali apa' sipsip ina mame' malogof amamugufi, owa'.^p ⁹Ae' si'i uta, epen ami niwisi ae' nomon, God nuwambilai anin nokwahoman waf awafi nepe andeande'. Anin nifi'i niwisi niwis nepe netaga nefe' nefa' gwa'aisi bu'wasi. ¹⁰Amom manda' wali mafi'i ma monda' wal mohas sog'a' mogahambombagas. Apa' ae' afi'i ma ipa' pegape andeande' ambal lopaipa endilisi a'owa'.^q ¹¹Ae' aman bu'uwai igimafi sipsipi, a'i aho' ma egaga' ma egatopalopa sipsip igimafiami.^r ¹²I'i anona aman nonda' kontrak dowafi ma nugumafi sipsip amambai, anen okom mi'i nogofa' otamba atembai, anen ina atiasi numafi sipsip andeande', owa'. Anen ina aman endilisi nugumafi sipsipi, owa'. Ea' nemaf mamahefa niti nombagw gwagail alupi gugafi'i, a' ombal mohana nokwaha sipsip atom mulutu nofa' nefe'. Ea' nombagw agwamba guwis goha sipsip mofa' mefe' atona biana. ¹³Aman anamba nanda' maola otamba atembai, anen nandaiwa'ma nugumafi sipsip amamba andeande', owa'. Ea' atiasi niti nombagw agwamba a' ombal mohana nofa' nefe'.^s

¹⁴"Ae' aman bu'uwai igimafi sipsip andeande'i. Ae' egawa sipsip ae'ami a sipsip mogawa ae' wapani.^t ¹⁵Ea' na'amba atin ahame ae'anai nogawa ae', ae' egawa anen. Ae' a'i aho'ma ega' egatopalopa sipsip ae'ami.^u ¹⁶Ae' anom sipsip daiam malutumi. Apa' amom ina mulutu nomon indalelemb ambalemba, owa'. Amom magalutu indalelemb anagon daiagini. Ae' okom ma'iam a'owa' anef nemaf a' efa'am mifi'i meme' malogol ae'igili ekolasom mulutu indalelemb atelemb ae' atowe imafiam.^v ¹⁷Ae' a'i aho'ma egaga' ma atiasi esafel egape namowe wapani. Isimba atis ahame ae'anai okom maimaili a'owa'.^w ¹⁸Ina anona aman noha ambal ae'ali ega', owa'atin. Okom ae'ami atom ma'i aho'ma atiasi egaga'. Ae' efa' agol lu'wagili ma ega' egesafel wapani. Agol agalemba ahame atona nase'eagol."^x

¹⁹⁻²⁰Esis Juda same' basef ifimba ea' esis sandatopa' biafis. Hiasi sa'i, "Ambagof awami mapaona ea' nahaga nagaol a'owa'. Dei' maina ipa' pagame' malogol ananigili?"

²¹Apa' anis daias sa'i, "Anona aman ambagof awami magapaunai ina na'i anif basef si'i anen naga'iefi, owa'. Anona aman ambagof awami magapaunai ai, ina la'ifinama nonda' aman anamba naep pagaso'anai nogati wapani, owa'atin."

^o 10:7 Jer 23:1-2; Esi 34:2-3 ^p 10:8 Sam 118:20; Jo 14:6 ^q 10:10 Sam 23:1, Re 7:17

^r 10:11 Ap 20:29 ^s 10:13 Jo 10:27; 2 Ti 2:19 ^t 10:14 Mt 11:27; Jo 15:13; 1 Jo 3:16

^u 10:15 Ais 56:8; Jo 11:52; 1 Pi 2:25; Esi 34:23; Esi 37:24 ^v 10:16 Fl 2:8-9 ^w 10:17 Jo 5:26, 14:31; Jo 19:11 ^x 10:18 Jo 7:43; Jo 7:20, 8:48

Esis Juda sanda' naumbih saloma Jisas

²²⁻²³Nogota atamba asaf atef fagalatama esis Juda sanda' anis gwa'aisi lu'wasi ma ukup pagapoma fowa' gani sagawisi ipat Godi. Ea' Jisas nafe' nomon ipat lu'unai Godi ilafunama sale'w fowa' Solomon nanda'akwi.^y
²⁴Ea' amom Juda mafi'i malutu malipana ma'i, “Nimaguf mamahifa ina' nenda' opalef afa'ilifi fetaga nomonas biafis? I'i ina' Kraisai, ni'ipafa basef alihif.”^z

²⁵Jisas nagwamam na'i, “Ae' a'ipipa ea', apa' ipa' ina ukup pehafel pahapifi, owa'. Ae' anda' hiahaom banagami ma agol ahamai, amamba mihimba'mepa ae' epen mamahowema.^a ²⁶Apa' ipa' ina sipsip ae'ipai, owa'. Ipa' anipa daipa. Na'amba dei' ipa' ina pahapifa ae', owa'.^b ²⁷Sipsip ae'ami mame' malogol ae'agili ea' egawam mame' basef ae'afi maili.^c
²⁸Ae' egaso'am ambal namili ma mogape andeande' dondol lifilafi. Amom ina moga', owa'atin. Ina anin epen la'ifina netagwahom lagof ae'agufi negefa'am, owa'atin endilisi. Amom mope lagof ae'agufi atapim dondol lifilafi.

²⁹“Ahame ae'anai nase'e epes isimba ae'asi. Ina anin epen atiasi la'ifina nitagwahis lagol ahamai negefa'as, owa'atin. Dei' main, ahame ae'anai banagonai a'owa' nikila' epes hiasi hi'alas. ³⁰Ae' aloma ahame, afa' biafa wape atotofa.”^d

³¹Ea' amom Juda mafe' mofa'i otamba wapani ma'i mokwahemba mohana afuna.

³²Apa Jisas na'ipam na'i, “Ae' ihimba'mepa maol bu'wani hiami nagataga Ahamai ea' patilin. Apa' ukup ipe'ipi papoma maol mamahina anda'ani ma dei' pa'i pekwaha otamba pegahe?”^e

³³Amam Juda magwamana ma'i, “Afa' ina wakwaha otamba wa'i ohena ma anin maol bu'wani, owa'. Ina' aman falafunai nanda' findiwa, na'i ina' atina God. Ea' afa' wa'i ohena otamba.”^f

³⁴Jisas nagwamam na'i, “Anif basef fagail mu'uli ipe'ini fa'ias fa'i, 'Ae' a'ipipa ea' a'i, ipa' si'i anom god daiam.’^g ³⁵⁻³⁶Fowa' basef Godi fafe'ma epes isimba fa'i, 'God na'i ipa' si'i anom god daiam.’ Basef ifimba ina fenalo, owa'. Fape atapif fandawalap endilisi. Ahame ae'anai atona nosahe'e nanda'e ape hilili' ananiwai atowe nasapa'e afi'i itap apa'e enda' maol ananini. Ea' a'i ae' Nogamana ananiwai. Dei' maina ipa' paga'i, ae' anda' God findiwana?’ ³⁷I'i ae' ina anda' maol Ahame ae'anaiai, dao' andeande'ma ipa' pindaiwa' ma pigahapifi.^h ³⁸Apa' ae'

y 10:22-23 Ap 3:11, 5:12; Lu 22:67 **z** 10:24 Jo 4:26, 5:36; Jo 10:38 **a** 10:25 Jo 6:64, 8:45 **b** 10:26 Jo 8:47, 10:3 **c** 10:27 Jo 3:16, 6:39; Jo 18:9 **d** 10:30 Jo 8:59
e 10:32 Lev 24:16; Mt 26:65; Jo 5:18 **f** 10:33 Sam 82:6 **g** 10:34 Mt 5:18 **h** 10:37 Jo 14:10-11

anda' maol ananini ma i'i ipa' owa' pihapifia, hapaimi. Ipa' piti maol atin ae'ani pegawa Ahame nape nalome, ae' ape alomana.”ⁱ

³⁹Ea' amom ma'i mombalo'ana ma mogowa'ana. Owa', owa'atin. Anen nakwaha amom a' nafe'.^j

⁴⁰Jisas notanima natopa' walemb Jordan nambo fisana nafe' nataga anamba fowa' dambadamba Jon nagapisi'asa nape na'amba. ⁴¹Ea' amam nematawa hiasi safi'mai anen. Esis sa'i, “Jon owa' nonda' anin maol banagania, apa' basef ananifi hiafi naga'ifa Jisasi, ifimba endilisiifi atif.”^k

⁴²Ea' amam nematawa hiasi sahapifa Jisas na'amba.

Lasarus naga' ea'

11 ¹⁻²Anona aman aowas nanda'anai agol ananigili Lasarus. Anen naloma hanitiamana ananiwai biawa, Maria kwaloma Marta sape wambel ambalemba Betani. Maria akwamba fowa' kwagakolo'wa sanda balaga Dembinaii ma kwanda' auf balaga ako'ugai kwagandisamana bo'wagah ananigahi.^l ³Ea' awo wasapa' basef fafe'ma Jisas wa'i, “Dembinai, aman anamba ina' okom magamagailanai a' awasina na'oh.”^m

⁴Ea' Jisas name' basef ifimba na'i, “Aowas inimba ina natagamana ma nogaga', owa'. Aowas inimba natagamana ma esis sogasa'ma agol ae' Nogamana Godi, a sogasa'ma agol ananigili wapani.”

⁵Ea' Jisas okom maimaila Marta kwaloma owama'w Maria waloma Lasarus. ⁶Anen name' basefa Lasarus awasina, apa' anen ata' napani nimaguf bif wapani wambel ambalemba nagapanima. ⁷Nimaguf bif fafe'ma ea', na'ipa alipumi ananiami na'i, “Afa' dei' a' otanima ofe' itap lu'upa Judia.”ⁿ

⁸Ea' alipumi ananiami magwamana ma'i, “Dembinai tisa, nimbewa' esis Juda sa'i sokwaha otamba sehena afina, apa' dei' ina' na'i netanima nefe' anamba wapani, a'amon?”^o

⁹Ea' Jisas nagwamam na'i, “Nemaf atetef awa 12-pelain nape. Epen ami nagafe' alipi anin ina newa, owa'. Dei' main, anin nati hauguma itap apa'e howalagon nafe' andeande'.^p ¹⁰Apa' i'i anin negafe' owambi, atiasi a' newa. Dei' main? Anin nagwapin nogogala'i akan.”^q

¹¹Jisas na'ipam na'amba ma ea', na'ipam wapani na'i, “Alipunai afa'inai Lasarus anen na'oh. Ae' atiasi efe' ganimba itap Judia ma iginimbalona.”

¹²Ea' alipumi ananiami magwamana basef ma'i, “Dembinai, i'i anen no'oh atinai, dao' atiasi ambo'ona.”

i 10:38 Lu 4:30; Jo 8:59 j 10:39 Jo 1:28 k 10:41 Jo 7:31 l 11:1-2 Jo 11:36; Lu 10:38-39; Jo 12:3 m 11:3 Jo 9:3, 11:40 n 11:7 Jo 8:59 o 11:8 Jo 9:4-5 p 11:9 1 Jo 2:11 q 11:10 Mt 9:24

¹³Doko' Jisas nali' naga'ipam na'i Lasarus naga'oh, fa'i Lasarus a' naga' endilisi. Apa' alipumi ananiami ukup pa'i anen ata' na'oh dowaf.

¹⁴Dei' Jisas na'ipam alihif na'i, "Lasarus a' naga' ea' endilisi. ¹⁵Ae' sonahe ma ae' ina alomana wape atogon nemaf anen nagaga'afi. Ama ipa' atiasi pigahapifa ae'. Dei' afa' ofe'ma anen."r

¹⁶Ea' Tomas agol wa'agol Didimas na'ipa alipumi Jisasi daiam na'i, "Afa' ofe' wapani ma oga' ogaloma anen."

**Kofagama epes sagaga' sogosafel wapani ma
sogofa' ambal namili ea' Jisas atona**

¹⁷Lasarus naga' a' sawana. Nimaguf bifibif fafe' ea', Jisas a' nafi'i nataga. Anan nogawa Lasarus sawana nape wandof nimaguf bifibif.^s
¹⁸⁻¹⁹Wambel ambalemba Betani bape felefele'ma Jerusalem, si'i kilomita wanifin. Ea' amom Juda hiami mafi'i ma monda' opalef hanitiamana biawa Martai Maria fegape sa'umbela anen hanitinamawa nagaga'.
²⁰Marta kwame' basefa Jisas nafi'i atin, kwafe' kowando'mana ufia'w, apa' Maria ata' kwapani ipat.^t

²¹Ea' Marta kwafe'ma Jisas kwa'ipana kwa'i, "Dembina, i'i ina' nepe na'a'e ai, hanitiname ae'anai ina noga', owa'atin."

²²Owa' ako'w kwa'ipana wapani kwa'i, "Ae' egawa ina' nigahali' Goda hiahawes mais, anen nogasi'inasi."

²³Ea' Jisas na'ipa'w na'i, "Hanitinamena atiasi nogosafel wapanii."^u

²⁴Ea' Marta kwagwamana kwa'i, "Ae' egawa anen anaf a' nosafel wapani nemaf akutaifi afamba epes hiasi sagaga'i sogosafel wapaniefi."

²⁵Ea' Jisas na'ipa'w na'i, "Kofagama epes sogosafel wapani ma sogofa' ambal namili, ae' atowe. Epen ami nihapifa ae', atiasi nega' ea' nesafel wapani nefa' ambal namili nepe andeande'.^v ²⁶Epen ami ata' nape namina nigahapifa ae'i, anin nepe andeande'. Ina nega' wapani, owa'atin. Nepe lifilafi dondol. Ina' nahapila basef ifimba, a'a owa'?"^w

²⁷Ea' kwa'ipana kwa'i, "Aho' dembinai, ae' ahapifa ina' Krai, God nandandepena nasapa'ena nagafi'ii. Ina' Nogamana ananinai, fowa' anen na'i nigafi'i itap apa'i."

Jisas nalef

²⁸Ako'w kwa'ipana na'amba, kotanima kwafe'ma owama'w Maria kwa'ipa'w sa'osa'ombel kwa'i, "Dembina Tisa a' nafi'i nataga nofalena."^x

²⁹Maria kwame' basef ifimba atin, kosafel kwafalis kwafe'mana.
³⁰Jisas ina dei' nawisi wambel lu'wambela la'afen, owa'. Afa' naili

r 11:15 Mk 14:31 s 11:17 Mt 21:17 t 11:20 Jo 11:32 u 11:23 Jo 5:29 v 11:25 Jo 8:51
w 11:26 Jo 6:69 x 11:28 Jo 11:20

wambel di'imbili doko' Marta kwagatonama. ³¹Amom Juda mape maloma Maria nomon ipat awoutai ma'i mowa' banaga nomonas ako'usi ma sogape banages. Ea' amom mati Maria kwasafel kwafalis kwafe!. Amom ukup pa'i owa' ako'w kofe' wandofa kogalopana. Ea' magima'w mafe!.^y

³²Ea' Maria kwafe'ma anamba Jisas nagapoma kwatolona kundiwa nembawa felefele'ma bo'wagah ananigahi kwa'ipana kwa'i, "Dembina, i'i ina' nepe nelomapa ai, hanitiname ae'anai ina noga', owa'atin. Apa' owa' napani laogon dei' anen naga!."

³³Jisas nati ako'w kwape kwalef atin ea' nati amom Juda mafi'i maloma'w malef wapani. Ea' nati esis uwahipis opaf ananifi a' aof a'owa' na'i a' nelef atin. ³⁴Ea' nahali'as na'i, "Ipa' pawana ani?"

Ea' esis sa'ipana sa'i, "Dembina, fi'i netelogan."^z

³⁵Owa' a' nalef.

³⁶Amom Juda mati anen nalef na'amba ma'i, "Ipa' petolona! Anen okom maimailana a'owa!"^a

³⁷Ape' anom ma'i, "Aman anamba ma'una nanda' aman anamba naep pagaso'anai ma dei' pagatianai. Anen la'ifinai ma fowa' a' nili' nifi'i ma notopalopa aman anamba ai, dei' a' nope a'a noga'?"^b

Jisas nasa'ma Lasarus nosafel wapani

³⁸Ea' Jisas opaf nimanif endilisi nafe' nataga wandof afamba lu'wafi sagwasogon nagawis nomon otam lu'unai. Ea' sanda' anona owap lu'unai sowalo uta.

³⁹Ea' na'ipas na'i, "Ipa' lefata owap anamba nogowalo utai."

Ea' Marta haniti'ma aman anamba nagaga'i kwa'i, "Dembina, anen a' nape nimaguf bifibif ea'. Dei' alogw awami a' mana."^c

⁴⁰Owa' Jisas na'ipa'w na'i, "Fowa' ali' a'ipina dei' i'ipina wapani, i'i ina' nihapifa ae', atiasi niti mogogala'i banagami Godi."^d

⁴¹⁻⁴²Ea' esis selefata owap anamba ea' Jisas naniga nati ilif na'i, "Ahame, ae' anifelina ma nagame'e. Ae' egawa ina' name'e lifilafi apa' ae' a'ias na'amba ma esis amam nematawa sagalutu na'ai sogahapifa ae', ina' nasapa'e agafi'ii."

⁴³Jisas nandabeten na'amba ea', nofalana mehup na'i, "Lasarus, safel niwisi ando!"

⁴⁴Ea' aman anamba nasafel nawisi ando'. Apa' bo'wagah haloma lagof amaga ananiami sanda' lowaf sombafana.

^y 11:31 Jo 11:21 ^z 11:34 Lu 19:41 ^a 11:36 Jo 9:6 ^b 11:37 Mt 27:60 ^c 11:39 Jo 11:4,23-26 ^d 11:40 Jo 12:30

Ea' Jisas na'ipas na'i, "Ipa' tagwahomana luwaguf amamba ea' pekwahona nefe' wahifina."^e

Amom agufumi Judai ma'i basef mandame'maefa moha Jisas nogaga'
(Mt 26:1-5; Mk 14:1-2; Lu 22:1-2)

⁴⁵Amom Juda hiami mafi'i mati Maria maloma'w malef, ea' mati amamba Jisas nanda'ami. Ea' a' mahapifana.^f ⁴⁶Apa' anom mafe'ma amom dembami Farisi ma'ipama amamba Jisas nanda'ami. ⁴⁷Ea' amom pris dembami maloma amom Farisi hiami mofala anom dembami mafi'i mandakolasa monda' kot. Ea' ma'i,

"Afa' atiasi onda' maina aman anamba nanda' maol banaganii? ⁴⁸I'i ope ogatotolona ma nonda' maol inimba, atiasi hiasi asohapifana hi'ilas. Ea' amom Rom atiasi mifi'i mohambombaga ipat lu'unai Godi noloma apa' Juda hiapai wapani."

⁴⁹Ea' anona aman agilinai Judai agol Kaiafas, anen dembinai pris nape nagali'ma pris hiamii ma afagol agalemba na'ipam na'i, "Ipa' ina pegawa anis hiahawes, owa'atin.^g ⁵⁰Ipa' ina dei' pegawa anif basef, owa'. I'i aman atotona nogaga'ma amam nematawa hiasi, na'ambai a' andeande'ma ipa'. Afa' wandaiwa' ma esis sogahambombaga apa' Juda. Na'amba mini'ap ape'ipi Judai a' lamonap."^h

⁵¹Anen ina na'i basef ifimba ma okom ananiami atom, owa'atin. Anen nape pris dembinai afagol agalemba. Ea' na'i basef Ambal bu'unai Godi naga'ipanaefi si'i profet na'i Jisas a' nondaga' ma nogatopalopa esis Juda hiasi.ⁱ ⁵²Kaiafas na'i Jisas ina a' noga' notopalopa esis Juda atis, owa'atin. Anen noga' ma nogatopalopa epes Godi hiasi sapesasa sagafe' itap hiagomai hi'ilas nuwambilasi nonda'as sogataga mini'ap atetep.^j

⁵³Nemaf afamba atef amom agufumi Judai a' mali' ma'i basef mandame'maefa moha Jisas nogaga'.^k ⁵⁴Ea' Jisas ina ata' nafe' alihina anamba esis Juda sagapoma, a' owa'. Anen nafe' nandambaho' atin felefele'ma anamba wafigima fataupigima ma wambel ambalemba Ifraim. Nape na'amba naloma alipumi ananiami.^l

⁵⁵Ina nogota laota ma esis Juda soga' gwa'aisi lu'wasi saga'i Pasovai, owa'. Ea' esis Juda hiasi sakwaha walemb asasilimbi a' safe' Jerusalem atogon. Safe'ma sigaila basef Godi fowa'ifi sosa'of sotofa alogwa sogandondomba alop asasipi ma God negati esis bo'wes hilili' ma soga' gwa'aisi isimba.^m ⁵⁶Esis sape ipat lu'unai Godi nomon sowando'ma Jisas ea' sahali'as sa'i, "Ipa' ukup pape pa'imama? Anen atiasi nifi'mai gwa'aisi isimba a'a owa'?"

^e 11:44 Jo 4:48, 7:31 ^f 11:45 Lu 16:31 ^g 11:49 Jo 18:14 ^h 11:50 Jen 50:20

ⁱ 11:51 Jo 10:16, 17:21; 1 Jo 2:2 ^j 11:52 Jo 5:18 ^k 11:53 Jo 7:1 ^l 11:54 2 Kro 30:17; Ap 21:26 ^m 11:55 Jo 7:11

⁵⁷Ea' amom pris dembami maloma amom Farisi hiami ma'ias dindinip ma'i, "Epen ami negawa Jisas nagapoma ni'ipafa ofe' ombalo'ana ma onda'mana basef."

Maria kwakolo'wa sanda kwasa'opa bo'wagah Jisasi
(Mt 26:6-13; Mk 14:3-9)

12 ¹Nimaguf wanif wanif ata' fapoma esis Juda sonda' gwa'aisi isimba lu'wasi Pasova. Nema' afamba Jisas a' nataga wambel Betani, alipunai Lasarus nagapoma. Fowa' naga'ma Jisas nasa'mana nogosafel wapanii.ⁿ ²Ea' sanda'mana gwa'aisi Jisas. Marta kwanda' gwa'aisi, apa' Lasarus nape nalomas sape sa' gwa'aisi saloma Jisas.^o ³Ea' Maria kwahapila anop kap si'ipa sanda bu'wani agilina nad sagatalin otamba hiambaii. Ea' kwahapilan kwakolo'wan kwandisamana bo'wagah Jisasi kwanda' auf balaga ako'ugai kopati'manan. Ea' ipat atamba asi'itama alogw bu'wagwi ma sanda inimbai.^p ⁴Apa' anona alipunai Jisasi Judas Keriotinai kowalana ma sanda inimba nandaiwa'ma kwakolo'wan kwagasapelin. Aman anamba atiasi a' nogowalapa Jisas niga'ipa amom boumianai.^q

⁵Ea' Judas na'ipas na'i, "Ti' afa' ofa' sanda inimba anis epes soso'afa moni 300 kina sotalina ofa'an ogaso' epes isimba kwahusa gwa'aisi mainai, dao' andeande'. Apa' owa', owa'atin."

⁶Apa' Judas okom ananiami ina ma'i notopalopa isimba kwahusa hiahawesi, owa'atin. Anen na'ias na'amba ma nonda' wal nogofa'amba. Dei' main, anen nugumafi bokis isimba Jisas naloma alipumi ananiami mala otamba amamimbai bagalasi ma dondol nanda' wala anemba.

Ea' Jisas nagwamana basef na'i,^r ⁷⁻⁸"Ipa' owa'i pi'ipa'w basef ifimbaia, owa'i. Andeande'ma ako'w kwagakolo'wa sanda inimba ma atiasi nema' afamba sehe igaga'afi ma sogawe. Isimba kwahusa gwa'aisi maini sape salomepa nimaguf hiafi. Apa' ae' ina epe egalomepa nogota lautai, owa'."^s

Amom pris dembami ma'i basef mandame'maefa moha Jisasi nogaga'

⁹Esis Juda hiasi same' basefa Jisas nape Betani. Ea' safi'li sa'li sotolona ea' sa'li siti Lasarus wapani, nimbewa' naga'ma Jisas nasa'mana nogosafel wapanii. ¹⁰Ea' amom pris dembami ma'i basef mandame'maefa moha Lasarus nogaga' wapani.^t ¹¹Dei' main, anis Juda hiasi sati Lasarus notanima nosafel ambal lapaona. Isimba atis dei' sakwaha amom dembami Juda asafe' saila Jisas sahapifana.

n 12:1 Lu 10:40; Jo 11:1,43 **o** 12:2 Lu 7:37-38 **p** 12:3 Jo 18:3 **q** 12:4 Mt 19:21
r 12:6 Jo 19:40; Diu 15:11 **s** 12:7-8 Jo 11:43-44 **t** 12:10 Jo 11:45

Jisas nawis Jerusalem si'i dembinai king
(Mt 21:1-11; Mk 11:1-11; Lu 19:28-40)

¹²Wafilu epes hiasi safi'mai gwa'aisi isimba Pasova, same' basefa Jisas ata' nafi'i atin Jerusalem.^u ¹³Ea' satopa' agof lawahiguf apilugufa sahapilagof safi'i satagamana ufa'w. Ea' soga sa'i mehip sa'i, "Hosana. Apa' mandanifal endilisi ma ina'. Apa' ma'i God nofalo'ma ina' nagafi'i agol ananigilii nese'ena banagami ma nenda' maol ananini. Ina' king dembinai apa' Israeli."^v

¹⁴⁻¹⁵Ea' Jisas nowando'ma donki atitin sa'uni natilin nandagala natoman nafe' si'i fowa' anif basef Godi fagail Buk Baibeli faga'i, "Ipa' wambel Saion, ipa' ina ombal mehepa, owa'i. Dembinai king ipe'inai anaf notoma donki noganai nofa'ana nifi'i."^w

¹⁶Nemaf afamba alipumi Jisasi ina mogawa basef ifimba kofagefa faga'i Jisasi, owa'atin. Ama nogota atamba Jisas noga' ma nosafel wapani notanima nogalota ilif, dao' amom a' mogawa basef ifimba faga'i anini. Ea' ukup pepoma amamba epes isimba sanda'manam anini wapani.^x

¹⁷Anis epes sali' sati Jisas nogofala aman anamba nagaga'i Lasarus napani matmat nogosafel wapani. Ea' sa'ipa hiasi ma basef ifimba Lasarasi. ¹⁸Ea' epes hiasi same' basefa Jisas nanda' hiahaom banagami si'i God nanda'ami. Ea' dei' safe' satolona.^y ¹⁹Ea' amom Farisi manda'ipama ma'i, "Maol afa'ini ina la'ifin, owa'. Afa' agof akafa. Piti amam nematawa hiasi safi'mai anen atona hi'alas."

Anis Grik sa'i siti Jisas

²⁰Epes hiasi safe' Jerusalem ama gwa'aisi isimba lu'wasi sonda' lotuma God. Ea' anom Grik wapani mafe' malomas.^z ²¹Anona aman alipunai Jisasi Filip anen Betsaidainai itap lu'upa Galili. Amom Grik mafi'mai gwa'aisi isimba ea' mafi'mai Filip ma'ipana ma'i, "Dembinai, afa' wa'i uti Jisas."

²²Filip nafe' na'ipa Andru, amom biam mafe' ma'ipa Jisas.^a ²³Ea' Jisas nagwamam na'ipam na'i, "Ae' ataga epen egefa' alop epesi a' afi'i. Nogota atamba anis asasa'ma agol ae'agili lu'wagol.^b ²⁴Ae' a'lipipa basef endilisifi, i'i olemb witimb owa' bewa itap nomona, olemb ambamba bepe atifimb. Apa' i'i bewa begewala itap nomon, dao' ambamba ambetaga belo bil hiambi.^c ²⁵Epen ami okom mopoma ambal ananili atol ni'i nihapilal tatala'il, anaf ambal ananili higililal. Apa' epen ami okom mopoma ae' ma nesambala ambal ananili itap apa'e, anaf God a' nofa'al lotanimai nepe andeande' lifilafi.^d ²⁶Epen ami ni'i nenda' maol ae'anii, anin a' nindaila ae'. Mamahagoma ae'

^u 12:12 Sam 118:25-26; Mt 27:42; Jo 1:49 ^v 12:13 Sek 9:9 ^w 12:14-15 Jo 2:22

^x 12:16 Jo 11:43-44 ^y 12:18 Jo 11:48 ^z 12:20 Jo 1:44; Lu 19:3, 23:8 ^a 12:22 Jo 13:31-32; Jo 17:1 ^b 12:23 1 Ko 15:36 ^c 12:24 Mt 16:25 ^d 12:25 Jo 14:3, 17:24

egapoma, inimba nanda' maola ae'i anin negapoma anamba. Ea' epen ami nenda' maol ae'anii, Ahame ae'anai atiasi nosa'ma agol ananigili.

Anen nataga epen nogofa' alop epesi atiasi sondolana lawag usi'igai ti'wanaegai^e

²⁷Ea' Jisas na'ipas wapani na'i, "Dei' opaf ae'afi bolalaf afataga aof. Ae' basef owa'atina iga'if. Atiasi ae' a' i'i, 'Ahame, ina' li'amona akafimi amamba ma'i mogatagama ae' dei'i a'a?' Owa'atin. Ae' afi'i nogota ata'e ape itap apa'e ma maol inimba atin ae' enda'ana sehe egaga'.^f ²⁸Ahame, ina' nenda'ama epes hiasi sogasa'ma agol ine'igili lu'wagol."

Ea' anogol malogol ga'i gatagai heven ga'i, "Ae' anda'ama sogasa'ma agol ae'agili gogataga lu'wagol, owa' atiasi enda'agol gotaga lu'wagol wapani."^g

²⁹Ea' anis amam nematawa hiasi salutu sagame' malogol agalembai sa'i, "Owa', otaga diwala."

Apa' anis sa'i, "Anona ensel na'ipana anif basef."^h

³⁰Ea' Jisas na'i, "Malogol agalemba ina ga'i ma gogatopalopa ae', owa'. Agalemba ga'i ma gogatopalopa ipa'.ⁱ ³¹Dei' Ahame God a' nawaloga wafa amam nematawa hiasi sagape itap apai ea' natofa dembinai nugumafi itap apai.^j ³²Atiasi esis sendele il atin lawag usi'igai ti'wanaegai ilifa atiasi ihindi'ai esis amam nematawa hiasi sifi'mai ae' hi'igalas."^k

³³Jisas na'ipas na'amba ma nigihimba'mas sogogawa ufia'w anen atiasi nogaga'akwi.^l

³⁴Ea' esis sagwamana sa'i, "Mu'uli ape'ini naga'i na'amba na'i, Krai anen nogape lifilafi dondoli. Dei' maina ina' naga'i, 'Anen nataga epen nogofa' alop epesi atiasi sogandolona lawag usi'igai ti'wanaegai ilif?'" Dembinai nataga epen nogofa' alop epesi, anen epen mamahonama?"^m

³⁵Ea' Jisas nagwamasa basef na'i, "Nogota ata' bandata ma nagwapin nogala' nogalomepa. Dei' ipa' a' pendafe' hauguma. Na'amba owamb botagamepa. Epen ami negafe' owambi, anin ina negawa anamba negafe'ma, owa'.ⁿ ³⁶Ae' ape si'i nagwapin ipe'ini. Ipa' pindahapifa nagwapin inimba ma pegataga awasi nagwapin nogogala'i."

Jisas na'ipas ea', nakwaha esis a' nafe' nandambaho'mas.

Esis Juda hiasi owa' sohapifa Jisasa

³⁷Jisas a' nanda' maol banagani hiani, si'i God nanda'ani esis satilin. Apa' esis ina sahapifana, owa'.^o ³⁸Si'i basef ifimba fowa' profet Aisaia nanda'afi faga'ias dei' fataga fandawalap fa'i,

e 12:26 Sam 6:3, 42:5; Mt 26:38 **f** 12:27 Mt 3:17 **g** 12:28 Ap 23:9 **h** 12:29 Jo 11:42 **i** 12:30 Jo 9:39, 14:30 **j** 12:31 Jo 3:14 **k** 12:32 Jo 18:32 **l** 12:33 Sam 89:4,36; Sam 110:4; Ais 9:7; Dan 7:14 **m** 12:34 Jo 7:33, 8:12; 1 Jo 2:10-11 **n** 12:35 Ef 5:8
o 12:37 Ais 53:1; Ro 10:16

“Anaf epes ami sohapila basef afa'ifi? Esis sogati banagami Godi esis mamahisa? Owa'atin.”^p

³⁹⁻⁴⁰Esis ina la'ifisa sogahapifa Jisas. Dei' main, profet anamba Aisaia nanda' anif basef Godi wapani faga'ias na'amba fa'i,

“Anen nanda' naep asasipi apaso'as nanda' ukup asasipi paso' ma ina atiasi sotologon ea' ukup asasipi wapani ina atiasi sogawa ma sogambema nelelemba ae' enda'as bo'wes, owa'atin.”^q

⁴¹Fowa' Aisaia nati banagami mogogala'i Jisasi ea' na'ias na'amba ma anen atona.^r

⁴²Amom agufumi hiami a' mahapifa Jisas. Apa' owa', amom ombal bahama amom Farisi dembami. Ea' amom ina mawalapa basef ma'ipasef alihif, owa'. Ombal bahama amom Farisi mogali'amonama ina ata' moloma esis Juda monda' lotu wapani, owa'.^s ⁴³Amom agufumi amamba ukup pa'i esis a'owa' ma sogasa'ma agof amamugufi atogof lu'wagof. Apa' amom ina ukup pa'i God nosa'ma agof amamugufi, owa'atin.^t

Basef Jisasi anaf fewaloga epes hiasi

⁴⁴Ea' Jisas na'ipas dindinip na'i, “Epen nigahapifa ae'i, anin ina nahapifa ae' atowe, owa'. Anin nahapifa anen nasapa'e agafi'ii wapani.^u

⁴⁵Epen ami niti ae' anin nati anen nasapa'e agafi'ii wapani.^v ⁴⁶Ae' afi'i itap apa'e si'i anin nagwapin ama epen ami nigahapifai, anin ina a' nepe owamb, owa'atin.^w ⁴⁷Epen ami neme' basef ae'afi ma owa' nihapifif nilifa, ae' ina anaf ewaloga anin, owa'. Dei' main? Ae' ina afi'i itap apa'e ma egawaloga epes sagape itapi, owa'atin. Ae' afi'i ma iwambilas sogotanimai.^x ⁴⁸Epen ami negase'e alafuga ae'i ma anin owa' nihapifa ae'a, anaf anona dembinai jas a' nowaloga anin. Nema' afamba akutaifi basef ifimba atif ae' aga'iefi ifimba fenda' anin a' fewawalogon. ⁴⁹Dei' main? Ae' ina a'i anif basefa okom ae'ami atom maga'iefi, owa'. Ahame ae'anai atona na'ipi basef ifimba dindinipa iga'ipasef. Ea' anen nasapa'e afi'i a'if si'i okom ananiami maga'iefi.^y ⁵⁰Ae' egawa basef ananifi fawalapa ambal namili ma ipa' pegape andeande' lifilafi. Na'amba basef ae' aga'ipasafi ea' ifimba atif si'i Ahame naga'ipiefi.”

Jisas nasa'opamam bo'wagah alipumi ananiami si'i anona aman falafunai agol akanai nanda'am

13 ¹Nema' afamba lu'wafi esis Juda soga' gwa'aisi isimba Pasova owa' ata' fetagaea. Jisas nogawa nogota ananitai a' tataga ma nogakwaha itap apa'e nogafe'ma Ahamana. Ea' okom ananiami

P 12:38 Ais 6:10; Mt 13:15 **Q** 12:39-40 Ais 6:1 **R** 12:41 Jo 7:48, 9:22 **S** 12:42 Jo 5:44 **T** 12:43 Mt 10:40 **U** 12:44 Jo 14:9 **V** 12:45 Jo 8:12, 12:35 **W** 12:46 Jo 3:17, 8:15
X 12:47 Hi 4:12 **Y** 12:49 Jo 8:26,28

maimaila epes ananisi sagape itapi a'owa!. Na'amba dei' nihimba'masa okom ananiami lu'wami magamagaila esisi.^z ²Ea' wambomota anen naloma alipumi mape ma' gwa'aisi isimba. Ea' Saimon nogamana Judas Keriotinai nalomam mape. Owa' aman aunai Satan a' nali' naso'ma nomonas Judasi ma nefe' nighimba'ma boumi ma Jisas nogapoma.^a ³Ea' Jisas nogawa Ahamana nanda' anen banagona ma hiahaom hiami. Ea' nogawa anen nape naloma God nafi'i ea' atiasi a' notanima nefe'mana wapani. ⁴Ea' nosafel natagwaha siot lautai ananitai nowaha' anin taul. ⁵Ea' nakolo' embel anis dis nafe' notawa nasa'opamam bo'wagah amom alipumi ananiami ea' nanda' taul alamba nogowaha'ali nopati'mamagah. ⁶Nasa'opamagah nafe', natagama Saimon Pita. Owa' Pita na'ipana na'i, "Dembina, negesa'opame bo'wagah ae'agahi, owa'."

⁷Ea' Jisas nagwamana na'i, "Ina' owa' negawa maol inimba ae' dei' enda'ania. Apa' anaf dao', ina' negawan."

⁸Ea' Pita na'ipa Jisas na'i, "Owa'. Ina' owa'i nesa'opa bo'wagah ae'agahia, owa'."

Owa' Jisas nagwamana na'i, "I'i ae' owa' esa'opamena bo'wagah ine'igahia, ina atiasi nepe alipunai ae'inai, owa'atin."

⁹Ea' Saimon Pita nagwamana na'i, "Dembina, ina negesa'opame bo'wagah atagah, owa'. Nesa'ope hi'ili lagof balaga wapani sotaga be'es."^b

¹⁰Ea' Jisas nagwamana na'i, "Epen ami nagasa'of ea'i, anin ina atiasi nesa'of wapani, owa'. Anin bo'wen ea'. Ipa' hipai ipa' be'epa hilili', apa' anona ipe'inai atotona ata' owa' bo'ona hilili'a."

¹¹Dei' main? Anen a' nogawa ami atiasi nefe' niga'ipa boumi ananiami ma nighimba'mama nogapomai.

Ea' na'ipam na'i, "Ipa' hipai ambe'epa hilili', apa' anona ipe'inai atotona ata' owa' bu'unaia."

¹²Anen nasa'opamam bo'wagah amamugahi ea', nala siot ananitai nafe' natoma felefele'ma tebol. Ea' nahali'am na'i, "Ipa' pegawa maol inimba ae' anda'mepani a'a owa'?"^c ¹³Ipa' pefale tisa a'a Dembiwai, na'amba andeande!. Ae' ea' ma'uwi, basef ifimba endilisifi atif.^d ¹⁴Ae' Dembiwai ipe'iwai a tisa ipe'iwai. Ae' doko' asa'opa bo'wagah ipe'igahi. Ea' ipa' wapani a' penda'opa bo'wagah ipe'igahi atona atin.^e ¹⁵Ae' ea' ihimba'mepa waf afamba ae'afi. Ipa' penda'am na'amba atin si'i ae' anda'am.^f ¹⁶Dei' ae' a'lipipa basef endilisifi atif. Epen inimba agol akani nanda' maol dowadowafi, anin ina nape ilifa dembinai ananinai, owa'. Ea' anona dembinai nasapa' anin nagafi'i, inimba ina nikila' dembinai anamba ananinai, owa'.^g

^z 13:1 Lu 22:3; Jo 7:30, 12:23, 13:27, Jo 15:13; 1 Jo 3:16; Fl 2:8 ^a 13:2 Jo 3:35, 16:28 ^b 13:9 Jo 15:3; Jo 6:64,70-71 ^c 13:12 Mt 23:8,10 ^d 13:13 Mt 20:28; Lu 22:27
^e 13:14 Fl 2:5; Kl 3:13; 1 Pi 2:21 ^f 13:15 Mt 10:24 ^g 13:16 Mt 7:24, Je 1:25

¹⁷“Dei' ipa' pegawa waf afamba ea'. I'i pigi'maf andeande', dao' a pendagala.^h ¹⁸Ae' basef ake ma ipa' hipai pefe' pewalapa basef pigai'ipa boumi ma ae', owa'. Ae' egawepa andandepapa ea'. Apa' basef Godi fagail buk Baibeli atiasi fetaga endilisi ma anen nogawalapa ae' ma boumii. Basef ifimba faga'i na'amba fa'i, 'Aman anamba noga' gwa'aisi nugalumai atiasi nigi bo'waga egimugama nofa'asa ae'.ⁱ

¹⁹“Ae' dei' ape a'lipipa basef ifimba ma waf afamba ina dei' fataga, ata' owa'atin. Ama atiasi fetaga fendawalap, dao' ipa' pihapifa ae' ea' ma'uwi.^j ²⁰Ae' a'lipipa basef endilisi, epen ami negaso'an nembel anin epen ae' agasapa'ani, anin nase'e nembel ae'. Ea' epen ami negase'e nembel ae'i, anin naso'ana nembel Ahame ae'anai wapani nasapa'e agafi'ii.”^k

Atiasi Judas ni'ipa amom boumi ma Jisas nogapoma

(Mt 26:20-25; Mk 14:17-21; Lu 22:21-23)

²¹Jisas na'ipam basef ifimba ea', okom ananiami nimaniam a'owa'. Ea' na'ipam na'i, “Ae' a'lipipa endilisi, anona afa'inai atiasi nefe' nihimba'ma boumi ma ae' egapoma.”

²²Ea' alipumi ananiami manda' tima atin tol mape. Amom ina mogawa Jisas na'i ami.^l

²³Ae' alipuwai Jisasi, anen okom magamagailai ape felefele' ma anen. ²⁴Ea' Saimon Pita nanda' balaga na'ipi na'i, “Ina' hali'ago anen na'i ami.”

²⁵Ea' ae' indiki'ah afe' felefele'ma Jisas ahali'ana a'i, “Dembina'i, ina' na'i ami?”

²⁶Jisas nagwame na'i, “Ae' atiasi ila bret namba'w egaso'antoi, aman anamba ea' ma'una anen.”

Ea' nala bret namba'w naso' Judas Keriotinai Saimon nogamana.^m

²⁷Ea' ata' nahapila bret atin, owa' aman aunai Satan a' nawisana nembel ananimbili nomon.

Ea' Jisas na'ipana na'i, “Maol ina' na'i nenda'ani da'an kwafalis.”

²⁸Apa' afa' alipufai Jisasi wape waga' gwa'aisii, afa' ina ogawa basef Jisasi kofagefa, owa'.ⁿ ²⁹Judas nugumafi otamba afa'imbai. Na'amba anom alipumi Jisasi ukup pandanda' pa'i Jisas na'ipana ma nefe' nogotala anis gwa'aisi ma nonda' gwa'aisi isimba a'a na'ipana na'i noso'asa anemba otamba isimba kwahusi. ³⁰Ea' Judas ata' nahapila bret atin, nafe' nawis ando' kwafalis. Ea' owamb akot atowafai.^o

Mu'uli dembinai Jisasi

³¹Ea' Judas ata' nafe' atin nagawis ando'i, Jisas na'ipam na'i, “Dei' esis asosa'ma agol ae'agili ataga epen egefa' alop epesi lu'wagol. Ea'

h 13:17 Sam 41:9 **i** 13:18 Jo 14:29, 16:4 **j** 13:19 Mt 10:40 **k** 13:20 Jo 12:27

l 13:22 Jo 19:26, 20:2; Jo 21:7,20 **m** 13:26 Jo 13:2 **n** 13:28 Jo 12:6 **o** 13:30 Jo 12:23

sosa'ma agol Ahame Godi ma maol ae' anda'ani wapani.^p ³²Isimba atis Ahame God wapani nosa'ma agol ae'agili lu'wagol dei' atefa maol anen nanda'ani.^q ³³Ipa' sa'upai, ae' elomepa ope nogota bandata a' efe'. Ipa' atiasi pewando'me apa' ina atiasi petolowe, owa'. Anamba ae' egafe'ma, ipa' ina la'ifipama atiasi pegafe'agono, owa. Basef ifimba atif fowa' aga'ipa amom Judafi, dei' a'ipipaef wapani.^r ³⁴Dei' ase'epa mu'uli ae'ani dambaini ma ipa' ukup pindaima atin si'i okom ae'ami magamagaila ipa'. Ea' na'amba atin, ukup ipe'ipi pindaima atin. ³⁵I'i ukup ipe'ipi pindaima atin, atiasi epes hiasi sogawa ipa' alipipai ae'ipai.”^s

Jisas na'ipama Pita atiasi nowa' alafugama anen

(Mt 26:31-35; Mk 14:27-31; Lu 22:31-34)

³⁶Ea' Saimon Pita nahali'ana na'i, “Dembina, ina' a' nefe' ani?”

Jisas nagwamana na'i, “Anamba dei' ae' egafe'ma, ina atiasi nigim'i nefe'agono, owa'. Apa' anaf owagama dao', ina' a' nigim'i nefo'o.”

³⁷Ea' Pita nahali'ana na'i, “Dembina, dei' maina ae' ina la'ifiwi ma dei' igagim'ina? Ae' a'i aho'ma ega' egalomena.”

³⁸Ea' Jisas nagwamana basef na'i, “Ina' na'i aho' endilisi ma nega' negaloma ae' a'amon? Ae' a'ipina endilisi, atiasi owamb amba'e awata owa' ata' totaea, ina' a' nendahali'mi ni'ias wanif ni'i, ‘Ae' owa' egawa Jisasa.’ ”

Jisas anen si'i ufiaw ma epes sogafe'ma Ahamapa

14 ¹Jisas na'ipafa na'i, “Nelelemb ipe'ilimbi ina besafel nimanilimb a'owa', owa'i. Ipa' pindahapifa God, pihapifa ae' wapani.^t ²Ipat Ahame ae'anai alihinai satopa' ilalef hielifi fape fandandapa. I'i owa'ai, fowa' ae' i'ipipa. Apa' owa', endilisi atis ae' a' efe' endondomba wambel ipe'imbili.^u ³Ae' i'i efe'ma egandomba wambel ipe'imbilima owagama itanimai efa'epa pefe' pepe pelome. Ea' anamba ae' egapoma, ipa' wapani pepe anamba atogon pelome. ⁴Ea' ipa' a' pegawa ufiaw ae' igafe'akwi ma wambel ambalemba.”

⁵Tomas nahali'ana na'i, “Dembina, afa' owa' ogawaia ina' nefe' ani? Afa' ina ogawa ufiaw akwamba ina' na'i negafe'akwi.”^v

⁶Ea' Jisas na'ipana na'i, “Ae' atowe ufiaw kofagewe ma basef endilisifi feloma ambal namili. Owa' anin epen la'ifina nefe' negatagama Ahame ano'w ufiaw, owa'atin. Ea' ae' atowe.^w ⁷I'i ipa' pegawa ae', Pegawa Ahame ae'anai wapani. Ea' dei' apatolona. Dei' atef ipa' patolona pegawana.”

P 13:31 Jo 17:5 **q 13:32** Jo 7:33-34 **r 13:33** Jo 15:12,17; 1 Jo 3:23; 2 Jo 5 **s 13:35** Jo 7:34; Jo 21:18-19 **t 14:1** Jo 14:27 **u 14:2** Jo 12:26, 17:4 **v 14:5** Jo 11:25; Ro 5:1-2; Hi 10:20 **w 14:6** Jo 8:19

⁸Filip na'ipana nahali'ana na'i, "Dembina'i, ina' himba'mafa Ahamena ine'inai afa' ma isimba ea' sondahama afa'."x

⁹Ea' Jisas na'ipana na'i, "Filip, nogota ea' lautai ape agalomewa, ina' owa' ata' negawa ea'? Epen ami nagati ae' ea'i, anin a' nati Ahame ae'anai wapani. Dei' maina ina' ata' naga'i, ae' igihimba'mepa Ahame ipa'?"y ¹⁰Ina' nahapifa ae' ma negawa ae' aloma Ahame afa' atotofa, ae' ape anen, anen nape ae', a'a owa'? Basef ae' agasi'ipafi, ifimba ae' ina anda'ef okom ae'ami atom, owa'. Ahame nape ae' ea' anen atona nanda' maol ananini hiani.z ¹¹Ipa' pindahapifa basef ifimba. Ae' ape Ahame, Ahame nape ae'. I'i owa'ma, ipa' ukup pendapoma maol banagani hiani anda'ani. Ipa' piti maol inimba, pindahapifi.a

¹²"Basef endilisifi atif dei' a'ipipa. Epen ami nigahapifa ae'i, maol hiani dei' anda'ani, anin wapani atiasi nenda'an. Ama anaf nenda' maol lu'wani a'owa' nikila' maol ae'ani. Dei' main? Ae' efe'ma Ahame.b ¹³Hiahawes hiasi ipa' pendabeten pigahali'anasa agol ae'agilii, atiasi ae' inda'asi. Ama Ahame a nogofa' agol lu'wagilima maol ae' Nogamana ananiwai atiasi inda'ani. ¹⁴Hiahawes ipa' pigahali' ae'masi ma agol ae'agili, pihapifi endilisi, dao' atiasi inda'asi.c

Jisas na'i atiasi nosapa' Ambal bu'unai Godi nifi'i

¹⁵"I'i ipa' ukup pi'i ae' endilisi, dao' ipa' pindagi'ma mu'uli ae'ani andeande'.d ¹⁶Ama atiasi ihali' Ahame, ma nogasi'ipai anona notopalopepa nogowa' banagaipai. Anen nope nogaloma ipa' lifilafi dondoli.e ¹⁷Anamba Ambal bu'unai Godi naga'i basef endilisifii. Esis amam nematawa sagaila waf itapafi ina atiasi sotolona sogawana sofa'ana, owa'. Apa' ipa' pegawana ea' nape nalomewa, ea' atiasi a' nuwis nope nomon opalef ipe'ilimbi.f ¹⁸Ae' ina a' ikwahipa tol pepe dowaf, si'i awasi isimba alifisi ahasas mamasas akasi, owa'atin. Atiasi ae' igafi'mipai.g ¹⁹Nogota kwaia'uta esis amam nematawa sagaila waf itapafii ina atiasi sotolowe wapani, owa'. Apa' ipa' pigatolowai. Ae' ape namowe ambal namili, ea' na'amba atin ipa' pepe namipa ambal namili wapani.h ²⁰Ama nemaf afamba ipa' apegawa ae' ape Ahame, ape nomona ipa', ipa' pape ae'.i ²¹Epen ami negefa' mu'uli ae'ani nigil'mana nigailan andeande'i, anin a' okom maimaila ae' endilisi. Atiasi Ahame ae'anai okom mila anin. Ea' ae' wapani okom mimilan anin ea' etaga endawalapa anin alihiwi."j

²²Jisas na'ias na'amba, ea' anona Judas ina anamba Keriotinai, owa', anona daiana, na'ipa Jisas na'i, "Dembina'i, dei' maina ina' na'i

x 14:8 Jo 12:45; Kl 1:15; Hi 1:3 y 14:9 Jo 12:49, 14:24 z 14:10 Jo 10:38, 14:20

a 14:11 Mk 16:19-20 b 14:12 Mt 7:7; Jo 15:16 c 14:14 Jo 15:10, 1 Jo 5:3 d 14:15 Jo 14:26, 15:26; Jo 16:7 e 14:16 Mt 10:20; Jo 16:13; Ro 8:26 f 14:17 Jo 14:3 g 14:18 Jo 16:16 h 14:19 Jo 17:21-23 i 14:20 Jo 15:10, 16:27 j 14:21 Ap 10:41-42

nigihimba'mafa ina' netaga nendawalap alihinama afa', ina' owa' nihimba'masa ina' alihinama esis sagaila waf itapafia?"^k

²³Jisas nagwamana basef na'i, "I'i epen okom muga'i ae' endilisii, anin atiasi nila basef ae'afi andeande'. Ea' Ahame ae'anai atiasi okom mimila anin. Ea' afa' biafa ufi'mai anin ope oloman lifilafi.^l ²⁴Epen nandaiwa'ma ae' endilisii, anin ina atiasi nila basef ae'afi andeande', owa'. Ea' basef ifimba ipa' pagame'afi, ifimba ina ae'afi, owa'. Ifimba basef Ahame Godi nasapa'e agafi'ii. ²⁵Ae' ata' ape atapiwi alomepa a'ipipa basef ifimba.^m ²⁶Apa' anen notopalopepa ma nogowa' banagaipai, anen Ambal bu'unai Godi. Anamba Ahame atiasi nosapa'ana nugafi'i agol ae'agili. Ea' nowalipipa ma hiahawes hiasi, nosa'ma nomonas ipe'isi ma ukup pegapoma basef hiafi wapani agasi'ipafi.ⁿ ²⁷Ae' a'i ikwahipa. Apa' ae' ina enda'epa ombal behepa ukup iwaiwanip pepe si'i amam nematawa sagaila waf itapafi sanda'as, owa'. Ae' a' enda'epa pepe ukup awanep endilisi ma ukup ipe'ipi ina atiasi pesafel awep, owa'. Ea' ina ombal mehepa, owa'.^o ²⁸Ipa' pame'ef ea' basef ifimba agasi'ipafi. Ae' ikwahipa efe'. Bola itanimaimipai. I'i ipa' ukup pila ae' endilisi, ea' ipa' asonendahepa ma ae' egafe'ma Ahame. Dei' main? Ahame anen dembinai nikila' ae'.^p ²⁹Hiahawes isimba ina dei' asataga, ata' owa'. Apa' ae' ali' a'ipipas ea' ma nemaf afamba hiahawes isimba sogatagama ipa' pegawas pigahapifa ae'.^q ³⁰Ae' ina atiasi enda' basef hiafi elomepa, a'owa'. Dei' main? Aman dembinai aunai nugumafi itap apa'ii anamba dei' a' nafi'i. Anen ina atiasi la'ifinama nonda'me anis maefah, owa'atin.^r ³¹Apa' ae' a'i esis amam nematawa sagaila waf itapafi sondogawa ae' okom maimaila Ahame endilisi ea' dei' anda'as na'amba atin si'i anen nanda'ipi. Na'amba dei' afa' a' ofe'.

Jisas anen si'i lawag si'iga endilisi

15 ¹"Ae' si'i lawag si'iga endilisi. Ahame ae'anai anen si'i ahama aof afamba sagawa lawah sa'utip gwa'aipi pagailagahi.^s ²Agof hiagufi sa'utip owa' pigailagufia, agwafomba Ahame natopa'agof nelefatagof. Apa' anagof agof fail fogola gwa'aisii agwafomba anen nandombagof natopa'agof nahagasogof ama atiasi fogape bo'ogof fil fogola gwa'aisi hiasi andeande'.^t ³Basef ifimba ae' agasi'ipafi fanda'epa pataga be'epa hilili' ea'.^u ⁴Ipa' pendape ae' si'i ae' agape ipa'. I'i agof atogof wafiguf, ina atiasi sa'utip pilagof, owa'. I'i agof owa' fondala sisihiguf lawag si'igaea, afof ina atiasi folo andeande', fil fola gwa'aisi,

^k 14:22 Mt 18:20; Jo 13:34; 2 Ko 6:16; Ef 3:17 ^l 14:23 Jo 7:16 ^m 14:25 Jo 14:16

ⁿ 14:26 Jo 14:1, 16:33; Fl 4:7 ^o 14:27 Jo 14:3, 16:28; Jo 20:17; Lu 24:52 ^p 14:28 Jo

13:19 ^q 14:29 Jo 12:31, 16:11; Ef 2:2 ^r 14:30 Jo 10:18, 12:49; Mt 26:46 ^s 15:1 Mt 3:10

^t 15:2 Jo 13:10 ^u 15:3 Jo 6:56

owa'. Ea' na'amba atin si'i ipa'. I'i ipa' owa' pepe peloma ae'a, ipa' wapani ina atiasi pela anis gwa'aisi, owa'atin.^v ⁵ Ae' si'i lawag si'iga. Ipa' si'i agofugama. Epen negape ae'i ma ae' egape anini, atiasi negela gwa'aisi hiasii. I'i ipa' pekwaha ae', ipa' atipa ina atiasi penda' anis maefah, owa'atin.^w

⁶ "I'i anin epen owa' nepe ae'a, atiasi esis sili'amonan si'i sagatopa' agof namugufi ma aliguf. Ama satamagof sowa'aniagof a sogaofagof nif.^x ⁷ I'i ipa' pepe ae' ma basef ae'afi fepe nomona ipa', ipa' pihali' ae' ma basef maif pendahama ukup ipe'ipi paga'ias, dao' atiasi hiahawes isimba sotagamepa na'amba atin.^y ⁸ I'i ipa' pela gwa'aisi hiasi, Ahame ae'anai nofa' agol lu'wagili. Ama atiasi pegataga alipipai ae'ipai. ⁹ Ahame okom maimaila ae', ea' na'amba atin ae' okom maimailipa. Dondol ipa' pendape okom ae'ami la'afima ma pegegawa okom ae'ami pelele' mailipa a'owa'.^z ¹⁰ I'i ipa' pila mu'uli ae'ani andeande', atiasi apepe okom ae'ami la'afima nomon si'i ae' agaila mu'uli ahamai andeande'ma agape okom ananini la'afima nomon.^a ¹¹ Ae' a'ipipa basef ifimba ma a'i dagala ae'ani inimba nepe nelomepa ae' dagala ipe'ini a' nepe si'ina nelelemb ipe'ilimbi.^b ¹² Mu'uli ae'ani inimba. Ipa' ukup pindaima atina sahin owan ipe'isi endilisi si'i ae' okom magamagailipa.^c ¹³ I'i anin epen nekwaha ambal ananili atol nega' netopalopa esis alipisi atis, waf afambai afikila' waf afamba anin epen daian nanda'afi.^d ¹⁴ Ipa' pila mu'uli aga'ipipani andeande', dao' ipa' alipipai ae'ipai. ¹⁵ Epen agol akani dembinai ananinai ina na'ipan basef alihifa maol anen nanda'ani, owa'atin. Apa' ae' a'ipipa basef hiafi Ahame ae'anai naga'ipiefi. Na'amba dei' ae' ina efalepa epes falafipai agof akipai, owa'. Ae' efalepa alipipai. ¹⁶ Ipa' ina pali' pandandepa ae' ipe'iwai, owa'. Ae' ali' andandepa ea' ae'ipai. Ea' anda'epa panda' maol bu'wani. Ama pefe' penda' maol bu'wani si'i lawah hogola gwa'aisi ma maol bu'wani ipe'ini negape andeande'. Ama i'i ipa' pendabeten pihali' Ahame ma anis hiahawesa agol ae'igili, anen nogasi'ipasi.^e ¹⁷ Ae' ase'epa mu'uli ipa' na'amba. Ipa' ukup pindandaima atin endilisi ma sahin owan ipe'isi.^f

Atiasi epes sagaila waf itapafi sofala alipisi Jisasi bousi

¹⁸ "I'i esis amam nematawa sagaila waf itapafi si'i sofala ipa' boupai dao', ipa' pendegawa esis fowa' sali' sofala ae' bouwai.^g ¹⁹ I'i a' endilisi ipa' epes itapipai, esis sagaila waf itapafi a' ukup pipilipa si'i ipa' mini'ap asaipai atipa. Apa' owa', ipa' ina epes itap apa'ipai, owa'atin.

^v 15:4 Jo 15:16; 2 Ko 3:5 ^w 15:5 Mt 7:19, 13:42 ^x 15:6 Mt 7:7 ^y 15:7 Mt 5:16
^z 15:9 Jo 14:15; 1 Jo 2:5 ^a 15:10 Jo 17:13 ^b 15:11 Jo 13:34 ^c 15:12 Jo 10:11; 1 Jo 3:16
^d 15:13 Mt 12:50 ^e 15:16 Jo 13:34 ^f 15:17 Mt 10:22; 1 Jo 3:13 ^g 15:18 1 Jo 4:5; Jo 17:14

Ae' esahe'epa ea' ma pegakwaha waf itapafi. Ea' dei' esis sagaila waf itapafi sofalepa boupai.^h

²⁰“Ipa' ukup pendapoma basef ifimba ae' agasi'ipafi andeande'. Epen inimba agol akani nanda' maol dowadowafi, anin ina nape ilifa dembinai ananinai, owa'. Ae' ea' sali' sanda'me waf awafi, ea' atiasi esis sonda'mepa waf awafi, sonda'epa awepa wapani. Esis i'i sigi'ma basef ae'afiai, dao' atiasi esis sigi'ma basef ipe'ifi wapani. Owa', owa'atin.ⁱ ²¹Esis ina sogawa Ahame nasapa'e agafi'ii, owa'. Ipa' ukup pagapoma agol ae'agili, ea' ae'ipai. Ea' esis sagaila waf esis itapafi asonda' hiahaom awami hiami ma ipa'. ²²I'i endilisi ae' owa' ifi'i i'ipasa basef ifimba ai, esis waf awafi akas. Apa' owa', owa'atin. Dei' esis owa' ano'w ufia'wa sogombaho' waf awafi asasifia, owa'atin.^j ²³Epen negefala ae' bouwai, anin nefala Ahame ae'anai bounai wapani.^k ²⁴Esis sagaila waf itapafi ina sati anona aman nanda' maol nandahama maol ae' anda'ani, owa'. I'i endilisi ae' owa' enda' maol inimbaea, esis waf awafi akas. Apa' dei' sati maol banagani ae'ani ea', owa', asowa' alafugaha ae' ukup awepa ae' aloma Ahame ae'anai wapani.^l ²⁵Apa' waf afamba asasifi afamba ea' fafe' dondo'ma anif basef ifimba fagail mu'uli esis Judai fa'i, 'Esis ukup awepa ae' dowadowaf. Ae' basef kofagefa ake.'^m

²⁶“Apa' anen natopalopepa nogowa' banagaipai, anen napani naloma Ahame. Ea' ae' esapa'ana nifi'mai ipa'. Anen Ambal bu'unai nawalapa basef naga'i endilisii. Anamba nafi'i ma nogawalapa basefa ae'.ⁿ ²⁷Ea' ipa' wapani atiasi pi'i basef pewalapefa esis. Dei' main, ipa' fowa' dambadamba pati asefela maol anda'an paloma pape atapipa pafi'i pataga dei'.”

16 ¹Ea' Jisas na'ipam wapani na'i, “Ae' dei' a'ipipa basef ifimba hi'alef ea' ma ipa' ina pekwhaha pagahapifa ae', owa'.^o ²Atiasi esis sili'amonipai ifagw esis Juda sandakolasugwi. Anef nemaf atiasi fegataga ma epes ami sehepa pegaga', esis atiasi ukup pendanda' si'i sanda' maol fasini Godi. Apa' owa'atin.^p ³Fowa' esis ina sogawa Ahame naloma ae' wapani, owa. Na'amba esis atiasi sonda' waf afambai.^q ⁴Apa' dei' a'ipipa ea' ma hiahawes isimba. Ama nogota atiasi togataga ma esis sonda'epa na'amba, ipa' ukup pendanda'ma basef ifimba dei' aga'ipipafi.^r

Maol Ambal bu'unai Godi

⁵“Fowa' ae' ape agalomepa ae' ina a'ipipa ma hiahawes isimba, owa'. Apa' dei' ea' efe'ma anen anamba nasapa'e agafi'ii. Ina anona aman ipe'inai

h 15:19 Jo 13:16 **i** 15:20 Mt 5:11; Mk 13:13 **j** 15:22 Lu 10:16 **k** 15:23 Jo 9:41, 14:11
l 15:24 Sam 35:19, 69:4 **m** 15:25 Jo 14:26 **n** 15:26 Lu 1:2; Ap 1:8,21-22 **o** 16:1 Mt 24:9; Lu 6:22; Jo 9:22 **p** 16:2 Jo 15:21 **q** 16:3 Jo 13:19 **r** 16:4 Jo 7:33, 13:36

nahali'i na'i, 'Ina' nefe' ani?' Owa'atin. ⁶Ae' anda' basef ifimba ea' ma ipa'. Ea' dei' nelelemb ipe'ilimbi nimanilimb a'owa'.^s ⁷Apa' ae' a'ipipa basef endilisifi. Ae' ekwahipa efe' ma etopalopepa pegape andeande'. I'i ae' owa' ma igafe'ai, dei' Spirit Ambal Godi Nogowa' banagaipai, ina atiasi nifi'mai ipa', owa'atin. Apa' i'i ae' egafe', dao', atiasi esapa'ana nifi'mai ipa'. ⁸Nemaf afamba nugafi'i, a' nihimba'ma esis amam nematawa sagaila waf itapafi ma sogogawa basef kofagefa ma waf wanifif afamba. Waf awafi feloma waf usi'ifi feloma basefa God nondakotimas.^t ⁹Waf awafi kofagefa asasifi na'amba. Esis ina sohapifa ae', owa'atin.^u ¹⁰Waf kofagefa usi'ifi na'amba. Ae' efe'ma Ahame ea' atiasi ipa' ina petolowe wapani, owa'.^v ¹¹Basef kofagefa ma kot ifimba. Aman dembinai aunai ma epes sagape itap apa'i, anen ea' gasopana ma kot atamba ma basef lu'wafi God dei' nanda'manatai.^w

¹²Ae' basef hiafi a'owa' ma a'i iga'ipipafi, apa' ipa' ina la'ifipama pegefa'ef dei', owa'.^x ¹³Nemaf afamba Spirit Ambal Godi naga'i basef endilisifii nugafi'i, a' nisindi'amonepa ma basef hiafi endilisifi. Anen ina a' nowalapa basef nomonas ananisi atis, owa'atin. Basef nagame'ef ea'i, ifimba atif nowalapef ni'if. Ama atiasi noga'ipipa hiahaom amamba ma'i anaf migi' mogatagai. ¹⁴Ea' nofa' basef ae'afi nowalapefa ipa' ma nogowalapa agol ae'agili. ¹⁵Hiahaom hiami, amamba ae'ami. Ea' dei' ae' a'ias a'i. Atiasi nofa' basef ae'afi ni'if nowalapefa ipa'.^y

Ukup iwaiwanipi atiasi petaga dagalaip

¹⁶“Nogota kwaia'uta ipa' ina atiasi petolowe wapani, owa'. Ama nogota bandata kwasakwasala owa', ipa' apetelowe wapani.”

¹⁷Anom alipumi ananiami, amom atom manda'ipama ma'i na'amba ma'i, “Basef maif kofagefa ifimba anen naga'ipafaef afa'i? Anen na'i, nogota kwaia'uta, afa' ina atiasi otolona, ma main owa', a' otolona wapani. Na'i nogafe'ma ahamana. Afa' ina ogawa basef ifimba kofagefa, owa'.”

¹⁸Ea' amom ma'ias wapani ma'i, “Nogota atamba kwaia'uta anen naga'iatai, isimba hiahawes mais? Afa' ina ogawa basef ifimba naga'if na'ambai, owa'.”

¹⁹Owa' Jisas a' nogawa amom ma'i mogahali'ana, ea' na'ipam na'i, “A'i ipa' pandahali'ma basef ifimba kofagefa ae' aga'iefi. Ae' aga'if na'amba. Nogota kwaia'uta atiasi ipa' ina petolowe, owa'. Ama owa' nogota laota kwasakwasala, owa' a petolowe wapani. ²⁰Endilisi atis ae' a'ipipa. Ipa' atiasi pelef mehif a'owa' ea' pelef pindiwagef endilisi. Apa' esis amam nematawa sagaila waf itapafi atiasi sondagala. Apa' ipa' a' nelelemb nimanilimb. Owa', owa'atin. Nelelemb ipe'ilimbi nimanilimbi atiasi bendambema betaga pendagala endilisi.^z ²¹Nemata'w opafu'wi ma kwa'i

^s 16:6 Jo 14:16 ^t 16:8 Jo 3:18 ^u 16:9 Ap 5:31; Ro 4:25 ^v 16:10 Jo 12:31 ^w 16:11 1 Ko 3:1-2 ^x 16:12 Jo 14:26; 1 Jo 2:27 ^y 16:15 Jo 14:19 ^z 16:20 Ais 26:17

kogola awanii ako'w kwame' akafimi kogawa nogota akwa'uta ma kogola awani atataga. Na'amba opaf akwa'ufo a' nimanif. Ako'w kolana ea', ako'w ina ata' okom mandanda'ma akafimi amamba wapani, owa'atin. Ako'w ea' kwandagala atin kwapoma awani nataga nape itap ea'.^a ²²Ipa' na'amba atin, dei' ipa' nelelemb nimanilimb. Atiasi ae' itilipa wapani, owa' nelelemb ipe'ilimbi asonohalemb. Ina anin epen la'ifina negalamona dagala inimba ipe'ini, owa'atin.^b ²³Atiasi nemaf afamba ipa' ina pihali'i ma anin mae atitin, owa'. Apa' dei' ae' a'ipipa basef endilisifi ipa'. I'i ipa' pihali' Ahame ma maefah maisa agol ae'agili dao', atiasi nese'epas.^c ²⁴Fowa' ipa' ina pahali'i ma pegefa' anis maefaha agol ae'agili, owa'. Dei' pihali'imas, atiasi pegefa'asi ma nelelemb ipe'ilimbi asonogahepa endilisi.^d

Jisas a' nikila' waf itapafi ea'

²⁵“Ae' dei' anda' basef ifimba waminif atina ipa'. Apa' ae' ina atiasi ata' i'ipipa basef waminif atin, owa'. Nemaf afamba ae' ewalapef alihif i'ipipaef ipa' ma Ahame. ²⁶Ama nemaf afamba atiasi ipa' pihali' Ahame ma agol ae'agili. Ae' ina ata' i'ipipa na'amba i'i ae' atowe atiasi ihali'ana ma nogatopalopepa, owa'atin.^e ²⁷Ahame atona okom maimailipa a'owa'. Dei' main, ipa' ukup paipaila ae' a'owa', ea' ipa' pahapifi pegawa ae' ape aloma God afi'i. ²⁸Fowa' ae' ape aloma Ahame ea' akwahona afi'i itap apa'e ea'. Dei' ae' a'i ekwaha itap a' itanima efe'ma anen.”

²⁹Alipumi ananiami ma'i, “Aho', dei' ina' na'ipafas alihis, ina ata' na'i basef waminif atin, owa'.^f ³⁰Dei' afa' ogawa ina ata' nape nasasa anin epen nihali'ina nili', owa'atin. Ina' negawa hiahaom hiami ea'. Isimba atis dei' afa' wahapifa ina' nape naloma God nafi'i.”

³¹Jisas nagwamam basef na'ipam na'i, “Ipa' dei' pahapifa ae' a'amon?^g ³²Ipa' peme'. Dei' nogota ea' felefele', aho' atataga ea' ma atiasi sotofa ipa' hipai atona biana pefe' walemb ipe'ilimbi. Ea' pekwha ae' atowe epe. Apa' ina ae' atowe epe, owa'atin. Ahame nape nalome.^h ³³Ae' a'i atiasi ipa' pepe pelome nelelemb pepe sa'ombel. Ea' dei' a'ipipa basef ifimba. Itap apa'e ipa' atiasi peme' nelelemb nimanilimb. Apa' nelelemb ipe'ilimbi atiasi ambetaga banagelemb. Dei' main, ae' atalogofa waf itapafi a ikila'af ea'.”

Jisas nandabeten natopalopa alipumi ananiami

17 ¹Jisas na'i basef na'amba ma ea', a' naniga nati heven nandabeten na'i, “Ahame, nogota atataga ea'. Ina' nese'e agol lu'wagili ae'

a 16:21 Ais 66:14 **b** 16:22 Mt 7:7 **c** 16:23 Jo 15:11 **d** 16:24 Jo 10:6 **e** 16:26 Jo 14:21,23 **f** 16:29 Jo 2:25 **g** 16:31 Mt 26:31,56; Jo 8:29 **h** 16:32 Jo 14:27; Ro 5:1; 2 Ti 3:12; 1 Jo 5:4

Nogamena ine'iwai, ma atiasi la'ifiwi ma egasa'ma agol ine'igili lu'wagol.ⁱ
²Dei' main? Ina' nesahe'e ea' ma epe Dembiwai ili'ma epes hi'igalas
 egaso'as ambal namili epes isimba hiasi ina' nagasi'iesi. Ambal alamba
 sogape andeande' lifilafi dondoli.^j ³Ambal lagape andeande' lifilafii
 kofagefa ifimba. Esis sogawa ina' atina God endilisinai, sogawa endilisi
 ae' Jisas Kraiss, ina' nasapa'e agafi'ii.^k

⁴“Maol inimba ina' nasapa'e afi'i ma enda'ani, ae' anda'an ambifan ea'.
 Ea' dei' asa'ma agol ine'igili lu'wagola nogohnaep esis amam nematawa
 itapasi.^l ⁵Ahame, fowa' itap owa' ata' pitagaia ae' ape alomena efa'
 agol lu'wagili ea'. Dei' nendase'e agol agalemba lu'wagili si'i fowa'. ⁶Ae'
 awalapa agol ine'igili ea' a'ipa esis epes isimba ina' nagase'eas ae'i ma
 itap apa'e. Isimba epes ine'isi nagase'eas ae' ea'i. Esis saila basef ine'ifi
 andeande'. ⁷Dei' asogawa hiahaom hiami ina' nagase'eam ae' ea'i,
 amamba mafi'i ina' atina.^m ⁸Basef hiafi ina' nagase'ef ea'i, ifimba ae'
 a'ipasef ea', sofa'efa sogogawa endilisi fowa' ae' ape alomena afi'i. Ea'
 sahapila basef ifimba ina' nasapa'e agafi'ii.ⁿ

⁹“Dei' ae' andabetena egatopalopa isimba. Ae' ina andabetena egatopalopa
 esis amam nematawa sagaila waf itapafi, owa'. Ae' anda' betena egatopalopa
 isimba ina' nagase'eas ae'i. Dei' main? Isimba esis ine'isi si'isi.^o ¹⁰Ea' epes
 ae'asi, isimba ine'isi. Epes hiasi ine'isi hi'ilas isimba ae'asi. Ea' esis sasa'ma
 agol ae'agili.^p ¹¹Dei' ae' ina ata' epe itap apa'e wapani, owa'. Apa' esis sope
 itap apa'e. Ae' ea' efe'mago ina'. Ahame be'ena hilili'i, ina' nimafi esisa
 atiasi sogape banagesa banagami ine'imi, banagami amamba ina' ea'
 nagase'eam ae'i. Ma esis sogape wambota atotota si'i afa' biafa wagape
 atotofa.^q ¹²Nogota atamba ae' ape agaloma esis, ae' imafias sape banagami
 ine'imi, banagami amamba ina' ea' nagase'eam ae'i. Ae' imafias andeande'
 ea' ina anin atitin higilalan, owa'. Aman higiligalanai, ea' anen atona atiasi
 nogafe' wambel awambili, ma basef ine'ifi fagail buk Baibeli fetaga endilisi
 fendawalap.^r ¹³Ae' dei' ata' ape itap apa'e a'i basef ifimba ma dagala ae'ani
 negape si'ina nelelemb asasilimbi. Ea' dei' a' efe'mago ina'.^s

¹⁴“Basef ine'ifi, ae' aso'asef ea'. Esis amam nematawa asofala esis bousi
 sanda'as awes. Dei' main? Esis ina sagi'ma waf itap apa'ifi si'i ae' wapani
 ina itap apa'iwai, owa'.^t ¹⁵Ae' ina andabeten ahali'ina ma negelefata
 esis itap apa'e, owa'atin. Ae' andabetena ina' nigimafiasa aman aunai
 ina nohambombagas, owa'atin. ¹⁶Esis ina sagi'ma waf itap apa'ifi si'i
 ae' wapani ina itap apa'iwai, owa'. ¹⁷Basef ine'ifi ifimba endilisifi. Ina'
 nenda' esis sondataga ine'isi atis bo'wes hilili'ma basef ifimba.^u ¹⁸Fowa'

ⁱ 17:1 Mt 11:27; Jo 11:41, 12:23 ^j 17:2 1 Jo 5:20 ^k 17:3 Jo 4:34 ^l 17:4 Jo 1:1,
 17:24 ^m 17:7 Jo 16:30 ⁿ 17:8 Jo 6:37,44 ^o 17:9 Jo 16:15 ^p 17:10 Jo 10:30, 17:21
^q 17:11 Jo 6:39, 13:18; Jo 18:9 ^r 17:12 Jo 15:11 ^s 17:13 Jo 15:19 ^t 17:14 Mt 6:13; 2 Te
 3:3; 1 Jo 5:18 ^u 17:17 Jo 20:21

ina' nasapa'e afi'i ape la'afena esis amam nematawa sagaila waf itapafi. Dei' na'amba atin ae' wapani ea' asapa' esis ae'asi sofe' la'afena esis isimba itapasi.^v ¹⁹Ae' ase'ena ae' ina' ea' ine'iwai atowe ma etopalopa esis wapani sogataga bo'wes hilili' ine'isi atis.

Jisas nandabetena epes hiasi anaf sogahapifa anini

²⁰“Apa' ae' ina andabetena egatopalopa esis isimba atis, owa'atin. Ae' andabetena egatopalopa epes isimba anaf sogame' basefa esisi ma sogahapifa ae'i.^w ²¹Ahame, ae' andabetena esis isimba hiasi asondape ukup atifip si'i ina' Ahame nape nagalome a ae' ape agalomena. Ea' na'amba atin, anda' betena esis sogape afa' biafa. Ama amam nematawa sagaila waf itapafi sogahapifa ina' atina a' nasapa'e agafi'ii.^x ²²Fowa' ina' nasa'ma agol ae'agili lu'wagol ea' dei' asa'ma agof asasigufi lu'wagofa sogape nembel atotombel si'i afa' biafa wagape. ²³Ina' nape nalome a ae' anaf epe eloma esis, ae', ea' na'amba atin ae' okom ma'i esis asondataga nembel atotombel endilisi. Ama esis amam nematawa itapasi sogogawa ina' nasapa'e afi'i, ea' ina' okom maimailas a'owa' si'i okom magamagaila ae' a'owa'.^y

²⁴“Ahame, ae' okom ma'i esis amam nematawa ina' nagase'eas ae'i sope solome wambel ambalemba. Ae' okom ma'i esis siti hiahaom banagami fasimi mogogala'i ae'ami, mogogala'i amamba ina' nagase'eam ae'i. Fowa' itap ata' owa' petagaea, nogota atamba ina' okom maila ae'. Ea' nase'e mogogala'i amamba.^z ²⁵Ahame usi'inai hilili'i, esis amam nematawa sagaila waf itapafi ina sogawa ina'. Apa' ae' egawena. Ea' esis isimba alipisi sogawa ina' nasapa'e afi'i. ²⁶Ae' a' awalapa agol ine'igili ma esis. Ea' ae' atiasi endawalapagol atin atapigil. Ama esis sogofa' waf afamba ukup pindaima atinafi ma anis daindias wapani si'i ina' okom magamagaila ae' ma ae' egape nomona esis.”

Judas nihimba'mama Jisas amom boumi (Mt 26:47-56; Mk 14:43-50; Lu 22:47-53)

18 ¹Jisas nandabeten nahali' Ahamana ea', naloma alipumi ananimi a' mafe' mowala mambo walemb Kidron fisanamb lawah oliv hogotaoma. Nao'wam mafe' anamba.^a ²Anen Judas a' nogawa anamba ma atiasi nefe' nighimba'ma boumi ma Jisas. Dei' main? Nimaguf hiafi dondol Jisas nao'wam mandakolas magapoma anamba.^b ³Ea' Judas nafi'i nao'wa anom soldia maloma anom plisman amom pris maloma amom Farisi masapa'am magafi'i. Amom mahapila bagah nagwahis lambeh maloma hiahaom sagapa'ami mofa'am atin mafi'i anamba.

⁴Ea' Jisas nogawa hiahaom hiami atiasi mogatagamanai. Ea' nafe' nahali'am na'i, “Ipa' pewando'ma ami?”

^v 17:18 Hi 10:10 ^w 17:20 Jo 4:11; Ga 3:28 ^x 17:21 Ap 4:32 ^y 17:23 Jo 12:26, 17:5
^z 17:24 Jo 8:55 ^a 18:1 Mt 26:36; Lu 21:37 ^b 18:2 Jo 7:45

⁵Ea' magwamana ma'ipana ma'i, "Jisas Nasaretinai."

Ea' Jisas na'i, "Ae' ma'uwi."

Owa' Judas na'i nigihimba'mam Jisasi, anen nalutu nalomam wapani.

⁶Jisas ata' na'ipam atin na'i, "Ae' ma'uwi."

Owa' a' mandahagas mowa motawa itap.

⁷Ea' Jisas nahali'am wapani na'i, "Ipa' pewando'ma ami?"

Ea' ma'i, "Jisas Nasaretinai."

⁸Jisas na'i, "Doko' ae' a'ipipa a'i ae' ea' ma'uwi. I'i ipa' pewando'ma ae', pihapili pekwahogo amom amamba mofo'o wahifim."^c

⁹Jisas dei' na'ipam na'amba nagi'ma basef ifimba fowa' naga'ieffi ma feगतaga endilisi. Basef ifimba faga'i na'amba fa'i, "Amam amamba fowa' ina' nagase'eami, ina anona atotona higililana, owa'."^d

¹⁰Ea' Saimon Pita nahapila anota bainat nagiatai naha anona aman Malkas nanda'mana maola pris dembinai nape nagali'ma pris hiamii. Ea' natopa' aliga kwahisigai ananigai gowa."^e

¹¹Ea' Jisas na'ipa Pita dindinip na'i, "Ina' tanima la bainat nowala let. Ae' a' ia' embela kap Ahame nagasi'iaipi."

Amom mao'wa Jisas nafe'ma pris dembinai Anas

¹²Ea' amom soldia maloma dembinai amamunai maloma amom plisman Judai hiami mombalo' Jisas manda' mandof mowa' lagofana.

¹³Ea' mao'wana nali' nafe' ma Anas, Kaiafas fafomana. Afagol agalemba, Kaiafas dembinai pris nape nagali'ma pris hiamii.^f ¹⁴Kaiafas nali' naga'ipa amom agufumi Juda naga'i, "I'i anona aman noga' ma apa' Juda hiapai, waf afambai andeande', waf bu'wafi."^g

Pita nandahali' na'i, "Ae' ina egawa Jisas"

(Mt 26:69-70; Mk 14:66-68; Lu 22:55-57)

¹⁵Ea' Saimon Pita naloma ae' alipuwai Jisasi wagi'ma Jisas wafi'li. Pris anamba dembinai nogawa ae'. Ea' awis aloma Jisas ipat nomon. ¹⁶Apa' Pita tol nalutu uta indaleleb ando'. Ae' itanima awisi ando' a'ipa ano'w nemata'w kugumafi utai ea' ao'wa Pita wawis nomon. ¹⁷Ea' nemata'w kugumafi utai kwa'ipa Pita kwa'i, "Ina' wapani alipunai aman anambai, a'a owa'?"

Owa' anen nagwama'wa basef na'i, "Ae' owa'."

¹⁸Amom manda' maola pris anamba dembinai maloma anom plisman amom hiami nomanamb bam makata nif a' malutumif fahi'am. Ea' Pita wapani nalomam nalutumif.

^c 18:8 Jo 17:12 ^d 18:9 Lu 22:38 ^e 18:10 Mt 26:39 ^f 18:13 Jo 11:49-51 ^g 18:14 Jo 20:3, 21:20; Ap 3:1; Mt 26:58

Pris dembinai nape nagali'ma pris hiamii nahali' Jisas

(Mt 26:59-66; Mk 14:55-64; Lu 22:66-71)

¹⁹Ea' pris anamba dembinai nahali' Jisas ipat nomon. Nahali'ana ma alipumi ananiami maloma basef anen nagawalipasafi.^h

²⁰Owa' Jisas nagwamana na'i, "Ae' awalipasa basef ae'afi alihigima ma epes hiasi itapasi. Ae' awalipas nomon ifagw esis Juda sandakolasugwi nimaguf hiafi dondol. Ea' awalipas ipat lu'unai Godi wapani, ipat anamba esis Juda hiasi sandakolasanai. Basef ae' aga'iefi ina fandambaho', owa'atin. ²¹Dei' maina ina' nagahali' ae'? Dei' nigahali' esis sagame' basef agawalipasafi. Esis sogawef."ⁱ

²²Jisas na'i basef ifimba atin, owa' anona plisman nalutu felefele' naha amaga lagol ananigili na'ipa Jisas dindinip na'i, "Ina' owa'i negwamana basef ifimba dembinai prisa."

²³Ea' Jisas nagwamana basef na'i, "Ti' ae' i'i anif basef awafi, dao' ina' ni'ipa amom hiami na'amba. Apa' owa'atin. Ae' iga'i basef endilisifi, dei' nahe ma main?"

²⁴Mandelef ata' fapomana atin lagof Jisasi, ea' Anas nasapa'ana nafe'ma pris anamba dembinai Kaiafas.

Pita nandahali' wapani na'i, "Ae' ina egawa Jisas, owa'atin"

(Mt 26:71-75; Mk 14:69-72; Lu 22:58-62)

²⁵Saimon Pita tol nalutuma nif fahi'ana, ea' sa'ipana sa'i, "A'i ina' alipunai ananinai?"

Owa' anen na'i, "Ahae', ae' owa'."^j

²⁶Ea' anona aman nape felefele'ma Pita. Anen nanda' maola pris anamba dembinai. Anen amom atom wambota atota aman anamba doko' Pita nahana nagatalisa nagakwalisa aliganai.

Ea' na'ipa Pita na'i, "Endilisi atis, ae' ati ina' nape nagaloma Jisasi ganimba lawah oliv hogatawama."^k

²⁷Ea' Pita nandahali' na'i wapani na'i, "Ae' owa'."

Anen ata' na'i atin, owa', awata atata.

Amom mofa' Jisas mafe'ma gavman dembinai Pailat

(Mt 27:1-2,11-14; Mk 15:1-5; Lu 23:1-5)

²⁸Ama kuhimbata atota amom matagwaha Jisas makwaha ipat Kaiafasi, mofa'ana mafe' ipat gavman dembinai. Ea' amom Juda ina mafe' mawis ipat atamba, owa'. Amom ma'i, "Na'amba a' mofa' alogw awagwi ea' ina atiasi mea' gwa'aisi lu'wasi Pasova, owa'atin."

h 18:19 Mt 26:55; Jo 7:26 **i 18:21** Ap 23:2 **j 18:25** Jo 18:10 **k 18:26** Jo 13:38

²⁹ Amom ukup pandanda' na'amba ea' tol malutu ando' Pailat nafi'mai amom na'i, "Ipa' pa'i penda'mana kot aman anamba ma main?"

³⁰ Amom magwamana basef ma'i, "I'i aman anamba owa' nonda' waf awafia, apa' ina a' mofa'ana nifi'mai ina."^l

³¹ Ea' Pailat na'ipam na'i, "Ipa' atipa pefa'ana penda' kotimana nondahama mu'uli ipe'ini atin. Apa' ae' owa', andaiwa!"

Ea' amom Juda magwamana ma'i, "Mu'uli ipa' Romi na'i owa'i ma mogaha anin epen negaga', owa'atin endilisi."^m

³² Hiahawes isimba amom Juda manda'asi ina sataga dowaf, owa'atin. Isimba sataga sagi'ma basef ifimba Jisas nali' naga'iefi afegataga endilisi. Dei' main? Anen nali' na'i, "Atiasi esis sehe ega' lawag usi'igai ti'wanaegai."

³³ Ea' gavman dembinai Pailat netanima nawis ipat lu'utai gavmani nomon. Ea' nofala Jisas nafi'i nahali'ana na'i, "Ina' king dembinai esis Judai?"

³⁴ Jisas nahali'ana na'i, "Basef ifimba fataga okom ine'imi atom a'a anis daias sa'ipinaefa ae'?"ⁿ

³⁵ Ea' Pailat nagwamana basef na'i, "Ina' okom ma'i ae' wapani ae' Judaiwai? Owa'atin. Epes ine'isi saloma amom pris dembami, esis atis sombalo'ena sowa'ena nafi'mai ae'. Ina' nanda' waf maif?"

³⁶ Ea' Jisas na'i, "Ae' ina Judaiwai king igimafi epes itapasi, owa'atin. I'i ae' epe dembiwai king itap apa'iai, alipumi ae'ami manda' maola ae'i motopalope mopa' ma Juda ina la'ifisa sogombale'e. Apa' owa', owa'atin."^o

³⁷ Ea' Pailat na'i, "Na'amba ina' anina king dembinai."

Jisas nagwamana basef na'i, "Ina' na'i ae' anawe dembiwai king. Basef ifimba endilisifi. Ma'me kolae ma egape king dembiwai. Ae' afli' itap apa'e ma igawalipasa basef endilisifi. Epen ami nenda' waf endilisifi, inimba negame' basef ae'affii."

³⁸ Ea' Pailat nahali'ana na'i, "Basef ifimba endilisifi, basef maif?"

Pailat na'i esis sowa' Jisas lawag usi'igai ti'wanaegai

(Mt 27:15-31; Mk 15:6-20; Lu 23:13-25)

Pailat na'ias na'amba ea' notanima nawis ando' esis Juda sagapoma na'ipas na'i, "Ae' ina ati anis maefah awasi ma anen, owa'. Ina ati anef waf awafi ma enda'mana anif basef, owa'. ³⁹ Apa' waf ipa' Juda, ma panda' gwa'aisi lu'wasi Pasova, ae' akwaha anin epen nanda' kalabusi nafe'mago ipa'. Dei' ipa' pa'i ae' ekwaha king dembinai ipa' Judai nefe'mago ipa', a'a ami?"

⁴⁰ Ea' esis sagwamana basef dindinip sa'i, "Owa'atin, anen owa'. Ina' nekwaha Barabas nifi'mai apa'."

Aman anamba Barabas anen nanda' walii naha epes sagagai.

^l 18:30 Jo 19:6-7; Ap 18:15 ^m 18:31 Mt 20:19; Jo 3:14, 12:33 ⁿ 18:34 Jo 1:11

^o 18:36 1 Ti 6:13; Jo 8:47

19 ¹Ea' gavman dembinai Pailat nao'wa Jisas nafe' na'ipa amom soldia mopagahona.^p ²⁻³Mapagahona ma ea', mala'watefa anof mandof higatagufi si'i anota hat mowalo'manota balaga ananigai, malamana anef lowaf akwahifi. Ea' timbi tambel mafe'ma anen ma'ipana ma'i, "Nemaf bu'wafi, ina' dembinai king Judai." Amom manda' salomala anen manda'ana findiwana na'amba, mahana amaga ananigai.^q

⁴Ea' Pailat nawis ando' wapani na'ipa esis Juda na'i, "Ipa' peme!! Ea' ao'wana nafi'mai ipa' ma pegegawa ae' ina ati anis maefah awasi, owa'. Ina ati anef waf awafi ma anen enda'mana anif basef, owa'."

⁵Ea' Jisas a' nawis ando'. Hat atamba manda' mandof higatagufi magala'watefaf si'i hati fapomana balaga ananigai ea' lowaf akwahifi fapomana.

Ea' Pailat na'ipas na'i, "Ipa' piti aman ana'e."

⁶Ea' amom pris dembami maloma plisman amamumi ata' matolona atin, ma'ias dindinip mehip a'owa' ma'i, "Dolana nil lawag usi'igai ti'wanaegai!"

Ea' Pailat nagwamama basef na'i, "Ipa' atipa fa'ana dolanago. Apa' ae' owa', ae' ina ati anef waf awafi anen nanda'afi ma enda' kotimana, owa'atin."^s

⁷Ea' amom Juda magwamana basef ma'i, "Anen naga'i anen Nogamana Godi. Ea' mu'uli ape'ini na'i anen a' nondaga'."

⁸Fowa' Pailat ombal mahana kwasakwasala apa' dei' owa', name' basef ifimba atif, ombal a' lu'um mahana a'owa'.^t ⁹Ea' nawis nomon ipat atamba nahali' Jisas na'i, "Ina' nataga nafi'ani?"

Apa' Jisas ina nagwamana anif basef, owa'.

¹⁰Ea' Pailat na'ipana na'i, "Ina' nandaiwa'ma niga'ipi anif basef? Ina' negawa ae', a'a owa'? Ae' banagiwai ma ekwaha ina' negafe' dowaf a'a i'ipas sehena negaga' lawag usi'igai ti'wanaegai."^u

¹¹Ea' Jisas nagwamana basef na'i, "I'i God nagape ilifi owa' nese'ena banagami ina'a, ina' atina ina banagena ma negatalogofa ae', owa'. I'i nehe ega', waf afamba awafi. Apa' amom amamba mofa'e agafi'mai ine'i, waf amamifi awafi lu'uf a'owa', fikila' waf awafi ine'ifi."^v

¹²Pailat name' basef ifimba atin, ea' na'i notagwaha Jisas nefe' wahifina. Owa' esis Juda sofalana mehip sa'i, "I'i ina' netagwaha aman anamba nefe' wahifina, ina alipunai ma Sisar gavman dembinai esis Romi, owa'. Epen ami na'i anin atin king dambeni anin bouni Sisari."

¹³Pailat name' basef ifimba atin, nofa'i Jisas nawisi nataga ando' ea' nape anin sia amom dembami jas magapoma. Anamba sa'i ufia'w otamba atembai'wi. Ufia'w akwamba diga Hibru'i sa'i Gabata. ¹⁴Nemaf afamba esis Juda sape sandondomba

P 19:1 Lu 23:11; Jo 18:22 **q 19:2-3** Jo 18:38 **r 19:5** Jo 18:31 **s 19:6** Lev 24:16; Jo 5:18

t 19:8 Mt 26:62-63; Mt 27:12; Lu 23:9 **u 19:10** Jo 10:18; Ap 2:23; Ro 13:1 **v 19:11** Lu 23:2; Ap 17:7

gwa'aisi ma naman sonda' gwa'aisi lu'wasi Pasova. Ea' awin a' nandasapa' nape 12 klok. Owa' Pailat na'ipa esis Juda na'i, "Piti dembinai king ipe'inai nalutu na'a'e."

¹⁵Owa' esis Juda sa'ipana mehup sa'i, "Fa'ana, fa'ana, nendelana lawag usi'igai ti'wanaegai."

Ea' Pailat nahali'as na'i, "Ipa' pa'i ae' endela king dembinai ipe'inai lawag a'a owa'?"

Ea' amom pris dembami magwamana basef ma'i, "Apa' owa' anona dembinai kinga, Sisar atona anen dembinai king ape'inai."

¹⁶Ea' Pailat nakwahomasa Jisas esis Juda ma sogandolona lawag usi'igai ti'wanaegai.

Amom mandola Jisas lawag usi'igai ti'wanaegai

(Mt 27:32-44; Mk 15:21-32; Lu 23:26-43)

¹⁷Ea' amom soldia mowa' Jisas mofa'ana mafe'. Jisas atotona nofa' lawag ananigai a' nafe' nakwaha wambel lu'wambili nawis ando' nafe' nataga anagon agiligima Pipitagol Balagaigil. Diga Hibruai sa'i Golgota.

¹⁸Anamba amom mowa'ana lawag usi'igai ti'wanaegai naloma anom amam biam. Anona nail wa'ol, anona nail wa'ol, ea' Jisas nail la'afen.

¹⁹Gavman Dembinai Pailat nanda' anif basef nofa'ef nanda'ef fail lawag agamba ilif. Basef faga'ias na'amba fa'i, "Jisas Nasaretinai, anen Dembinai King esis Judai."

²⁰Esis Juda hiasi sati basef ifimba satalifif. Dei' main, anamba amom magandola Jisasa nape felefele' Jerusalem. Ea' basef fa'i diga wanifiga. Diga Hibruai, Latini, a diga Griki.

²¹Amom pris dembami esis Judai ma'ipa Pailat ma'i, "Ina' owa'i nenda' basef ifimba ni'i, 'Dembinai King esis Judaia', hapaifi. Ina' nenda' basef ni'i, 'Anen na'i, Ae' Dembiwai King esis Judai.' "

²²Ea' Pailat nagwamam na'i, "Basef ae' anda'ef ea'i fendape atapif."

²³Amom soldia mandola Jisas ea', mofa' luwaguf ananifi matambe'ef biafigin biafigina mondandama aolef mofa'alef fendandamam. Ea' mofa' siot ananitai wapani. Siot atamba esis ina sosambalota, owa'. Sanda'ata tape si'ita ilif tafe' tataga owin.^w ²⁴Amom manda'ipama ma'i, "Afa' ina owala siot atamba, owa'i. Afa' onda' pilai satu ma ami nigikila'i nefa'ata."

Amom ma'ias na'amba maila anif basef fowa'ifi fagape Buk Baibeli afataga fandawalap endilisi. Basef ifimba faga'i na'amba fa'i,

"Amom matambe' luwaguf ae'afi fafe'ma amom atona atin ea' manda' satu ma ami nigikila'i nefa'ef."

Ea' amom soldia manda'as na'amba atin.^x

²⁵⁻²⁶Ma'ma Jisasi kwaloma owama'w ako'ukwi waloma ano'w nemata'w Maria kwagaso' Klopasi waloma Maria Makdalai'wi awo biawai biawa walutu felefele'ma lawag Jisas nagailagai.

Ea' Jisas nati ma'mana anani'wi kwaloma ae' ananiwai okom magamagailai, afa' biafa walutu felefele'ma anen. Ea' na'ipa ma'mana na'i, "Ma'me, aman anamba nogamena ine'inai."

²⁷Ea' na'ipa ae' alipuwai ananiwai na'i, "Nemata'w akwamba ma'mena ine'ikwi."

Nogota atamba ae' efa'akw kwafe' ipat ae'atai ma igimafia'w dondol atapi'w.^y

Jisas naga'

(Mt 27:45-56; Mk 15:33-41; Lu 23:44-49)

²⁸A'i owa' main, Jisas nogawa maol hiani ananini ahi'alan, ea' okom ma'i anif basef fagape Buk Baibeli fetaga fendawalap. Ea' na'i, "Ae' iap pase'ema embel."

Anen na'ias na'amba nagima basef ifimba Baibelifi.^z

²⁹Ea' anol botol si'ila embel wain numbutimbeli ba'oh. Ea' amom mofa' anom mosong mowala wain embel ambalemba magiam masapa'am anogol bagol mofa'am mandomanam malogol Jisasi ma noga' embel.

³⁰Anen na' wain embel ambalemba ea' na'i, "Maol inimba ahi'alan."

Ea' nindiwa balaga ambal a' landahi' lafe'ana naga' dogw.^a

Amom soldia mapisila Jisas lambek ananimbihi wa'ol ano'w wamba'w

³¹Nemaf afamba esis Juda sape sandondomba gwa'aisi maisa naman sonda' gwa'aisi lu'wasi Pasova. Nemaf afamba dei'ifi sabat lu'wafi fikila' sabat anif nimaguf hiafi. Ea' amom Juda mandaiwa' ma amom wanom migail atapim lawah agahemba nemaf afamba lu'wafi. Ea' mafe' mahali' Pailata amom soldia mugundiwa bo'wagah amamugahi ma mogaga' ulala motagwahom mugisila'i. ³²Ea' amom soldia mafe' anamba maham magaila. Ea' mati anona nagail wa'ili mindiwa bo'wagahana a' naga'.

Ea' mafe'ma anona wa'ol mudiwa bo'wagahana. ³³Ea' mafe' ma Jisas nagaila, owa' mati anen a' naga' dogw endilisi. Ea' amom ina mindiwa bo'wagah ananigahi, owa'. ³⁴Ea' anona soldia nanda' wamba'w napisila lambek Jisasi wa'ol. Ea' kwafalis atis esimbel baloma embel maluwi.^b

³⁵Ae' ati amamba naep ae'api a'lipipa basef ifimba. Ea' basef ifimba ae'afi endilisifi atif. Ae' egawa basef ifimba aga'lipipafi endilisifi a'lipipa ma ipa' wapani pigahapifif.^c

³⁶⁻³⁷Fowa' basef fagail Buk Baibeli fa'ias na'amba fa'i, "Owagama bihitagof ananigufi ina totoweagof, owa'atin."

Ea' anif wapani fa'ias na'amba fa'i, "Owagama esis siti aman anamba sagapisilana wamba'wi."

y 19:27 Sam 22:15 **z** 19:28 Sam 69:21 **a** 19:30 Diu 21:22-23 **b** 19:34 Jo 21:24
c 19:35 Eks 12:46; Nam 9:12; Sam 34:20; Sek 12:10; Re 1:7

Amom soldia manda'am na'amba maila basef ifimba atif fagail Buk Baibeli fataga fandawalap endilisi.^d

Amom mawa Jisas matmat bolotaf nagal nagawis otam lu'unai
(Mt 27:57-61; Mk 15:42-47; Lu 23:50-56)

³⁸ Josep Arimateainai anen alipunai Jisasi, apa' anen ombal mahana ma amom Juda. Ea' nahapifana nomonas atis sape sandambaho'. A'i owa' main, anen nafe' nahali' Pailata alop Jisasi, Ea' Pailat na'i aho', a' nafe' nofa'ap nafe'.^e ³⁹⁻⁴⁰ Anen Josep nafe' naloma Nikodemus, anamba fowa' nafe' nagati Jisas anomb owambi. Anen nofa'i anin marasin bu'wani sanda'an ifat lawahi, agilima mer naloma alos. Marasin inimba hiani nimanin a'owa', 75 paun. Ea' amom biam mafe' mofa' alop Jisasi manda' luwaguf afitifi faloma marasin inimba mombafana, maila waf esis Judai.

⁴¹ Felefele'ma anamba magandola Jisasa anof aof fape. Aof afamba anona bolotaf nagal si'i matmat dambaitai nape. Anamba esis ina dei' sawa anin epenagon, ata' owa'atin. ⁴² Matmat atamba tape felefele'. Nema'f afamba nema'f esis Juda sa'i sogowando'ma hiahawesafi, ma nema'f sagapoma noma'wafi sa'i sabat felefele'ma fegataga. Ea' mofa' alop Jisasi mawana matmat atamba.

Jisas notanima nosafel wapani
(Mt 28:1-8; Mk 16:1-8; Lu 24:1-12)

20 ¹ Akot ata' tail, felefele'ma kuhumbita nema'f Sande Maria Makdalai'wi kosafel kwafe' matmat. Ea' kwati otam ina ata' masopama uta matmati, owa'atin. Anin epen nelefatam a' mafe' ma'oh wa'ol.^f ² Ea' kotanima kwasagih kwafi'mai ae'i Saimon Pita wagapoma, ae' alipuwai Jisasi okom magamagailai. Ea' kwa'ipafa kwa'i, "Anis safe' sofa' Dembinai nakwaha matmat asafe'. Ea' afa' ina ogawana safe' sambe'ana anima."

³⁻⁴ Ea' ea' aloma Pita wasagih wafe' wataga matmat atamba. Wasagih wafe', apa' ae' ikila' Pita ali' afa' ataga matmat atamba. ⁵ Ea' indiwa nembawa etawa ati luwaguf atif fa'oh nomon apa' ina awis nomon, owa'.^g ⁶⁻⁷ Owa' Saimon Pita nagil'mi nafi'i nataga ea' nawis matmat bolotaf nomon. Ea' nati luwaguf mogowa'anami atom ma'oh, maloma anef lowaf manda'af mogowa' balagonafi. Lowaf afamba sindiwaf sambe'af fa'oh anagon daiagon. Apa' luwaguf ifimba anif fa'oh dei. ⁸ Ea' ae' ali' agafe' matmat atambai agi'mana awis nomon ati hiahawes isimba a' ahapifana.^h ⁹ Nogota atamba afa' ina ogawa basef fagail Buk Baibeli faga'i Jisas noga' notanima nogosafel wapani, owa'. ¹⁰ Ea' afa' biafa utanima wafe' ipat.

d 19:36-37 Jo 7:13 **e** 19:38 Jo 3:1-2 **f** 20:1 Jo 13:23 **g** 20:5 Jo 11:44 **h** 20:8 Ap 2:24-32; 1 Ko 15:4

Maria Makdalai'wi kwati Jisas
(Mk 16:9-11)

¹¹ Apa' Maria ato'w kwalutu kwalopana matmat ando'. Kwalutu kwalopana atin, kwasisil kwati bolotaf matmat nomon, ¹² akwati ensel biam mala luwaguf afitimi mape anamba alop Jisasi doko' paga'oma. Amom biam anona nape balaga Jisasi gagafe'ma, anona bo'wagah hagafe'ma. ¹³ Ea' mahali'akw ma'i, "Ina' nalopa main?"

Ea' ako'w kwagwamam basef kwa'i, "Anis asofa' Dembinai ae'anai safe' ea' ina egawa anamba safe' sagambe'anama, owa'atin."ⁱ

¹⁴ Kwa'ipam basef ifimba ma ea', kwandambema owa' kwati Jisas nalutu naloma'w. Apa' ina kogawa anen kwa'i Jisas, owa'.

¹⁵ Ea' Jisas nahali'akw na'i, "Nemata'w, dei' maina ina' nagalef? Ina' newando'ma ami?"

Ako'w okom ma'i owa' anona nanda' maol aofi. Ea' kwa'ipana kwa'i, "Dembinai, i'i ina' negefa'anama, ni'ipi anamba nefa'ana nafe' nagambe'anama?"

¹⁶ Ea' Jisas na'ipa'w na'i, "Maria."

Ea' kwandambema kwati anen kwaipana diga Hibru'i kwa'i, "Rabonai." Basef kofagefa fa'i Dembinai Tisa.^j

¹⁷ Ea' anen Jisas na'i, "Ina nigahapila alop ae'api, owa'i. Dei' main? Ae' ina dei' a' itanima afe'ma Ahame gani ilif ata' owa'. Ina' nefe'ma owape ae'ami ni'ipam ni'i, Ae' a' itanima ilita ilifa Ahame ae'anai a Ahamepa ipe'inai, efe'ma God Dembinai ae'anai, a God Dembinai ipe'inai."

¹⁸ Ea' ako'w kwafe'ma alipumi ananiami magapoma kwa'ipam kwa'i, "Ae' ati Dembinai ea!"

Ea' kwa'ipama basef ifimba anen naga'ipa'wafi.^k

Alipumi Jisasi matolona
(Mk 16:14-18; Lu 24:36-49)

¹⁹ Nema' afamba Sande owamb, afa' alipufai Jisasi wandakolas ondotowalo wape anota ipat nomon. Afa' ombal mahafama amom dembami esis Judai. Owa' Jisas nafi'i nalutu nalomafa na'ipafa na'i, "Nelelemb ipe'ilimbi bepe sa'ombel."^l

²⁰ Na'ipafa basef ifimba ea', nihimba'mafa lagufi lambeh ananisi. Ea' afa' wati Dembinai afa'inai ea', asonahafama anen a'owa'.^m

²¹ Ea' na'ipafa wapani na'i, "Ae' a'i nelelemb ipe'ilimbi bepe awanalemb. Ae' dei' a'i esapa'epa pefe' pi'ipasa basef Godi si'i Ahame nasapa'e afi'i aga'ipipa."

ⁱ 20:13 Lu 24:16; Jo 21:4 ^j 20:16 Ro 8:29; Hi 2:11-12 ^k 20:18 Jo 19:38 ^l 20:19 Jo 16:22, 19:34; 1 Jo 1:1 ^m 20:20 Jo 17:18

²²Na'ipafa ifimba ma ea', a' naomafa ambip na'ipafa na'i, "Ipa' pefa' Ambal bu'unai Godi.ⁿ ²³Ama i'i pegakwaha waf awafi epen ami nanda'afi, God wapani a' nokwahomanaf okom moso'anaf. Apa' i'i ipa' owa' pekwaha waf afamba awafia, God wapani ina atiasi nokwahef okom moso'anaf, owa'atin."^o

Tomas nati Jisas

²⁴Anona ma afa' 12-pelaifa alipufai Jisasi, Tomas agol wa'agol Didimas. Kofagogola sa'i ma'mam kofolam atifi. Nema' afamba Jisas nafi'i nagatolofa, Tomas ina nape nalomafa, owa'. ²⁵Ea' anom alipumi ananiami mafe' ma'ipana ma'i, "Afa' wati Dembinai afa'inai ea'."

Owa' Tomas na'ipam na'i, "I'i ae' owa' ata' iti melegwa lagof ananigufi sagahana nigufa, ma esa faf ae'afi ma niguf fagawisa ea' esapa' lagol ae'agili guwis nomon lambek ananibihi, dao' ihapifana. Apa' i'i owa', owa'atin."

²⁶Nimaguf 8-pelaif fefe'ma ea', afa' wape anota ipat nomon, ondotowalo wape. Afamba Tomas wapani nape nalomafa. Owa' Jisas nawisi nalutu nalomafa na'ipaf na'i, "Nelelemb ipe'ilimbi bepe awanelemb."

²⁷Ea' na'ipa Tomas na'i, "Dowa faf ine'ifi fifi'i na'a. Ea' niti lagof ae'agufi. Nesapa' lagol ine'igili guwisi lambek ae'ambihi nomon. Ina okom bimbafim mopaina, owa'i. Nindahapifi endilisi."

²⁸Ea' Tomas na'ipana na'i, "O, Dembinai ae'inai, God ae'inai."^p

²⁹Ea' Jisas na'ipana na'i, "Ina' natolowe ea', dei' nahapifi. Apa' epe ami owa' sogatolowaia, sahapifi sonahas endilisi."^q

Dei' maina ae' anda' basef ifimba fagail buk akwa'e?

³⁰Jisas nanda' hiahaom hiami banagami daiam si'i God nanda'ami ma nogohnaep alipufai ananifai. Basefa hiahaom amamba ina anda'ef hi'alef fape buk akwa'e, owa'.^r ³¹Anda' basef ifimba do'wanif atifa hiahaom amamba ma ipa' pigahapifa Jisas anen Nogamana Godi, anen Krai, God nandandepana nasapa'ana nagafi'ii. Ma pihapifa agol ananigili pefa' ambal namili pegape namipa dondol lifilafi.

Alipumi Jisasi amom 7-pelaim matolona

21 ¹⁻²Jisas naga' nosafel wapani ma ea', alipufai ananifai a' watolona wapani nimaguf bif. A'i owa' main, wagi' watolona wapani. Basef faga'ias na'amba. Jisas nafe'ma afa' gani dumb lu'wambi Taiberias. Anofa afa' ondowa'anima atogon wagapani afamba. Saimon Pita, Tomas agol wa'agol Didimas maloma Nataniel, anen Kenainai, itap lu'upa Galili. Amom maloma nogaopana biam

ⁿ 20:22 Mt 16:19 ^o 20:23 Jo 11:16, 14:5; Jo 21:2 ^p 20:28 1 Pi 1:8 ^q 20:29 Jo 21:25
^r 20:30 Jo 3:15; Ro 1:17; 1 Jo 5:13

Sebedii maloma amom biam daiam Jisasi ondowa'anima wape atogon.^s ³Ea' Saimon Pita na'ipafa na'i, "Ae' a'i efe' igi agof."

Ea' afa' wa'i, "Olomena ofe' atin."

Ea' wafe' walota anota bot wafe' wa'i ugi agof wafe' wanda'am owamb ambamba laomb danda' apa' afa' ina wagi anol aol, owa'atin.

⁴Wafilu kuhimbita atota Jisas nafe' nalutu dumb ambamba akata apa' afa' ina ogawa wa'i anen Jisas, owa'.^t

⁵Ea' nofalafa na'i, "Awami sa'upai, ipa' pagi anogof agof a'a owa'?"

Ea' wagwamana basef wa'i, "Owa'atin."^u

⁶Ea' na'ipafa na'i, "Ipa' ata' pela anemb bewala bot atamba wa'ol lagol kwahisigilima. Ea' atiasi apiti anogof agof."

Ea' afa' wa'i ola anemb owa', owafai agof hiami. Ea' ina la'ififa ogagiai anemb bilitai begatoma bot nomon, owa'atin. Dei' main? Agof hiami a'owa' mala anemba namba asi'ina.^v

⁷Ae' alipuwai Jisasi okom magamagailai, a'ipa Pita a'i, "Nanumba Dembinai afa'inai."

Saimon Pita doko' natagwaha saket ananitai ta'oh ea' nanda' maol owa', name' basef ifimba nala saket wapani nanda' kopi' nowala embel dumb nopaul nafe' embel. ⁸Ea' afa' daiafa watoma bot wagi'mana wagai anemb si'inama agof. Afa' ina wail laogona akata, owa'. Si'i 100 mita. ⁹Wafe' wataga akata, wati anif nif fandif ea' wati anagof agof fasef nif faloma anota bret.

¹⁰Ea' Jisas na'ipafa na'i, "Ipa' fa'i anagof agof doko' pagagiagufi."^w

¹¹Ea' Saimon Pita nalota bot atamba nagiai anemb bafi'i akata. Anemb ambamba si'imba agof lu'wagufi atogof 153-pelaiguf. Apa' anemb ina pele'atamb, owa'atin.

¹²Ea' Jisas na'ipafa na'i, "Ipa' fi'i ma ata' pea' gwa'aisi."

Apa' afa' ina anona banagona ma nohali'ana niga'i, "Ina' ami?"

Owa'atin. Dei' main, afa' ogawa anen Dembinai afa'inai.^x ¹³Jisas nafi'i nofa' bret naso'afa, a agof wapani na'amba atin.^y

¹⁴Fowa' Jisas nogosafel wapani, nali' nafe'ma afa' alipufai ananifai watolona nimaguf bif. A'i owa' main, dei' watolona wapani a' wanif.^z

Jisas na'ipa Pita na'i, "Ina' nese'ama gwa'aisi sipsip ae'ami"

¹⁵Afa' wa' gwa'aisi ma ea', Jisas na'ipa Saimon Pita na'i, "Saimon nogama Joni, ina' okom maimaili a'owa' nikila' anom alipumi amamba daiam, a'a owa'?"

^s 21:1-2 Jo 1:45-51; Jo 20:24 ^t 21:4 Jo 20:14; Lu 24:41 ^u 21:5 Lu 5:4-7 ^v 21:6 Jo 13:23; Mt 14:29 ^w 21:10 Lu 5:6 ^x 21:12 Jo 6:11 ^y 21:13 Jo 20:19,26 ^z 21:14 Mt 26:33; Jo 1:42

Ea' anen na'i, "Aho', Dembinai. Ina' negawa ae' okom maimailina."

Ea' Jisas na'ipana na'i, "Ina' nese'ama gwa'aisi sipsip nogami ae'ami."^a

¹⁶Ea' Jisas nahali'ana wapani na'i, "Saimon nogama Joni, ina' okom maimaili endilisi, a'a owa'?"

Ea' nagwamana basef na'i, "Aho', Dembinai. Ina' negawa ae' okom maimailina."

Ea' Jisas na'ipana na'i, "Ina' nimafi sipsip ae'ami."^b

¹⁷Jisas nali' nahali'ana bif ea' dei' nahali'ana wapani a' wanif na'i, "Saimon nogama Joni, ina' okom maimaili a'a owa'?"

Ea' Pita okom iwanim na'ipana na'i, "Dembinai, ina' negawa hiahaom hiami. Ina' negawa ae' okom maimailina."

Ea' Jisas na'ipana na'i, "Ina' nese'ama gwa'aisi sipsip ae'ami. ¹⁸Endilisi ae' a'ipina, fowa' ina' ata' sa'wina, ina' nowaho' let ea' nafe' mamahagoma nomonas ine'isi sa'i negafe'ma. Apa' owagama ina' negatagama harena, ina' atiasi nendowa logof ine'igufi ma anom amam daiam mowaho'mena let mohapilina nefe' anamba ina' nindaiwa'magama."^c

¹⁹Jisas na'ipana na'amba ma nigihimba'mam ufiaw ma soha Pita nogaga' ma epes hiasi sogasa'ma agol Godi lu'wagol.

Ea' dei' Jisas na'ipana na'i, "Nila ae'."^d

Basef alipunai Jisas okom magamagailana a'owa'i

²⁰Ea' Pita nandambema nati ae', alipuwai Jisas okom magamagailai, agi'mam afi'i. Ae' ma'uwi fowa' afa' wape wa' gwa'aisi ma indisi'ah felefele'ma Jisas ahali'ana aga'i, "Dembinai, atiasi ami ni'ipa boumi ma nigihimba'mama ina' negapoma?"

²¹Ea' Pita natiti ae', nahali' Jisas na'i, "Dembinai, aman anamba anaf nope ni'imama?"^e

²²Ea' Jisas nagwamana basef na'i, "I'i ae' i'i anen a' nope ambal lopaona nope nefe' nefe' afamba ae' igitanimai, isimba ina maol ine'ini, owa'atin. Ina' nila ae'."

²³Ea' basef baso'afi wafifi ifimba fafe'ma afa' alipufai Jisasi fa'ias na'amba fa'i, "Aman anamba anaf ina noga', owa'."

Apa' Jisas ina na'ipafa basef ifimba esis saga'iefi, owa'. Basef ifimba kwamaifi.

Jisas na'i basef ifimba atif na'i, "I'i ae' i'i anen nope nefe' nefe' ma nemaf ae' igitanimai, isimba ina maol ine'ini, owa'atin."^f

²⁴Aman anamba alipunai Jisasi ea' ae' ma'uwi. Ae' a'ipipa basef ifimba ma hiahaom amamba Jisas nanda'ami dei' anda'am magail buk akwa'i. Apa' Kristen mogawa basef ifimba endilisifi atif ae' anda'afi."^g

a 21:15 Ap 20:28 **b** 21:16 Jo 13:38, 16:30 **c** 21:18 Mt 16:24-25; Mk 1:17; 2 Pi 1:14

d 21:19 Jo 13:23-25 **e** 21:21 Mt 16:28 **f** 21:23 Jo 19:35 **g** 21:24 Jo 20:30

²⁵Jisas nanda' anin maol hiani daian wapani. I'i anis epes sonda' basefa maol Jisasi hi'ilan filai, ae' a'i itap anamba hiagoma owa' anagona buk hianai noga'oha, owa'atin. Asi'igin dog.

Basef ea' ma'uf.